

叢譚五

土主廟縣城鄉徧有之舊志以爲是合州刺史趙延之已定論矣而遵義府志載田居蠶室錄云遵義祀土主與川主藥王同偁三聖不知土主何人或曰任貴也愚攷土主隨地異祀如巫山縣祀李鎮修雅安縣祀任貴天全州祀李真人祀李真濛陽縣祀韋皋銅梁祀趙延之通江縣祀洋州刺史李繼賢儀隴縣祀晉張英彭縣鐵峰祀姚萇其廟皆名土主廟唯遵義所祀土主名任貴前無明文而李鳳翽土主攷云土主任公名貴不知何許人西漢末越巂太守也按黎州志州有靈應祠祀任貴宋薛紱記曰任侯殺王莽郡守枚根自領太守光武使岑彭平蜀遣使迎降有忌功者讒害之貴以冤死史臣不爲力辨使其埶漢之志不明爲可哀也雅州志曰唯靈應廟者俗名土主廟祀漢印穀王任貴貴仗義秉節有惠于民邛州德之歲祀不乏明一統志東漢建武封貴爲國王公廟四川各府州縣有之遵義舊隸于蜀故祀其神云遵義之

合川縣志卷六十八 叢譚

一

土主則非趙延之矣亦異聞也森楷案後漢書光武紀建武十四年夏四月越巂人任貴自偁太守遣使奉計十九年越巂太守謀叛十二月劉尙襲貴誅之西南夷傳作王莽時郡守上文已言越巂故此郡上不著越巂字非不知其郡名也

枚根調邛人長貴以爲軍候更始二年長貴率種人攻殺枚根自立爲印穀王領太守事又降于公孫述述敗光武封長貴爲印穀王建武十四年長貴遣使上三年計天子卽授越巂太守印授越巂太守印綬十九年武威將軍劉尙擊益州夷路由越巂長貴聞之尙旣定南邊威法必行已不得自放縱卽聚兵起營招呼諸君長多釀毒酒先以勞軍因襲擊尙尙知其謀卽分兵先据邛都遂掩長誅之徙其家屬于成都据此則任貴長貴越巂邛人雖有不同而其事無異當卽一人李鳳翽乃云不知何許人西漢末越巂太守疏矣薛紱謂其被讒冤死不知其罪狀明白史臣固不能回護也雅州志言有惠于民歲祀不乏理或有之明統志謂貴國王則漢豈有印穀國邪明人不能攷据殊無足怪惟鄭君以漢學鳴西南乃于以上缺點不一諛正所不解也要之別處土主廟爲任貴或非任貴皆不可知川東北土主廟則固非趙延之莫屬耳以

延之立功于此貴則風牛不及非所謂也恐人惑于鄭君大名不無致疑特攷訂之如此

森楷自記

宋周濂溪先生觀巴嶽木蓮詩有枝懸縞帶垂金彈瓣落蒼苔墜玉盆之句蓋異產也故自合州往觀之黃廷桂四川通志言銅梁縣巴嶽山有木蓮高五六丈葉如柳梢花如菡萏出山則不植王世貞異物志特紀之今不知巴嶽山猶有此樹否也

森楷自記

州西鶴鳴里有招鶴亭三字宋徽宗書宣和間許生舉進士愛其鄉人朱受祿家羣鶴建亭作詩招之鶴果來集朱憤而愬諸朝上命均之鶴以離羣悲鳴不已帝爲書亭額賜焉

張乃孚合州志

宋紹定季夏建龍君亭有五色仙蛇見龍君像後入飛仙洞事見文熙之記

龍多山志

龍多牛王殿唐宋至道觀遺址也觀在爾日致爲精麗讀趙公記可想後燬於兵火今則所謂松柏者亦蕩無一存登眺之餘第見殘垣敗瓦隱約於荒煙蔓草間與山之靈山佛惠二梵刹彼此同慨滄桑耶劫灰耶蓋不待仙人對話而早已觸目河山新亭掩泣矣乾隆十九年冬蓬

合川縣志卷六十八

叢譚

二

溪李屠者買廖某牛牝一縛而殺之牝已解矣犢忽騰蹕絕縛狂奔山寺伏地哀鳴轂轍作乞命狀僧惻然因出錢贖之放之山命曰自修水草往來甚馴擾呼其名則依依昵人然止宿輒就今殿所終不逾尺寸於是人以爲牛王顯靈卽其地建殿三楹中祀牛王像元帝左右祀文昌嗚呼臨禍而悟眷仙蹟而來來不復去如自修者何明決而了澈耶今之人則皆貿貿然來隨楚咻而拜之曰牛王牛王云見六角碑

文龍多山志

雍正三年釋福泰謬龍多八景其一曰怪石銜松余歷訪父老旁及寺僧僉云飛仙石頂有怪松一株圍可兩人合抱高不逾丈最奇古道光末年暴風折之余因訪遺蹤石南有紹興呂瑜記文漫滅不可屬讀中有天寶三年蒲居士栽松於此石上云云嗟余不及其存也

龍多山志

寺周迴古樹數百章排空拱立如龍如虬大者可蔽人鐵幹銅柯糾紛拳結而寺門下石級兩旁巨柏六尤古異然樹梢皆屈曲向寺低首作禮狀山之靈異此爲尤著每上巴士女競焚香燭紙錢其下灼根多枯牛王殿古栢亦然屢經禁之不可止尤堪痛憾

龍多山志

牛王殿外二巨柏對立蔽日棲雲圍可六尺枝梢亦向鷲臺而俯殆數百年物也又殿右瑞映門敵臺後老柏二株屈蟠堅瘦不甚高而圍可合抱與他處特異亦奇

龍多山志

土神榕在山麓萬壽場分學頭門內樹本中空可容人舊爲小龕祀土神像於中歲久東向闢一門餘筋絡包裹堅不可動其上柯葉敷榮濃陰四布較大士榕爲尤古云

龍多山志

龍遊山寺門外有碑曰羅將軍打虎處相傳明時此地荒僻樵人羅某日來伐木倦極而卧以草爲覆首則枕岩楞上睡熟虎逐一狐尋羶氣嗅而至乃不知有人鬚刺羅鼻大嚏聲甚厲虎駭而躍竟墜于岩下一銳石上腹剖腸迸出輾轉數匝遂斃羅聞砲然作聲起視其異見虎已斃呼樵侶相與荷歸賈勇于眾謂有大力能踣虎眾遂以打虎手偁之西番寇起募兵征勦帥聞羅名募入營冒打虎聲威摧鋒陷陣銳果莫當平數巨寇累功至將軍職衣錦還鄉乃自言打虎非實純盜虛聲竟歸實效此與俗傳某將虎撲身某侯虎變形同一威靈謂此虎爲羅將星也可

州仕隱齋大爵筆○森楷案清代鄉官無羅姓爲將軍者唯明末有州人羅大爵官至四川總兵官鎮成都崇禎十九年死獻賊之

合川縣志卷六十八 叢譚

三

難例謚節愍崇祀鄉賢此或大爵微時之軼事與大爵本志有傳在闕訪下

李壯敏歿時凡手澤所存天恩所賜者珍奇不勝紀今訪故舊而問之多蕩佚無存惟李化堂有五色錦滿漢字誥封軸一坐像眞容一臺坪李敦厚有腰刀一新衙李順誥珍藏印一顆棋一副云是御賜者華鸞溝李春魁寶蓄轎刀一陳家膠房亦祕有戰像眞容一然化堂敦厚順誥春魁暨膠房所處者非其後皆壯敏兄裔也

永里采訪員熊明第投稿

苟完一名有德白沙場蓮花壩苟氏之先祖也以魁梧強幹偁有膽氣姚黃之亂合族流離獨留本境多方以自全有壺山者

俗名壺連坪馮遠村爲署日小

蓬相傳其下有穴可避世亦近世之武陵源也人多覓其處不得完一辟難四方井乃無心而得之恍若與世隔絕別有洞天不知年月不聞世事唯覓食一甍出餘時常赴穴中如是者可十所年乃稍出而問世則獻賊已平清定鼎亦久矣聞族人多在遵義卽駕小艇

案由白沙至遵義止渠河

到重慶二百餘里爲下水餘皆上水且自松坎以上水小不復通舟則無駕艇之必要而元文如此姑仍之往迎得族兄廩

生乘萬及其子金薇等以歸先未歸時白沙舊業已爲自楚來遷之僑民所有至是欲向收回苦無文據不可爭執則辭祖墓欲他適矣埽茨

披蕨之頃忽墓中有地契碑二一名意城一名熙代數雖不可知大約爲明末隆萬間所刻其墓在苟家冲四五六臺確爲其先人之壟竝證以完一脫難故事遂以聞于官官謂完一有德真名稱其實也遂斷令乘萬盡復苟家冲故業仍別插柴家溝柑子園太陽溝打箭坪碾坪山松林堡暨州城通曉橋柏樹街察院街等處爲業完一亦插蓮花壩謝家壩等處而世守焉今乘萬子孫繁衍過完一遠甚然談及往事猶不忘完一之澤也

苟汝寬投稿

王白瑜州人以拔貢官陝州州判記趙氏打虎救鄰紀異云許趙氏者江南桐城人也因歲欠隨夫移居盧氏之朱陽關關中山高嶺峻樹密林深虎豹之所出沒熊罷之所居遊者也戊子夏氏夫許子後外出家貧無以餬口攜乳子同隣婦黃牛氏往山拾麥歸至塗牛氏被虎啣去趙氏逐擊之得脫時予判陝州分駐朱陽里老上其狀余聞而異之喚氏至則廿六齡弱女也余訝而問之曰汝其有賁育之能乎何恃而不恐婦曰非然也當牛氏之初入虎口其聲甚慘氏中心不忍陡生奮忿遂拾棍追擊虎虎棄牛氏大吼跳梁而去氏遂棄懷子負牛氏以歸其

合川縣志卷六十八

叢譚

四

左足傷調治得活爾時惟知有人不知有虎惟知人之當救而竝忘虎之噬已如是而已有何能哉余聞其語而恍然悟曰噫嘻異哉趙氏其以不忍之心激而爲剛毅之氣者乎夫不忍仁也救人義也不知有虎勇也乍見之頃而三德備焉誠之動于中也誠能格物其氣常伸萬物之上宜虎之隨感而退避孔子曰仁者必有勇易曰中孚豚魚吉不信然乎而吾竊慨世之鬚眉男子平居里巷相往來靡不誇交遊談義氣似乎患難可同死生與共矣及見利則趨見害則避甚至禍患之來子焉而不顧其父弟焉而不顧其兄夫婦親戚之倫而不相顧者往往而有斯婦以巾幗弱質素無善搏之能其于鄰婦更無親戚之誼卽見虎而避亦孰議其愬然乃一時不忍之念動于不容已發于不自知僥倖萬一而卒能全軀救人所謂舍生取義無求生以害仁者不默相脗合耶以是人而與趨避者較其賢不肖何如也余嘉其心壯其行捐俸獎賞因爲記以表彰之非特不沒其善也借以勸夫世之堂堂七尺軀者

張乃孚
合州志

朱幼文布衣名宗敏佾生宗言弟也其先出宋朱子高祖文英自安徽

涇縣來川居巴縣入邑庠遷合州城內以終曾祖述原補增廣生援例
貢成均祖臨道字樓邨亦增貢生無子撫甥王氏子名一桂號涪江有
幹濟才咸豐末上守合州六策詳見鄉賢本傳後遜爲吏試得從九品
雖投身胥吏而世承清德被服造次必于儒素非風塵庸俗者流也故
幼文雖寒悴而收藏故籍頗多戊午修志任採訪員以所有華鑿山樵
詩稿味醇齋詩集岷縣志漳浦縣志及前後數十科鄉會試朱卷來投
頗資攷證別有乾隆十七年州正堂張刊刻嚴拏匪犯馬朝柱等密飭
一件四邊有粗墨線一道線外有火燄花紋蓋取火速之意首行署特
授四川重慶府合州正堂加三級紀錄五次張爲密飭嚴拏事照得楚
省咨云云以下紙質濫脫不知尙餘幾字末以須至牌者終結年上蓋
印日用朱字末行州字攷下警某字下限日銷朱署護字紙蓋騎縫印
一切與今式同惟本牌仰下不書差役名朱填初二字及行字皆刻
印則非今之所有飭內稱該犯之弟馬朝仕供稱馬朝柱帶同胞弟馬
朝貴姪馬大兒逆伴李正南_{下闕}等語但此等逆徒詭詐莫測自必改
業易相換易名姓或混跡乞丐之中九_{下闕}柱左手食指中指無名指

合川縣志卷六十八 叢譚

五

俱自幼打掉另長指甲確有實據最易查拏首逆_{下闕}爲三江總匯之
區跣捕尤須嚴密除設法徧行嚴緝外合行委拏爲此牌仰_{下闕}貌在
于所管甲內無論場市隘口以及窮鄉僻壤徧處嚴查務獲現奉憲行
諸色人等_{下闕}名者賞銀五百兩從犯一名者賞銀三百兩仍詳請優
加獎賞或以外委干把_{下闕}關逆惡非尋常人犯可比斷不容其漏網
云云則其案情重大與通常廣捕不同文係密飭則此牌非是揭示通
衢而傳行于各保甲者保甲非一故以印刷行之首云楚省咨則其犯
事不在本省馬朝柱等亦未必爲本省人而東華續錄不載其事蓋謀
逆未成者與張知州名兌和見官師表及名宦傳此飭蓋在當日甲長
手未繳者藉以攷見當日緝捕之式亦談古者所不廢也 森楷自記

朱幼文一日又持黴爛欲盡之卷冊一束來日此亦一古董也發視之
則其鄰家王氏祖遺之經單簿一齋壇證盟簿一經單簿者俗人于親
死後延僧或火居道士來家奉佛設壇念經拜懺以超度亡魂名曰登
山道場小祥如之曰周年道場禪祭如之曰除靈道場每道場畢其掌
壇者例有經單簿一本載明經懺若干竝敘述死者生卒年月及孝眷

等姓名小家無譜往往以此代之亦禮失而求諸野也此經單簿爲明月里四新八甲三岔溝人王之德弟兄超薦其母劉氏者子孫名後有酬議夫主王國安名則其父尙存也國安名後題其壻李正賢次乃題其姪王之堯等而其姪孫王明珽等名乃躐在國安前殊不可以究詰中有虎兒一名與小米同蓋偶然闖合非必是詩書能風雅者也又有姪媳尚氏則尚之在吾合姓亦舊矣首署皇覺齋壇中署乾隆元年十二月初六日仗僧于家末署沙門臣普禎款式略與今同惟今署覺皇寶壇爲異其追薦諸人如王仁壽法名福壽妻張氏法名福足伯母朱氏法名慧相姑漣王氏德仙則不知是何法名也其齋壇簿則雍正三年十二月九年十二月兩次內偁三年一慶則六年當有齋壇而其簿亡矣簿首署元皇淮南院爲酬願植福迎祥事中署太上三五功祭酒經神霄執法仙卿原誤作先須九年署改雷霆諸司府院拷轄三界不正鬼神行便宜科事凡昧原誤作妹小臣張法開稽首頓首俯拜上言後偁信士香主王國安長男王之德次男王之文竝有妻某某三男醴保四男五十則未讀書無派名止小字行也同兄王國泰男王之堯之舞之臣妻某

合川縣志卷六十八

叢譚

六

某蓋非當家人故不主香與後有青詞一道以四六文序述其事在通不通之間疑俗巫照錄藍本而又譌者也九年齋壇簿首署太清淮南元皇院酬恩慶賽集福迎祥意較三年署表多太清二字而侈元皇于淮南下去爲字改願爲恩改植爲集改事爲意加慶賽二字青詞首係四字者八句與前文異無太上云云亦不署掌壇師名而逕偁臣今奏大清國云云香主國安名後有三男王之富名則已上學矣四男五兒與五十之音近而誤非有異也中有桃源寶山三家香火趙侯聖主羅公伍通盟王陰司陰曹仙娘列列神聖爲前簿所無末署正者張德開全銜與前同而多道號陽成及花押非前所有豈婆婆迎神者流亦有文家避熟法與今慶壇如故事而齋壇簿乃無所聞矣亦世道升降之一端也

森楷自記

曾受一字正萬號靜安廣東東安縣舉人乾隆三十四年自江津縣知縣升署合州坐事降調舊志官師表有受一名籍而不載其政蹟已據國朝耆獻彙徵所載吳應達曾公別傳張維屏東安縣志補列受一于名宦傳觀其著有尊聞錄學古錄易說春秋解義四書解義琪縣志江

津縣志等書意必根柢深厚詞條蔚美之儒及昨遊釣魚山見立有受一創建功德祠碑一通文雖不爲佳尚不失先民矩矱卽錄入圖經以存掌故其楹聯云宗社沈厓海宋祚之斬幾何年臣力竭矣順時以全宋室遺民詎曰心忘故主兵戈聚蜀墨魚爛而亡知無日天可回哉抗疏而極魚城赤子終之功藉賢兄餽飭斷續音節毫無殆不足以副其名矣款署乾隆己丑正三十四年署州事時也

森楷自記

麻柳坪上場口有尹姓坐房頗宏敞父老相傳其地舊爲醮房嘉慶七年七月教匪自江北東陽鎮上竄至麻柳坪場適場人唐氏娶婦讌客未散賊盡拘其婦女于空房放火燒殺之而煮數十小兒于醮房之地甑待熟以飼馬未及熟復竄數日場人稍稍聚始發見其事則熟且爛矣兒時每聞父老談及其說未嘗不心悸也其醮房相沿百年不改至光緒末始爲尹姓所有然知其事者稀矣舊志亦載及之而言不詳因補錄焉

編纂員李昌運口述森楷附記

劉長源孝廉名觀瀚鄉賢仕欽子也以諸生應嘉慶十五年庚午科鄉試題紙初下含毫構思艱澀已甚至巳午間猶不能成一字倦而假寐

合川縣志卷六十八

叢譚

七

見一髯翁與談恂心爲豁然既醒文思勃發三藝一揮而就遂以中式初不知其所以然後歸拜客至西隱寺入廟散步覩廟中文昌像與所夢髯翁酷肖始悟爲神祐因題果有神助四字扁以酬之今寺日就荒扁亦不知所在矣按西隱寺在麻柳坪山內去錫匠岩不遠文昌之祀本屬不經後又以埒于梓潼帝君則揉襍天神人鬼而一之尤爲荒誕而明清以來士子率以其司祿籍桂籍而致媚焉禮臣無識請列于中祀瀆禮之尤莫此爲甚袁黃彭紹升等又從而鋪張其靈異以相煽惑劉長源事亦其一也蓋長源名父之子雖登乙榜與乃翁埒其文學聲名則下敬齋數等以望實論殊不克肖西隱寺神何取而助之且既助之何不竟令其長年績學遂承門業顧乃中道殞歿竟墜家聲神功不繼何賴于其初之助之也則謂神爲德不卒亦宜此與儒林外史記某舉人之說相類彼爲笑話此幾成故事矣因辭而闢之如此

東里採訪員投稿森楷附記

嘉慶時合州有富家素信風水說遠方來一地師延至家爲之卜穴住數月禮貌衰以下客待之食以草具間一茹暈而已雇一小童作工佃戶子也日爲地師具盥沐進煙茶肫摯無懈地師在富家地得一吉穴

以待己薄又見富家行事多刻削不仁不合受善地喜童殷勤欲授之詢知童有老母所居室去吉地近隱謂之曰爾母異日下世可討主人地葬之穴在爾屋左卽土角洗牛蕩是也前有尖峰對之立向得矣此地不出大貴可發富數萬金謹記勿揚言地師住數日託言無地辭去剛一載童之母卒乞主人地初不允再三懇求言不敢葬熟土乞屋側水蕩葬之足矣主人許之童如地師囑辱乾蕩水納棺其中磊一墳無人知爲佳穴越數年童學貿易往來負販方弱冠發家數千金迄今田連萬畝富甲一州子孫僅采芹食餼無上達者復請風鑑家相之果發富地也無大貴氣如地師言

仕隱齋涉筆

道光末州學博李雲字旦卿性貪而淫不堪師範孝廉劉謙齋夫子作狀稟之曰李爲道旁之李難望成蹊雲是巫山之雲只知行雨夢裏猶呼旦旦師道何存枕邊常喚卿卿家風可想詞甚工雅一稟了官家君祭旱魃文有句云身不滿夫三尺行地如風面常向夫九霄立時止雨今人猶稱之

同上

川督某與某觀察同學友也觀察家富與督有小隙督故達書私撥萬

金以難之觀察知其意欲覆一書頗難措詞經多手不得當記室某撰詞曰鮑讓管金千古傳爲美談未聞管仲相齊之後而猶分金于鮑叔也一笑督得書遂罷著墨不多于官階交際兩不相背真妙筆也重慶府某太守兩次履任值大夫人與夫人生辰僚屬上賀稟有句云瞻福星之移曜來去去來喜寶婺之聯輝慶重重慶太守賞其確切

同上

吾州先輩某到重慶府應院試寓人家內家有少婦美而豔某少年挑撻見婦出必目逆送睛灼灼不轉瞬婦室近厠側一日與夫鬪口含憤入室立掩其扉某不知情以爲入作女紅也託便近厠暗以指破窗紙側目窺之見婦縊牀柱兩目緊閉舌尖出唇矣大驚急呼主人破門救之某亦隨入代爲解繩暗屈右手二指扭婦兩頰及解下復以左手乘勢扭之肌理細膩滑如凝脂頗愜心情隨灌熱湯呻吟而醒及試期主人辦筵席爲之餞場酬其勞也榜發得入邑庠遞覆試文無疵中寫破體數字其學使爲潘香門待士嚴厲當發落時呼某前謂文頗清折字之點畫大不斟酌不懲之不知警也命房書責掌十下某出右手受責剛五下學使曰右爲寫字手不可重責復責左手五下盈其數焉若故

爲虐弄少婦而戒斥者某出謂友曰鬼神不可欺吾以救命功得入泮復以狎褻罪責其左右手報施稱量點滴不差天道之巧如此嗣後某愈檢束言動不苟恂恂成佳士焉同上

咸豐初元合州來一人共偁劉神仙不知何地人自言家住巴縣不碣也年近五旬頽身白皙微有髭鬚衣履鮮美食用開廓假仙術籠絡人劉之言曰仙道不外人情享受極華美珠宮玉堂雲裳霓帔麟鳳胎娠童姪女皆分內事吾道傳自金闕玉仙一旦功成當有十萬仙官三千玉女駕五雲車迎歸大羅天上消受無限福澤不似枯禪野道高卧岩壑專講清修苦行作山澤野仙也故其教以鋪張靡麗爲主入教者不禁葷酒不斷嫖賭洋煙富家子喜從之遊先進贄銀若干兩言作陰隲事代修功德實供淫賭費也每年斂金祀神在純陽山白華山等廟作正月上九九月下九兩會屆期徒眾麇至辦葷素華筵素用頂高蜜餞葷用山珍海味與三牲等物隨供隨徹同享饌品大嚼雄餐如神之饜飫也起訖五六日每日飭徒靜坐一時唸經三兩卷經皆口授非尋常梵莢仙笈謂唸經可懺百惡靜坐調息可補終年虛耗精氣作會時習

之過此無所不可至散會之前夕復大設供儀酬天上表中用豕鬻一方蒸極爛熟繫列神案師徒長跪案前誦經時許突起散髮執劍登案狂呼以爲神降口吐神諭鄙俚如山謳中雜恍惚語故示神奇以非世俗之所知也手捧鬻肉大啗一氣噉盡三五觔皆可下咽食畢神去仍下案叩首作送神狀偕徒眾起皆謂食肉過多贊其綽有仙術以外無他長也平日宿娼聚賭師徒同局師之費皆捐于徒且爭奉之恐不得當糜多錢不惜也後值曹逆擾州劉率徒眾遷避簸箕岩岩適賊過釣魚山去岩近砦人震恐劉惟焚香灑水仗劍巡城他無所辦幸賊未至劉又矜誇神使賊去其不撲砦皆己力也眾愈尊之歷數年徒眾多病死漸菲薄其教劉知難持久妄言今歲大疫當作無遮會禳之屬徒眾募多金悉納劉橐一夜不知所之徒眾猶謂仙去人誚之曰仙中亦有拐子乎予謂八仙之李鐵拐別偁拐仙殆其人歟一笑同上

咸豐五年夏四月初七間橋場外十里鞠家坪鄉民鞠世應家有小讌會既散矣惡勾楊雞公喻狗狗向乞其餘世應故佃農酒食本不豐而有妻向氏年四十餘子代元子婦秦氏竝二十餘女新姑十許歲一家

五口餽餘方歉遂無以予囚者二囚怒去次夕有盜入室世應父子警覺與盜鬪皆爲所殺向秦姑婦實見之明日團鄰來向秦竝指盜爲二囚而盜故棲場口事連鄉約王高廷高廷思不免亟縱二囚去走商所識刑書陳世倫世倫以盜殺案重不獲盜則官有處分例所謂三參四參也而盜既去不可得不如指爲姦殺卽官無責任約保等亦可不過問然非出自盜口萬不足成定讞乃言于知州榮慶謂案有別情須少緩其獄俟緝獲二囚得其真相始能上聞否則于官前途不利榮慶本旗人尤鵬突信以爲然遂于驗屍後停案勿訊而遣健役四出久之得喻狗狗歸高廷世倫教狗狗供向氏與楊雞公有私欲因向以通秦而秦則先私其族叔佃主鞠世元之第四子代昌兩情方濃不遂所欲楊已戀戀又適乞食不給益引爲大憾是夜與狗狗謀將藉盜而強姦之狗狗不從雞公持刃相迫乃不得已而行既至則代昌飲于其家團鬪狎褻如家人狀雞公怒不可遏遽持刃大呼而入格鬥有聲狗狗膽怯遁去其後世應父子以被殺聞狗狗實未在场不知誰下手誰加功也云云則罪名在楊雞公及鞠代昌二人狗狗可以免議狗狗如其教上

堂確鑿言之榮慶謂其近理而向氏秦氏堅執喻與楊同盜其夫與子之死賞係一與一敵方扭成兩團時不知其誰爲誰及徒手者被刺仆地盜起而遁月光中髣髴辨爲喻與楊非他人也至所供各節則一字不承謂是空中樓閣絕無影響榮慶怒各榜笞數百新姑雖稚女不豫事亦不得免然血肉狼藉卒無一言蓋鞠氏雖寒素而向則舊家故不肯自誣服以污點家門也其堂兄廩生向徵麟尤矜哀之聞團鄰唐元奎人偁四麻子有強直名就問其詳得高廷世倫教供狀心大動遽約元奎及族人監生向周麟化麟等赴省鳴冤總督批飭臬司提訊臬司曹某初發讞局調審供如州曹自訊之亦然遂不得要領仍發州監候通緝楊雞公到案證明定罪而罷然僅徵麟以部冊有名又係向氏近親未褫革不加罪向氏秦氏新姑及周麟化麟元奎皆受掠千數周麟且以杖創死自餘乃幾斃復甦天也血肉之軀非同金石桔解千里往返旬月猶得生還無恙命也州人由此輿論沸騰作爲謠諑彼此相傳云合州一朵雲

州人讀榮與雲同音謂榮慶也

盜殺問姦情若要此案明須殺陳世倫

則眾人欲平翻之久矣未幾黃宗漢來督川以明察名向氏之族兄監

生向秀甫復領銜上控督批委員守提解省親訊先是州屬自夏至秋不雨及省委員來七間橋士庶聞奔城求洗冤者日有數十百人且言委主時例僱知州爲州主能雪此獄天必降雨以應委員見其情切亦又他有所聞因亦誓眾曰苟知有冤而不申者有如日眾聞之謹呼以去明日果大雨如注信乎天人之機感應不爽與及抵省例先赴臬司投報是日值黃宗漢外謁某官返過臬署輿前忽有黃蜂數十飛繞不去宗漢疑有異遽謁臬司見堂下有囚婦數輩皆鵠形鳩面慘無人色問之則鞠向氏姑婦及女新姑也宗漢命帶督署去一訊得其真情猶未卽定斷適合州廣捕楊雞公者亦解到命隔別審之得供如向氏言與喻狗狗所說無一語符乃奏革榮慶職發往新置效力贖罪陳世倫喻楊二盜斬立決王高廷斬監候前後問官十七員承審不實分別議罪有差世倫聞命服毒死照例戮屍王高廷斃于獄唐元奎特獎公正不屈四字扁額旌之向秀甫徵麟等亦各聯語獎勵州人大悅參汪康年莊諧選錄

杜紹凱紀事

咸豐乙卯科合州問乩中式幾名乩言今科所中觀榜自知皆謂觀榜

合川縣志卷六十八 叢譚

十一

何須神示笑神之不告也榜發中劉肇觀張中榜二人湊合之巧如此州拔貢蔡器亨放誕風流向乩問名神怒曰爾是惡人當挖爾心何必問名蔡大懼勉強入場得中亞魁乃悟惡去心爲亞神殆怒中寓喜也

仕隱齋涉筆

徐子明茂才名光昭

家世清貧年七十矣猶充任小沔溪兩等學校國文

教員民國七年予以采訪事過之談及張忠壯公事蹟自東華續錄所載各節已經登錄外不識本里耆舊亦頗有知其事者否子明自承爲忠壯內姪婿家藏有其訃文一首早經霉蝕幸抄有副本因取觀之其文序官由小而大與見行之官訃先大後小者不同又略拊有事蹟頗似履歷殊與常訃不類疑忠壯生時無暇問及文墨死難以後幕友星散送柩來川者多係粗官旣不知有官訃體式只習見履歷手本因卽其前後功伐依次序之忠壯族人無宦學事師者能相駁正遂照錄一通而不知其不合也然轉藉此得以加入本傳較爲核實所謂因顰而美者與今錄其詞曰不孝男本固罪孽深重弗自殞滅禍延顯考皇清誥封建威將軍原任廣西提督世襲騎都尉子謚忠壯張公璧田痛于咸

豐十一年十月二十日卯時在浙江省城侯潮門外陣亡距生於道光五年九月初四日申時享年三十七歲祖籍湖北世居四川重慶府合州明東里渭子溪場咸豐元年由四川重慶右營馬兵奉命出師廣西勦捕會匪是年于永安州軍營得功拔補重慶左營額外嗣補中營外委右營把總調補夔州協把總松潘中營千總欽賜藍翎提升貴州銅仁協守備調補四川川北中營守備隨升保安營都司湖南永安鎮右營遊擊欽賜勇巴圖魯廣東雷州營參將廣東三江口協副將欽加總兵銜欽賜金牌二面小刀一把簡補甘肅巴理坤鎮總兵欽命代辦江北軍務調補甘肅肅州總統欽加提督銜記名提名提督欽命總統浙江諸軍務欽賜黃馬褂騎都尉世職欽差督辦浙江軍務總統江南諸軍欽命廣西提督軍門欽差幫辦江南軍務欽差幫辦浙江軍務欽差大臣自咸豐元年出師廣西轉戰湖南湖北江西安徽江南江蘇浙江等省在浙歷勦二年之久傷痕徧體咸豐十一年七月十五日復在嚴州軍營腿受槍痕數處九月內傷病增劇十月就醫杭州之文家堰探報省城危殆裏瘡力疾僅挑有奮勇隊千名駛援背水成營十月十

二日胸旁受槍子傷幸未落腔昕夕督隊不遺餘力十九日左腿受中斤餘大炮子傷骨斷筋二十日卯時陣亡先靈航海抵渝謹遵例定于三月十八日奉柩入城暫停公寓擇吉于四月初一日家祭十四日展奠次日親扶靈柩回合祖塋側就殯恭候諭旨安葬凡屬寅年族友戚誼是期先臨指示禮儀歿存均沾哀此訃聞孤子張本固泣血叩護喪大功服弟知連拭淚叩大功服姪遇春遇貴拭淚叩小功服姪遇發拭淚叩司書小功服姪遇喜拭淚叩文連款式凡七百餘字都無疑義唯欽差幫辦江南軍務攷東華續錄是接和春之任直是督辦非幫辦也當時輿論必欲曾文正督故特奪諸張忠壯手而予之若是幫辦則于事無礙雖無潰兵之奏可矣不知訃文何以作幫辦疑當以東華續錄爲是此不可据又忠壯大功服知連大功服姪遇春其父親問賢其祖顧某曾祖口某與遂甯御書樓張氏字派相同疑卽其族中之一支但不諗其何時來合耳今其遺族尙有存者會當訪而詢之森楷記

吾州有富翁華某習日者術代人改易門戶趨吉避凶擇期安牀云可種子時或有驗年近六旬家饒而貪復以仙道惑人云得真人祕授進

門者先定贄儀然後傳道虛聲四達門徒甚眾予于州寓遇之見其頭
禿齒豁枯瘦如柴以爲身不自度焉能度人已不遑其道矣因叩術所
自來故祕不宣予詭言請業者翁引至靜室乃軒眉抵掌而言曰我少
習神峰命理性好遠遊中年多病居家調養去家不遠有小廟無住持
鎮日扃戶早晚啟關焚香而已一日有道士挂搭其中骨相清瘦鬚髯
修然晝則沿村托鉢夜棲此有日矣我散步至廟推扉入道者在焉坐
櫻團上目若無人焉者我知非常人向之頂禮不荅候時許道者起立
乃問居士幾時到來我言特來參訪道者言師弟有緣爾是仙童化身
汨沒塵海慧性已迷特來渡爾所謂弟子尋師難師尋弟子易也我聞
言開悟願切皈依師徐授九轉丹訣指示陰陽火候立矢言屬勿輕洩
遵訣習之覺心清體爽夙疾都消閱兩月師辭欲去我言師遊何所當
脩弟子儀略送薄脩作雲遊費師言不需他物代製衲衣一襲此地紅
蓴甚佳餽我三觔足矣我如言縫就盛山蓴一籃揀其碩大者約四五
觔浣濯送之師披衲于體手持紅蓴生吞活剝而噉脆聲震齒俄頃立
盡卽攜瘿瓢戒鏟出廟而去我埋首取蓴籃隨出送之不知所往此我

合川縣志卷六十八

叢譚

十三

仙術所由來也予嘗之曰如此行蹤洵神人也曰然問食紅蓴外有異
能乎曰無有予笑曰食紅蓴五觔便是仙人則世之能成仙者多矣翁
色變自咎失詞後見予卽避去

仕隱齋涉筆

州內一少年託名勸善戒暈茹素自謂能通仙道問其師一力夫不識
字人也問師何能曰坐三日不飲食力大能與牛鬥其教門徒先習外
功作華陀五禽俟精力充滿再講內功嚙津運氣久則氣填滿腔形質
隨化能以肉飛便證仙果問師安在曰脫化矣年幾許曰師年四十功
行已滿故尸解去予謂尸解者死之別名何知其能仙曰人死形如槁
木師之逝也尸三日不冰玉莖挺然硬如鐵焉故知爲仙問別有他奇
乎曰無他予折之曰此邪火作之一時未冷故耳此謂之仙則史記偁
以陰關車輪而行者亦可得仙矣

同上

州有潘善人者無妻子室家一孤貧人耳織屨爲業偶掘土得一石碑
頂刻獅頭俗所謂泰山石者取豎路側倡言此物靈異能療百病奠之
酒肉隨取一物如草根木皮等類歸熬飲之可起沈疴一唱百和國人
若狂香煙燭影炫煌于道潘借以斂酒米魚肉豐食飲焉久則潘亦囂

張自謂爲神憑知人吉凶所言多勸人朝山禮佛延巫送鬼如師婆說法然人愈爭趨得錢米無數呼爲潘神仙有一病者勢沈重著人問方潘言畀病者朝銀山在靈官前拜禱自愈問者曰病危矣隔山數十里乘輿往恐不利潘曰如有變我償命問者歸依教舁往至靈祖前氣脫矣家人大惱歸約多人持械到潘處撲其碑毀其廬與潘拚命經眾勸解得脫身遁自是潘無神氣逾年許食用告匱仍業履餬口焉同上

州有某甲儲積千金而吝甚戚友偁貸無許者有負販來家肩小簍所賣爲婦女用花粉等物與甲語而嘆曰惜此方無大福人有之萬金可立致甲異其言叩以故客曰事甚祕須得密室乃與子言之他不得聞也甲乃引入無人之室竝坐而問之客自言爲鄰水人向賃人地一隅自爲食鋤土得一穴中壘古甗約百餘方方一約百兩暗運入室藏于箱篋幾滿不知果爲何質但色似銀遂敲下一隅持以問之銀工工曰此古銀甗中雜鉛錫一二成須以分金沙鎔之乃可鑄成鏤錠工問是物有許多予告以一甗之重工曰此需沙一兩可得銀百兩沙來自外洋價甚昂銀十兩僅易得一兩也予詢購之何處工曰購是甚祕有友

往西洋得兩許尙餘四五錢未用可遂試之投甗爐中入沙錢許得銀五兩予恐見欺僅購販此予從購所餘沙置鐵爐等具歸驗之敲磚之隅化之得銀皆與上同而沙無幾矣綜計其磚約需沙百餘兩可得萬餘金但買沙需銀約千金非有力者不能辦欲商近地富翁恐反以擅開古窖被控則盡奪吾財故假負販攜甗出遊得可告者願共圖之今錘爐諸事都具卽敲甗鎔之銀眞當信甲大喜以爲得是財惟我有是福卽留客于家夜出銀甗四方觀之非銅非錫內蘊光采敲得一隅攬入沙融之果得銀甚眞入市兌換得上價次夜又敲一隅融之得亦然甲深信之得銀之望甚切便問何地買沙至少需銀幾何客言銀工言其友寓重慶某巷可暫購五十兩需銀五百金可得銀五千兩乃更購沙而鎔其餘君苟不吝能出是資本願相偕到渝尋得販沙者購沙歸乃由我家運甗以來假府上鎔之償君沙本外均分其利各得約千想踴躍爲之也甲許諾卽攜其子以五百金偕客至渝客往訪販沙者閱兩日歸曰得矣但賣此干禁須祕密約今晚二更後晤于某處屆時客導甲父子入深巷覓一小茶社坐待之俄果來一翁年近五旬貌豐腴

而衣華美似巨商客讓之首座言購沙事翁偁前僅販百兩已售去四十餘兩矣然非掘得窖鏹不用此買賣者皆官所不許從未輕以售人有售皆得銀對分今既必得銀對分乃可客亟辯曰非拾得金以有雲南友設銀廠需此分金託代購耳翁曰既如此今年沙價亦昂須銀二十兩始能購得一兩客曰翁念我等遠來必從廉議久之卒以十兩爲價約次夜兌交客與甲父子如約往翁先在出沙客端審久之又取身所餘沙反覆對勘無僞乃付銀偁沙懷藏歸棧客狂喜謂甲父子福真不淺置酒肉爲壽盡歡而寢歸塗中宿某市客言出訪友久不歸尋之不得次晨又徧尋之終無有父子大疑出沙視之鐵屑耳中藏一紙讀之係致甲者言若爲守財奴當罰五百金以爲貪婪戒父子嗒喪歸家視客貨所值不過數千錢取甌燒之及成灰始悟甌僅所敲一隅爲銀鑲成耳

編纂員 盧思原稿

潘鴻發定遠龍王山人家貧業織屨而性至孝侍奉孀母供養無缺隨母所欲無遠近必致之咸豐中來州華銀山朝佛過三匯壩食白橙糖而甘因購數斤歸以奉母母嗜焉一日垂罄謂鴻發曰汝糖良佳惜路遠

不常得奈何鴻發曰易耳晚飯後出至拂曉歸已得橙糖纍纍真三匯壩物也其地相距可百四十里往返近三百里不知一夜何以能去而復來母問其故則漫云不遠由是往來合州定遠間售屨得錢爲仰事費母亦安之然特好神佛之說每織屨暇或有餘錢則市燈燭香楮跪拜以致敬既行之有年矣一日淘宅後溝得楕圓石一憬然若有悟亟洗滌之石隱隱有光因以供神佛前爲度淨茶用隨取所供淨茶治人疾無新舊皆有效人聞其異踵求淨茶者日數十百人與之錢則受不與亦不强索戶屨恆滿顧益祀神佛謹長齋誦經日無虛晷不遑業屨而日用亦給嘗言夢有老人授鐵索一具拋之忽化成太極圖由此遂能知人休咎言以前過失歷歷不爽聽者爲竦或涕泣求懺悔願皈依爲弟子則亦受不辭爲治病益有驗羣遂以潘八善人偁之以其行八也潘八善人所至道爲壅森楷爲學僮時嘗遇之獅灘場擁擠不得過問之知爲潘八善人來卽亦蟻蝨人叢中往觀見所謂潘八善人者貌中人年可五十許須髮鬚髻無神仙瀟灑狀從者舁神佛多尊如世俗駕香式前供鹽茶米豆雜糖果間幾滿有求治療者輒撮茶或鹽米豆

少許予之得者皆欣欣然以爲受神賜不識究竟果如願否惜森楷齒方稚未能考驗之也後知州某聞之恐人眾滋事以善意招入署留之數十日乃遣出自是跡爲少斂後母卒廬墓三年諷經超度未嘗一刻熄香火人以爲賢服除亦竟不復來州卒年六十其從子桂芳于同治二年隨鴻發來華銀山旋住小沔溪之白花山先後往峩眉山禮普賢者九遂披剃爲僧字超凡就東里之甘露寺居焉光緒七年受戒成都之昭覺寺十年禮佛太白山年餘歸甘露寺日誦梵唄夜則入室參禪凡數十年以爲常見年七十二存

採訪員李濬源投稿森楷附記

周應瑚聘妻黃清香江北監生黃彪臣女同治壬申年十九矣將有行而應瑚卒清香過門守貞有弔靈詩二十首當時頗傳誦之清香過門二年而卒距今將五十年無復能道其詳者去年修志採訪亦不及之今其夫弟永清營業渠岸之沙灣森楷遣人問之乃以其詩稿來爲錄之如左周郎自幼結同心納采問名一諾金祇冀于歸能致詠共挑農瑟與羲琴石上三生舊有因汝南江夏結朱陳無端一陣罡風起吹折鴛鴦愁殺人三月殘花落更開周郎何事不重來招魂已遣臨卽士入

合川縣志卷六十八

叢譚

十六

地升天杜宇哀凶信傳來我自疑彼蒼果忌才如斯蓉城未必重修好詔下郎君作主持子規啼徹四更時烏亦知情爲我悲月下老人渾不解鴛鴦足下錯牽絲幼讀儒書雖不多女箴內則也相摩世間幾許裙釵女舍命多淪可奈何屈指今年十九春族親都勸再聯姻班昭女誡七篇止從一而終自古珍六月炎天斗指丁周郎百日入幽冥人間莫覓還魂草灑淚湘江獨弔靈庶見衣兮出繡幃無違未戒淚雙揮爺孃亦自重生女示我周行與子歸天貺初過鬱奠香登堂擁拜我周郎合香一滴茅沙酒懽喜冤家覺轉傷人人都說嬪周京也是香車百輛迎郎應乘龍妾跨鳳者番騎鶴太無情鐘鼓聲說斷腸周郎何事太心狠泰山頽壞良人死落得孤燈照冷房來嫁于周對空靈琴絃誤拂倩誰聽黃泉碧落尋皆遍屈子招魂愧有經顧瞻周道我心憂祖母八旬更白頭有道曾孫何處去他生未卜此生休奠罷靈前酒一觴含悲忍淚拜姑嫜良人本是充閭器何故雒飛興不遑紅顏薄命古來瞋我弗紅顏生不辰如何待字閨中女而今已作未亡人修短從來彭與殤一坏黃土蓋文章螟蛉不見呱呱泣掃墓何人到北邙看透紅塵似夢醒

全貞續嗣勝披經冰霜苦節從茲肇要學雪梅性字馨黑田那是昆明池話到周家事亦奇寄語阿翁多著意池邊待立承桃祠哭望石頭石化身朝朝暮暮雨煙親幽冥兩隔難相見又結來生未了因詩不能工而出諸妙年女子已爲難得況又貞心早夭不表章之後益無人知之矣或者乃謂清香詩僅此二十首餘無所見此或非其手筆抑何不成人之美也

森楷記

吾州王善人者非女冠亦非優尼少嫁小沔溪王心坦之弟夫婦不協遂帶髮離家住華銀山之庵日誦觀音經呪自謂通大乘學能證佛果多收女弟子或同住或離居久之老翁少男亦往從教有陳友往問之施數金作齋供指迷途王引跪觀音座前拈香唸詞袖出利剪剪臂肉指頭大紙裹贈之語之曰和補劑煎服可驅老病是名觀音舍身救難法吾自入道來割膚救人多矣出臂示之刀瘢纍纍如魚鱗然問以玄功曰將善功作滿自有神人指點今則未也此真愚婦人之見以父母遺體供眾鬻割其爲術亦苦矣今尙聚徒多人男女錯雜防有不美事鄉人欲稟州主出示禁之未知果否

仕隱齋涉筆

合川縣志卷六十八

叢譚

十七

龍多賽會遠邇爭趨各殿中香燭紙錢拉雜焚之火光騰丈許累遺灰高於人餘燼月餘乃滅同治五年春賽會後寺僧遽命工操掬出遺灰傾寺門左古黃棟樹根下而灰猶熱更餘始訖事疲甚呼膳舉酣寢矣無何晨雞競唱天欲就曙忽巨火燒空闔寺通紅羣驚而起則古樹火燎光澈天際中有蛇小大以千數攢蹙火中膏血四溢臊穢不可聞見者驚呼寺災爭來撲救而樹已仆地燼寺幸無恙先是樹歷年久中空透巔圍可五六人合抱有蛇窟其中卵育蕃滋人無敢聲張其側者久之寺內外山上下出沒無非蛇蹤自災後無復遺種僧募工拾其骨瘞之四五人竟日不能盡

龍多山志

鷲臺寺大殿階級間有瑞煙之異天久晴欲雨則砌縫中有煙出篆空一縷上裊檐端風微颺之俄雲霧晝晦瀰漫封山與龍洞霧相應卽雨立至雨久欲晴亦然皆屢驗不爽也

同上

東巖龍洞中有霧可占候與鷲臺煙相應而皆入於飛仙洞雍正中作八景者目之曰黃龍吐霧陋哉

同上

歲甲午重九余偕諸同人遊州西濮巖寺載菊酒作登高故事寺巖間

古刻最夥余撙而集之無遺者既而飲酒賦詩樂甚偶話及龍多山頂作中秋之遊及門姪蘭蓀者進言曰龍多尤有異者今中秋次日忽有山羊二出寺側棘叢中不知所自至人逐之其一忽不見一慌竄投西北意將出太平門墜危巖下立斃于是肉者皮者角者瓜分而去蘭蓀獲皮尺許故親知所餉遺者毛淺而色蒼嗅之羶臊不可言余曰有是哉山非荒僻而夷獸忽至非佳兆也舉座憮然因不樂而歸同上

合州魏學博矢口成趣州牧沈公上下齒俱脫只餘一齒共飲時談及之魏贊曰公真達尊也詢其故魏曰孟子言天下有達尊三齒一是也沈賞其言趣酌一杯酒飲之魏曰當飲三杯天下有達尊三爵是也觸

類連引絕好談鋒仕隱齋涉筆○森楷案沈爲蕪湖子雄先生名芝英譜乃不能舉其姓名今據此補列然其名則忘之矣

田仙像刻馮仙像右俗呼二仙傳道未有明州人李作舟新勒跋語誤以田爲明時人余案何師亮詩曰相逢尋二老明月照寒泉亮於淳熙中令赤水爾日已有二老之目可知李說之不經鑄二仙像額上標題曰馮老子語田老子語見文徵志合志謬署名曰劉士達竝于田語中

合川縣志卷六十八叢譚

十八

刪去長字證以石本其舛誣若此又馮仙像左肩上近有妄人刊已所作且以光緒紀年余以其尤狂悖也亟削去之龍多山志

婦女以節烈見已爲不幸朝廷旌之邑乘家譜載之誠爲義所當然而前清有年限寡居須在三十歲以下守節生存須在三十歲以上已沒則以六年爲限過此或不及此者均不得旌所以示限制杜冒濫也今縣志所登列女邦媛一依此例行之而間有不合格者則刪除之不概收登所以昭示慎重然婦女受壓制久無以自見一經採訪宜若可自見矣而又格于例將來不幸忽焉沒矣有子孫而昌盛當然待後修志之日如例採訪以進設無子孫或有子孫而零落不能自達此等潛德幽光豈不湮沒無傳鄙意常志而還女士見偁道者不及士之百一豈闕然遂絕哉大凡坐此故耳今鑒其弊特于譜傳而外舉貞烈諸婦女之不合例者最錄于此以備遺忘一永里張興瀛之妻李氏原不載地名爲李蓉沛之女張恩溥之媳十六嫁十九孀無子與陳景清妻秦全貞等立保坤祠奉佛終身法名守貞現年二十七歲一西里錢塘鎮王第襄幼聘蕭雙榮之妹守貞爲妻民國七年定期婚配前一月而第襄沒守

貞聞之自請過門弔孝至則不復言歸堅求代夫事親其翁采堂乃憑眾與當堂抱子其事遂定現年二十二歲

西里屈瑤瓊訪稿

說文子子無左手也人多以爲嚮壁虛造羌無故實而孰知不然民國七年七月二十二日縣北城外高石礮朱家巷外有一丐右手六指無左手驗其肩無刀傷創痕問之則綏定李氏生而無之許氏之說乃信

興里訪稿

楊良根字嘉樹天星橋人以醫理堪輿術名于州城尤長于符錄聞得之銅梁陳少虞以魔鬼及催生尤靈光緒三十二年西城左宗禹家有山魃爲祟延良根往施治符呪甫焚卽聞有金戈鐵馬聲若戰鬪者其崇遂除後戈子遷戈聘之家皆有此患聞宗禹事有驗皆延治之亦應手效有李玉興妻病顛十餘年往問能爲力否良根云可卽與俱往治以符水丸藥數日而愈王一山之父病痢已危請良根爲卜地旣已得之歸見病狀言尙可爲因以針灸進一治而知再治而已遂豁然由是聲名大噪病者盈門森楷聞其兼長大衍奇門六壬等術爲人卜筮無不應驗且通三略六韜陰符素書太元經等非世俗求食者會當過訪

合川縣志卷六十八

叢譚

十九

一談以證之及余孫婦病癩特往訪其家彼不肯來豈其本領旣大心計轉粗不復能唱渭城與亦異矣

粟鴻猷訪稿森楷附記

李時雍明經

名昌運

世居牛鼻峽外之麻柳坪場著有磨子沱老二記一篇雖遊戲之作無心爲文而盡相窮形幾於然犀照怪且有辦匪之法

皆中肯要錄而存之亦見非秦無人吾謀適不用也其記云四川以水名內水匯涪渠嘉陵三江於合之會江門外至牛鼻峽一束峽門磨子沱山石沙粗而堅可作磨故名甚荒落居人業石灰業炭記者世居麻柳坪隔江里許曩時習見習聞今行旅相戒而言曰得活不得活要過磨子沱何令人之恐畏一至於此則似快槍之聲逐江而來兩岸吼聞老二來也慨自民國成立大同胞二字誤盡少年狂嫖浪賭以二十萬錢一兩之禁物日嗜兩許幾錢不等不給則老二之世界一新嘗采團局供詳灾民報告老二名目有老窑有老板有內外管事自呼曰票子呼有錢人曰肥猪又曰紳士呼軍人曰扒殼彼此自謂兩相詡曰對紅心所最惡者爲賣客其不法行爲有四掃窑基謂進屋也批路板謂攔劫也清底底謂搶船也拉小孩謂之抱童子拉婦女謂之接觀音總名曰

摸薑公然謬謂出差外管事督匪行曰搖匪團立中設祭一焚紙錢繞一周謂辦陰陽交涉囑謹細或不囑報名一如軍隊各執洋油竹筒塞稻草至時發紅羣呼開旺些要路派人防守爲堵水到門時亂呼拏進去如一羣冤鬼尋人索命有塗花面或不塗亦不一致姦搜鈔殺門以內也門外有曰駝生資負戴亦曰馬兒備票子帶花聽遣直待團隣驚救大呼水漲始去沿路礮聲滅息大呼擡平一字立報名如初立繳贓有不現者清出立斃之駝生捆載聽管事瓜分有差謂端高矮墩散花場而以老窰老板內外管事送財神終批路板清底倣此拉肥豬則鎖暗室或深洞用膏藥貼雙目繩索紮手夜半引疾走呼過礮過溝過渡咫尺千里最後桎梏之羅守之看棧事也迫令亟告所親某處有耗需銀若干許贖不滿所欲或瘦死或數月數年羈或令上道出幫差大抵拉搯之舉皆由近奸其人呼爲點主官嗟嗟民國以來遭此荼毒禿毫難罄豐於財而慳吝者近是壟斷獨登者近是吾邑然不獨吾邑爲然吾蜀然不獨吾蜀爲然磨子沱云乎哉執斯獄者曰諱匪容匪縱匪朋匪攷峽中劫船自民國二年二月二十鯉拐灘始延及磨子沱自是

年六月始後則問日計連日計以彌月計乙卯七月丙辰十一月丁巳十二月舉如是每遲明由南岸來南岸居民先受其災由北岸來北岸居民先受其災快鎗制其出入勒供飲食舟至快鎗竝發死不免一一艤岸脅各水手負貨去不足又災及居人負戴稍有遺失及挫折等事則羣以爲賣客百口莫辯大則殞命小則被拉被劫不勝紀夫負戴寢食峽人均所不免律以諱匪容匪縱匪朋匪固宜所不解者峽中團練自峽防營成立範圍以廣東里葛家岩成軍尤爲首屈一指老二至今通認爲王止敬兵士無讓手歷年芟除團局公署營隊及自相殘賊約數千級老二越殺越多則何以故蓋嘗論之天爲磨子沱關一幅災區老二利于江蜀則多江老二利于峽蜀則多峽然而巫峽壁立老二去來不便大江寬廣老二炮火無功磨子沱固東西南北老二羣奉爲英雄用武之地也本岸上游有礦山梁子下游有猴子石對岸上游有隔蚤孔下游有磨刀溪皆石梁爲之障上達秦隴蜀東西北山貨必由下達武漢廣洋廣貨運赴省垣秦隴較外江捷兩岸山勢蜿蜒一通銅梁大足壁山巴縣而有葫蘆灘茨竹溝可住可宿竝可消贓一通鄰水岳

池廣安江北而有甌子壩華銀山太和場其場雖不能消藏亦可住宿上距合川五十里下距重慶百四十里重慶至北碚一站下船由合川曉發上船由北碚曉發遇於磨子沱每日均在午前九鐘十鐘匪探合川有挾重貲下行匪由陸路召匪少二十里行程探重慶有挾重貲上行乘夜宿北碚時間走報無不及附近三場如麻柳坪老鴉溪鳳凰溪皆係夾兩山中一面臨水兵家大忌向來不敢駐防江至此一束大似桃花潭水深千尺非急流可勇退江廣七十丈有奇舟行無可避其不可爲一也天爲磨子沱生一種壞人天下未亂蜀先亂天下旣治蜀後治固已然路事不生老二必不如是烈老二者哥老之餘孽也夫竭全川財力不能成川漢鐵路律以鐵路仍歸國有可見當日路事之非而同志會一召驅全川子弟入哥老隱伏老二之根同志會解以糊塗攫團局槍枝有老二器械以哥老聯地方子弟有老二爪牙成則搶州奪縣人人懷督軍總統思想窮蹙亦有編製希望老二何樂而不爲況古時以名馭天下變法後以利動天下好名容有勉爲君子懷利則將甘爲小人是故取利之大者有大老二焉取利之小者有小老二焉蜀鹽

濟食滇黔蜀楚每年富榮公局徵收七百四十萬兩硬護送輒護送尙不在數內正稅副稅名目不一其利爲天下所必爭爭則以招撫老二爲長策爭無已日老二卽無已日此不可爲二也天爲磨子沱結一段孽緣記者路事追悼聯云快心事不多逢拚一腔熱血灑向河山尸祝自應傳奕世明眼人當熟視撫瘡痍滿目急需雨露領權何以慰幽魂爲民生請命也以磨子沱頻年搶劫糜瀾一至於此國家豈不念及無如峽地分屬江巴壁合惟合最近餘皆百餘里各縣練勇百人二百人全縣賴之且不常駐峽分縣而治不能立決勢非獨立一營不可初王道尹委王錫五防峽由黃角樹招丁一營各場共招一營統編防峽營礮船二隻巡游上下有擒送道署立決時以此款出草街子豬釐縣紳出而撓之東里葛家岩成軍議於磨子沱對岸高絕處築行營駐兵以扼磨子沱而永里人又阻之甲寅清鄉有袁氏之變丁巳清鄉有省城之變各縣聯軍以及陸軍屢有清鄉之舉往往爲天雨沮至如某軍官一人一槍隨身一卒由麻柳坪上行遇對岸數十匪軍官隱身石後戰一小時乃去勇甚又軍船上駛猝遇匪盡駭內有七士從藥雲彈兩中

渡河登山扼匪歸路七槍竝舉匪死稱是壯甚又軍乘小舟至石盤嘴七匪据河一匪立岩楞呼灣船聲未了中礮死復縛七匪斃于市快甚凡此軍人無緣再遇又如乙卯六月某乘紗船聞警問老板爲誰答曰扁擔花問管事爲誰答曰九在手某出所謂公口匪不承刀傷某劫快鎗四桿及滿船洋紗以去舟人報團局甚悉苦無如何越三日忽有大隊宿鹽井溪是夕捉二十四匪分別斃十六匪丁巳十一月遠近戒嚴二十六夜有販禁物偷渡老二不知也先是有老二從重慶探知趕至下面劫去禁物逾時舟至上面老二下河舟人白曰貨物盡數被搜上下老二戰死三十餘匪奇緣又不多遇此不可爲三也宜乎商場損失下貨如口菜山藥白蠟伏耳銀耳纜絲牛羊皮鹽米油酒上貨如海味白糖疋頭洋貨洋紗洋油玩具銅磁以及上下銀信過客銀件計數百萬金大獄之興某家食息某船渡濟某等挑運受害纍纍然猶曰懦試言強者大隊下游鎗聲自辰至午老二不少貶駐防自渝而反迂道不成隊伍護送倒戈匪追十餘里至有繳鎗枝被扣留伏地乞哀甚則殞命近出一種辦法逕向老二面說船幾隻銀幾百元皆軍人也然猶曰

等請試言尊者省長回籍或逞其後團長奉差先待於隘縣知事沈至敢於開槍吳知事胞弟敢於槍斃而死官威損矣所幸吾鄉煤炭外別無出產齷齪富族早已避城丙辰四月十六夜劫場後聞每人分錢三百六十文鄉居陸續被劫數十家亦無甚錢不足供其一擲俗云老鼠不咬空倉我輩清貧安知非福顧亦第就戊午以前云耳戊午己未老二踞於下峽暨涪陵豐萬等縣搶劫等是庚申夏間滇軍黔軍踞川起豐川軍忿之議欲逐出境外老二或僞招討或假游擊司令時有出沒洎滇黔大敗潰出老二公然爲害鄉里而磨子沱仍然如戊午以前自虬門上至鹽井溪日有衛生藤轎皮鞍騾馬湖縐大旗整箱子彈人則排長連長營長團長軍需軍醫兵則下士中士上士號夫馬夫火夫礮則快火連槽洋擡機關等類厭厭不絕屯集於磨子沱兩岸如麻柳坪等處已十倍於戊午以前矣至則號召團甲索草索被索雞索鴨索酒肉一或不周放肆搜搶或拘留團甲百般毒虐此地居人無不被其灾者河下過往船隻上下搜括如秦關百二厯厯可指一索再索三索脫衣解帶剝落淨盡始能出走在太易之占曰或錫之鞶帶終朝三褫之

今則不錫之而褫之且無人不占之矣不以過客力夫舟子及近地貧民而或異焉聞著名巨匪磁器羅漢之婦下渝自謂我何如人買舟東下及至峽口喪其行李喪其資斧其婦吐哺我係某人之婦弟兄不當如是老二復行上船脫去皮衣皮褲嗒然而去其他剝落之人難更僕數也通計十月以後一冬無一人完全無失過此峽者于是重慶通商馬頭合川繁盛口案有某師護送貨船名目大張告示設局徵收估定價價值百抽二給票過關爲硬護送又有輒護送著名老二亦於重慶合川仿某師值百抽二之例謂我隊抵關交涉較硬護送尤爲可靠商船又從而徵之可憐一般商家既扯硬護送又扯輒護送只冀無災無難清靜過關行至土沱猶有待直至大隊起行號令森嚴仍視各船運氣船行峽口彼此交鬩不以某師可以懾服不以某人少有讓手二岩防營周寶珍奉劉二師召集士卒躍躍欲試十月十五日帶隊至麻柳坪見匪勢不盛努力攻打辰巳二時驅匪四散自謂我軍奮勇可以一戰殊知老二分作無數戰線俄而上下兜圍峽防圍困在中當斃軍士六人帶傷無數全軍大敗哭天無門哭地無路幸臨河岸小船齊赴登時載去不成隊伍經此一番挫折無一軍一旅敢至峽口麻柳坪場居民纍纍成壯丁男率皆奔集縣城其餘婦女亦乘黑夜潛逃在縣或乘大軍過境卽行出走或由山路匍匐避之如喪家犬如漏網魚百分苦處不堪言狀家中房屋器具苦於不能搬運留人看守一經遠去相距只四十里之遙兩地睽違不相聞問或著人探聽率又被拉被劫言之痛心老二猶申言此地炭有號盃有廠率皆成千累萬至兩岸居民皆殷實我軍駐此竝未搜搶明春將遷駐某處此地當籌餉銀四千元否則臨去惟有一炬同爲灰燼無如地瘠民貧寓縣諸君習聞此語付之不議不論聽其延燒而已庚申除夕人人不能歸家先人墳墓祖宗祭祀爲之一嘆越年正月十五重慶大隊護送船隻三百餘號過峽蓋自腊月初旬齊至土沱兵強火硬老二自知不敵亦因路斷人稀本地搜括已盡食用維艱老二久有去志此行故未接火二月我團練公局調集全縣團練一行十四二師分駐沙溪廟鹽井溪麻柳坪草街子四場磨子沱老二始悉數散去雖然由磨子沱而上涪江隸潼南嘉陵隸李渡渠江隸廣安以下皆磨子沱也由磨子沱而下近若溫湯觀音等峽

遠若涪陵酆萬等縣無處不磨子沱也老二之多將如何而後可無已則清鄉之說是取十家互結無匪甘結自新切結以鄉清鄉詎不謂然究之百萬軍餉屢次虛糜老二不過伏處數月遠竄數月清鄉限滿老二依然老二竊謂清鄉斷斷以革去繳械投誠爲第一義一代改革殺氣必除此輩之不容於世實上應天心也嚴飭招討各隊一律歸營違者殺勿論嚴禁各路招撫向公署團局指要某人認爲撫軍違者跟究慎選不昧天良耐勞員弁密布各縣調查某地有無匪類無枉無漏一呈報省署存記按名分飭各縣轉飭保甲辦到結案不限時日不拘生死總以匪除結案始卸地方責任隱匿准各場攻訐一經攻發或公署察實與匪同罪嚴飭地方團甲認真辦理混淆黑白殺無赦然後大舉清鄉先從繁盛地方清釐臨時傭工小貿投宿諸來歷不明之人窩匪者同斬把守要隘不許遺漏一匪糜爛地段督各縣守備進勦勿鬆如此則拒捕不可遠竄不可伏處不可混跡稠人亦不可清鄉日期有盡清鄉政策無盡老二庶有盡乎天道甚遠非人所知記者老矣念昔之磨子沱如彼今之磨子沱如此不識後之磨子沱何如勉副在鄉言

鄉之誼所謂言者無罪聞者足戒嗚呼亦文字之災也

縣屬水陸交通騙人之局早線水線層出不窮稍一不慎立墮其術青年子弟夢夢無知假充精伶尤爲可危早線有丟包一局一長路人在前忙迫行於僻靜道路故失一包後一濫人拾之包內有信一函投交某公館或某字號皆大名鼎鼎隨信高麗人參若干分兩或天生黃若干裝璜備極華麗或包內紋銀一大錠濫人拾此不勝狂喜故予人見及見與共見者曰此等貴重之物失者必轉向索取我濫人不能隱此物你如要此但給我一頓飽飯喫卽已了事及見者認許則曰正路人參值銀若干換頭天生黃也要若干換頭價甚昂貴縱係撿的亦非若干換頭不可現在忙迫你竟付我若干錢文下餘之錢俟今夜定更時在街上某處補我未始不可但不失信逼見者隨身錢文傾囊以助濫人則一去不返所謂人參天生黃皆僞藥一錢不值如係紋銀一大錠則曰撿者見者均須平分祇此一定不能分破不如合錢若干串銀交你手付我若干錢文你現在有好多餘俟今晚在某處等我補足但要盟誓在先方表人心如晚間不來你便如何如何待盟誓訖現錢付後

又命脫下衣服鋪地下取石取土雜銀包之牢繫在臂以石土雜之防失者轉尋央人搜索也且囑其尋小路歸無令人見彼亦芒芒然去去如黃鶴一去不返矣有賣別貨者曰賣草紙在場市僻靜地方等行人謂頃在場市抓得白布一疋或藍布一疋包裹嚴密批錢若干比之市上便易多了過錢交布囑急走恐跟至也及至家取布視之不折開尤可開之僅有布二尺五寸餘則草蓆一卷紙殼一卷而已有賣水糖者大約五斤一包外面紙殼水糖浸滿現眼處露出水糖批錢若干過手時急走回家折視僅露處水糖二兩餘則泥土有賣喫鹽者亦用紙殼包裹大約五斤其現眼處亦有淨鹽幾兩餘則沙塊又賣釵環首飾遇鄉中半老村嫗能說會講的彼則自謂適場後檢得你老人家可有小姑娘小媳婦此物定用得著我們行路之人檢此無用批錢若干總之比銀匠鋪內便易多了過錢以後回家視之此銅也非銀也此旱線之愈出愈新也

水線之局有名批包者大約五六人爲局假冒收猪毛者有皮篋有稱有白猪毛一束可數十莖預占小船中艙

此不一定或冒充商人總以有皮篋預占中艙爲要

美衣服者有長行者有單寒者先後至視船有挑篋有銀有錢過客即便開船此數人坐落暫與過客皮篋相近行若干里可下手處此輩談地談天使人妄聽或取戲書鋪篋蓋朋頭聚首唱豔曲亂人耳目或出所佩玩具裝有西洋鏡者鏡中男女裸卧女翹一足或出木雕香袋雕工極巧所謂貓兒思春有貓兒作思春狀女像難乎爲情極狎極褻出者談之津津故爲嚙語繪聲繪色使人難乎爲情急欲傳觀而鄉愚少年爲甚其單寒小兒先卧篋側時而搔瘡時而翻身行所無事挾資之人戀戀玩意忘其所在亦終不計挾有重資行也事畢美衣服者若始見單寒卧在已下怒其蚤蝨成羣逼使起且唾罵不已欲另趕一船憤而上岸美衣服者已挾贓物去矣眾客隨去單寒小兒亦結隊去所未去者惟挾資之人及過客等逮攏馬頭開錢上岸挾資之人始識所挾重資不脛而走無翼而飛亦可怪已曩于場市拏獲此輩言之最晰又有大幫亦遭此騙騙局盜取大幫銀若干封先備僞銀若干以鵝卵石作幾封入包篋易之起岸猶不覺焉此局常弔綫在同路者也亦有卒然失事者記壯歲住東川書院江北某姓家人送銀二錠到院僅於打

漁灣過對河失去銀二錠到院稟主人某爲院長徐太史高足立召蕭貴卽捕總蕭二麻子清詢登時拏獲是役也眼疾手疾藉非太史聲色某之白鏹幾何不化爲烏有嘗問之行旅老風塵者挾有重資東西在何處人卽看守此處遇有不識之人挨此下坐招呼離遠點坐此爲第一警細以後隨時留心眼不亂觀可杜此弊又包篋必有號索坐船時安放包篋號索但取號穩不必十分捆緊此輩下手捆索越緊則包篋越無聲息鬆則按篋有聲而篋蓋上冒矣此爲批包人大忌

水線有賭博者亦以四五人成局下水則會于西里雲門鎮來里渭沱場以及縣城會江門外上水則會峽中或草街子麻柳坪以及近城之東津沱僱舟以待熟計過客遇有暴出門及愚而自用假充精伶者但捆載多資卽約入船漸至諸客齊集忽有少年後至此名口袋謂裝風也既入始

開船少年綴冠履而綢衫袴負重資不自檢點故使人見語言極無倫次談嫖談賭時帶幾分傻氣艙內隨覓空處卧去少焉鼾聲大作客有鄙薄之者此名歇木匠謂亂逗也此子少出門語云財不露白出門人要事事謹慎此子亮家屋惟恐人不知其有錢今天幸遇好人如遇壞人見財起

合川縣志卷六十八 叢譚

二十六

意怕不能爲己有忽有一客此名鈎手卽上手也謂舟中悶人太甚安得謀一消遣之法破此寂寥歐木匠乃出賭具曰酒席場中每以色子搖西廂一和尚二尼姑三張生四紅娘五庵六廟某大老爺著我買色子回以行酒令惜船中無酒不能行此鈎手借而觀之乃曰既有此具何不呼少年醒共一賭我輩亦得分其餘潤此錢不取毋乃太愚或用深一層寫法又曰汝具則似也汝能必此色必出六出五乎予自某處得異人傳授每出必五必六又出而試之果然不誤乃共促少年醒以寶官推尊謂如此好睡得毋夢襄王雲雨耶寶吏站齊候官坐堂少年略一轉側仍睡去眾又促之少年拭目視眾人你們商量振我否眾曰無之于是推少年爲寶官搖十出頭兩顆色子十點不贏十一點十二點贏九點以下皆輸少年若不甚了然者遂入賭局鈎手乃串某某同賭或不願意則串與打夥每寶必贏必均分謂某該分好多最後一寶少年既搖而寶眾故遲遲落注少年急欲小解眾人讓至後艙小解鈎手乘其不覺開寶蓋一看明明十二點在內仍蓋之無聲眾客傾囊以助少年至見賭最豪故訝其多故不揭且謂汝輩不過逢場作戲竝非拚家屋

況我去小解不知汝輩揭看與否眾亦矢誓再三未經揭看且有寶例不揭亦須賠半少年氣憤若爲理屈自分儘其所有不得已揭開則祇有兩點眾客皆輸索及某將錢賠完仍不足鈎手復謂賠後再賭包你贏轉此不過暫記彼處而已逼錢過手少年上岸眾客亦陸續上岸此局船戶必知欲究其人自船戶始

有大用之者名曰到脫靴騙在二百金三百四百五百爲得體素知其人爲紳糧有門第苦於手事不活動然一意謀之數百金猶可致也東逐西馳注意發蹟朝日營謀者是偶於他州外縣遇其人或竟密約在他州外縣遇之茶話談心備極親熱問其寓所來此有何貴幹能否寬住幾日不時過從嘗相問候此卽所謂歐木匠也然後出鈎手與紳糧同寓住宿此人亦係騙局主人供給費用任便驅使皆不滯手人亦風塵中人上知天文下知地理九流三教無所不通巧能觀人顏色卽善體貼人之心事講結納而歐木匠又爲二人作合益加親密零用不分彼此暇則談天某某以俊秀爲官某某以行伍列爵俠氣爲郭爲解義烈爲鮑爲陳暗暗約爲金蘭情投意合彼此家事皆共聞知然後出口

袋來同寓貴公子氣息冒鄰封大家某某之子擁數十萬巨資窮奢極欲驕傲滿假海賭海嫖隨帶一人常不得意每因小事動行扑責旁觀悉爲不平僕人自言自語謂先主人屢代富厚偏偏生此現世寶驕養又最甚家中糊行妄爲因此命我同行意在行監坐守而乖僻任性事如此使人難堪若非老主人面怕不立見其敗也其人少所與可惟鈎手曲意結識得不棄亦嘗與共談論竝由鈎手引紳糧與壽頭接洽自是紳糧鈎手每有言論鈎手輒慎密不吐及再三跟問則曰機事不密則害成予之慎密予之謀事乃余也問其謀則曰予走江湖半天下從未遇此壽頭今祖宗有靈遇此人家擁多金而又有此氣習此天賜也於是密商爲振空子之計謂此惟你惟我二人知之除你我外雖家中婦人不使聞知若有一語漏洩天誅地滅取此等盟誓在先然後出色子平心鑽空內貫水銀任便擲搖只出五出六兩方其餘一二三四雖有其點從不見其定點此色三顆定點是十五十六十七十八如彼壓到十五十六十七十八則寶蓋小孔度耗子筋一經撥轉則皆小點三四五六七八矣出以授某易知易能天下事無如此者故使操手法

使練極熟安排振此壽頭幾千兩後到北京捐分發得好缺升官發財然後還鄉在本縣做何等善事懺悔生平之過少時好嫖代過不少存此好心天不加禍改過之人豈不美哉紳糧於是急急欲行鈎手故以熟極巧生遲之又遲催詢至再至三乃與壽頭約壽頭權然允許轉商及同事諸人約某日同遊埭城之某花園至日壽頭帶巨資入賭讓某爲寶官竝不客氣紳糧素手空手上坐而官壓到則扯耗子筋壓不到則不扯局局皆贏約輸二三十兩正得手處忽壽頭從人引某處跟人來見謂某處請小宴立等同行現有肩輿在此壽頭謂眾賭友曰今日對不住有要事不能終局請改日再賭但須亮稍勿似此虛柄也忽忽去於是算帳通計贏得若干歸寓瓜分每人有分鬧酒宿娼不勝狂喜謂彼蒼玉成有似此者閱數日忽思前賭之豪惜無亮稍語云小財不出大財不入謀及紳糧苦想方非數百金不可紳糧到此深知此藝精熟百發百中竭力拚掣謀得現銀總以二百爲限越多越好其謀財之方雖至親密友嬌妻等類不使聞知一點信息謀財訖乃約壽頭重入賭場壽頭負銀一千至轉問寶官稍幾許謂現有巨金若干于是壽頭

壓小面則不扯而寶官贏了壓大面則寶官扯耗子筋而寶官又贏如前日壽頭氣憤壓千兩仍是大面寶官扯耗子筋如故而此寶獨不靈寶官輸了鈎手歐木匠同事諸人一齊落魄當賠好多除現贏百餘金竝連日拚掣外尙欠若干無賠壽頭立地要銀鈎手從中取襯謂現賠若干下欠之數寫立欠約當書某人欠到某字號內紋銀幾百兩整其銀準於某月如數付給有某人承耽等語立欠約是實本人親筆交約後鈎手取寶盒試之所謂耗子筋者千用千靈萬用萬靈疑紳糧當日未經扯翻故也紳糧自是疑惑不定後央入賭壽頭仍壓寶官仍贏約幾十兩壽頭忽拂然曰無錢搖空寶延誤時光我不慣此寶吏算帳算帳後壽頭輸項準於欠約內批明當收過銀幾十兩整批明後執約去紳糧人等落魄回寓鈎手曰如此大財君竟失去豈不可惜我輩謀此進身用若干小錢當盡衣物湊成此數方冀成此好事君竟得而復失懸梁投河勒逼不少休息而所謂紳糧者忍氣吞聲不知其爲騙局偃旗息鼓回家憂悶而已此局名耗子筋其名亦不一定有名抓攤有名月裏盜桃千言萬語總之不出賭之一字予先大人有至友謝某以同

治初保游府入京就職至山東遇此赤手回又至仍遇此猶不識爲騙局後乃聞稔匪之禍嘗謂昌運曰汝等日後出門凡事謹慎至出外接人勿論知與不知總以不貪爲寶無謂我輩算計某人殊不知同一人也彼能算計人安知不算計我乎嘗以謝某事爲昌運言予自列庠後聞有張友達三失去銀二百兩控歐木匠何姓不案予爲訪鈎手則曰張實自戾無怪也始以耗子筋賭渠謂予聞李某云云後賭以抓攤渠竟不知事已至此我縣只分兩股餘盡外縣及本縣差役所謂七股分紅每股分不及三十兩均已用去還渠欠約不至在別縣興訟所以報也不然任從肇訟後竟至爲訟累所謂失財不足惜哉數十年後聞同里李某亦遭此失喪數百金

有佯爲遼東人賣醫賣藥而行騙術者予游泮之明年患咳血閱十年愈甚近市里許每歸必小憩艱於步履如此夜就枕務成寐否則竟夕不眠心搖搖如縣旌卧榻近立壁朝視之有痰有血跡可更僕數也是年庚寅館於江北周通常豁然家服藥百劑不愈十一月二十有八日爲先曾祖考生辰先期歸舊事是日凡爲之後者祭於祠祭畢羣飲於

執事者之家適三叔祖家值年三房子姓咸在焉少間有二客突至負藥囊執小鼓其聲冬冬歌唱以代語言自謂賣醫者男病視髮一莖女病視釵一事觸予所患出小帽視之醫者曰我觀君家外五行紅光滿面原無病究竟用心過度吐血病根深醫便好能斷根祇要三百三十有九文因求治法云用鍼夫病無所取丸藥不能消除以鍼鍼之爲用載之五音集韻一書因慨然就之醫者索沸水一杯於藥囊出一瓶挑藥末少許淡紅色入水兩指尖入水擒一捻成丸極堅極實三挑成三丸索雄雞一尾用鐵籤穿其喉下卧地然後囓予解胸前鈕扣縮手入胸中反後衣爲前坐凳上使背心露出取咂筒吸肺腧穴去筒然後囓子咳嗽一聲再嗽三嗽仍吸咂筒出鍼示予謂貴恙必用鍼灸然須本人意願不願不强視其鍼銳甚又粗甚未答復曰吾子亦知乎予業鍼而三矣維時弟輩姪輩及叔輩站予後者舉無人色强者乃問曰子不苦乎予始服醫者之技之神醫者去咂筒吸痰盈盈傾於地吸而三終有黑血鋪地圓徑三寸許囓著衣如常服三丸卽前之和而成者遂終了拔雄雞鍼放地下走紅豆啄餘鸚鵡粒自若也適嬸氏劉出釵以示

醫曰能醫亦須開鍼予曲爲勸駕知無所苦慨然出坐凳上囑解衣扣如故和丸如故用草紙一張浸溼就溼處糊蓋雙目囑嗽如故予從旁立觀醫者鍼長五寸滿刺心窩者三予不覺失聲曰異哉乎技醫者曰愈矣從此當生育明年熊羆入兆須謝我童子請入席族人羅坐予陪醫者坐詰予胡不飲予曰因病斷飲年餘矣固謂不妨因共樂焉席間絮語始知初到敝市寓高陞店彭姓約明日造訪盡懽而散予歸卽眠去一夜風流覺不知東方之既白起視唾無血跡如乍膺九錫爲之狂喜飯後到館去家十五里信步去不憇息又如大羅天上自在游行不知人世有捫蘿攀藤之苦到館與豁然道醫者之異且曰家君常抱薪憂擬接回就醫治與豁然訂後約得閒祈來我家摒擋一切解館歸隨至寓挽醫者駕爲先君恙也會先君由州返醫者時至及豁然賁臨予曰今能分予之憂矣請曰醫者之技予固深知之但家君年屆五旬且嗜好煙不小子若也子爲醫者言之可鍼則用鍼工不則勿鍼慎旃慎旃藉子以達之勿致兩失也敢請豁然敬告之時醫者與豁然卧榻吸煙醫者起謂此誠勿可虞者曰痛乎曰不痛執豁然手隨以煙簽刺

手而穿而豁然不覺於是乃力勸醫調又明日爲先君鍼灸服丸較多竝飲以牛黃謂係自來者價莫與京自相識以後時住我家時出外出外必邀予同行子亦樂觀其行術到處爲之說項故予與醫者交甚密一日晚間其居停主人彭高陞爲夜宴招予陪醫者彭兩世孀居母年七十媳年近五十問何故則曰子與醫者厚老母抱病請子代達予曰此易易耳何必費則曰自渠投店予知爲醫者請治老母言之再三不承不識何嫌予曰諾旣入坐首爲言之不承如故徹席告之切切竟不應聲漏三下促予歸醫者送予出棧猶見老母在堂圍爐枯坐呻吟作病狀臨別突曰此老不可以一日存矣予爲之一笑而去予私自計曰每恨今之醫者小有病痛輒重大其詞使人怖畏先生之習氣何深哉抵家先君未睡以歸告面之且稟曰醫者行有日矣前日所議謝金已先預備不識大人病狀或留渠與否先君曰予病舌根絕冷兩脇有兩包大者不動小者時動自醫者用丸用藥舌根不冷兩脇不動者動動者無矣今年節伊邇豈能久留所有謝金自當預辦先君亦感謝不已高陞棧事因歷歷爲先君陳之相與叱異旋命就寢明日破曉人云高

陞棧老母逝矣益服醫者後醫者去予贈曰先生周姓大鵬名幼從鮑雷諸大營以軍醫得名性喜浪遊不慣宦場拘束以醫道行楚蜀間嘗負藥囊執小鼓場鄉市鎮多游跡焉病者遇之多奇效云云醫者既去客有言於予曰子爲醫者騙矣是亦吞刀吐火之流所吸之痰皆所自帶予竊以爲不然同行月餘其鍼其筒幾經詳審非可僞爲惟所治之病有應手而效有治而不效其治法亦大抵相同奏效則不嘗聞其能於喉下并前心後心小腹四處用鍼自謂絕技攻鍼灸穴道有一百零八鍼之說彼是猶未能也病在是是以奏效病不在是伊亦如彼何以此謂騙夫孰不然去後歷訪其人至今幸不遇編纂員李昌運稿以上談故

馮遠村先生箸述甚多自刊行之晴雲山房文集紅椒山房筆記二種之外予童子時見有人刊其片雲草堂詩話及聊齋評語共成一小冊今不復見矣陳紫石維瑛女夫昨乃出其伯父虛齋所錄壺山詩話一冊相餉大致與片雲草堂詩話略彷彿或卽一書而名小異也今摘錄之如左

森楷記

初學用韻所以不穩者總由先成上句然後對下句不管題之是否祇

合川縣志卷六十八 叢譚

三十一

徒將所讀之詩恍惚相似之句扯來潦草了事既巧妙才思故事全無又不解參以活法往往牽強不能成句試于每拈一題時先將題影一眼審定作何鋪排胸中有打算卽將韻本合看一過想韻中某字與本題有情先將韻腳一句想過大概然後將兩句排比成聯則無不穩之弊矣落腳故事平日卻要多記

壺山詩話

押韻是詩家取勝處實押不必言矣如酷暑能消處處皆浣花溪上記吾曾再接再厲乃一噴一醒然黑恬一枕且其然則吾豈此虛押之妙也更有超脫者若不相連高鳥黃雲暮寒蟬碧樹秋瘦削千竿玉陰圍一畝秋是也至有押險韻而妙者如詠新月限兒字詠雞冠花限霜字詠蛺蝶限船字詠針限羹字又詠雞冠花限魚字詠梅花限牛字詠茶限腸字此類甚多能多說故事解用引韻法則亦不難矣其實平常熟讀最難押寇萊公池上柳限青字五押不倒釋蕙崇池上鷺限明字四押不倒此中消息惟箇人中知之

同上

初學作詩每前後顛倒凌亂無次東扯西湊如同嚼蠟百病生焉由于只知文章之有布置而不知律詩之有鋪序也知文章之有破承提

比中後比結比也而不知詩亦如是試帖五言六韻是十二句首句次句是破題三句四句是承題五句六句是提比又謂之頸連七句八句是中比又謂之腹連九句十句是後比十一十二句卽謂之結比也何嘗不是一篇八比文字體裁此非臆揣而無據也蓋卽唐詩最豁解開端一首以證之同上

月中桂題 與月轉洪濛扶蘇萬古同上句明破月字而曰與月則含有桂字不然誰與也下句暗破桂字豈非破題乎根非生下土葉不墜秋風上句跟轉洪濛下句跟萬古同緊抱起處所謂承爲起而設也豈非承題乎結葢圓時足低枝缺處空二句切月寫桂分出圓缺二字來豈非提比乎影高羣木外香滿一輪中二句合寫正意實發月中之桂極力形容豈非中比乎未種丹霄日應虛白兔宮前面描寫正意已完此後翻開作轉設疑陣爲下問字伏根所謂轉爲合而設也豈非後比乎何當因羽化細得問元功此以問桂作合寓桂登科意結楚通首豈非結比乎唐詩此首已然首首皆然學者不從此悟入終身門外漢至于近人有寄嶽雲齋有正味齋庚集等詩最合時律易于摹倣試看每

合川縣志卷六十八

叢譚

三十二

題到手起句或突兀而起或兩句對起總是虛籠大意渾融全題不占題位承題將題字點清題意呈明或襯上墊下相題爲之極爲爽快以後或分寫或合寫前後層次井井有條通首不失題之步位亦不離題之重處變化從心神明在人初學倘能根柢宗先輩唐詩也依樣學時賢試帖也吟詠日久自無嚼蠟之弊下筆時應與人不同矣同上

對仗如行兵兩軍相敵不强不弱然後謂之敵對作詩亦無不然其法之妙有工對有借對有活對有不必對之對如秋風客春夢婆元遺山以此擅名他如楊升菴有山和尚水秀才之詞以及簡子平仲本朝人有草木尙生無患子男兒那作可憐蟲又錢曾分白打鼓不繫紅幺凡此皆工對也唐人根非生下土葉不墜秋風下借作夏杜工部子雲今日之句以日對雲遠村先生改秧馬詩驅來千畝徧驂去午風生借作五凡此皆借對也王摩詰詩江流天地外山色有無中天自對地有自對無謂之本句對又天地實有無虛謂之虛實對本句對如今空無古迹宋復有唐文四年三月半新筍晚花時亦然工部酒債尋常行處有人生七十古來稀以七十對尋常孟浩然江山留勝跡我輩復登臨以我

輩對江山凡此皆活對也至若清風明月綠水青山是三家邨童對法故又宜撇去板對俗對熟對而以不對爲對工部捲簾惟白水隱几亦青山佳在白字若作綠水便俗黃山谷以乳燕對白鶴佳在乳字若作紫燕便俗凡此皆對仗之妙之宜講也同上

詩貴工力悉敵如不能然甯可對句勝出句不可出句勝對句僧雪松送王陽明先生謫龍場驛丞云蠻煙瘦馬經荒驛瘴雨寒雞夢早朝上句遠竄景色猶人所能下則先生之忠愛俱見矣藝苑名言載對句勝出句者凡數聯如小婢偷紅紙嬌兒弄白髮之類不一且對句勝出句雖平常亦覺出色此等甚多不能盡舉予去年在城中與諸友詠百秋詩秋柝云因風傳遠巷敲月過疎櫺鳥夢驚先覺雞人喚欲磨皆對句勝出句也又秋蟹云何人曾冷眼公子自無腸對句極活同上

作詩至明順後出對既穩韻亦平妥當知擺脫一切熟經通套語予最愛錢香樹論詩云學詩全要放開心眼大膽做去若拘拘然惟恐失粘沾皮帶骨拖泥帶水以求成章者未之有也蓋詩兼賦興比三義隨處觸發皆有之不必贈當道則云百姓歡呼與友遊春則云柳嬌花媚謝

合川縣志卷六十八

叢譚

三十三

人留飲則云松醪不辭也能于源頭處討生活以大氣主之則歡呼花柳松醪皆爲妙語矣是在好學者深思之耳李義山詠牡丹不沾住牡丹詠李花云自明無月夜強笑欲風天詠蟬云五更疎欲斷一樹碧無情張西村詠蒲團詩云趺跏自具圓光滿方寸能容大地寬有一字粘滯否試帖則德定圃之詠梅花亦是此意又云去年四月在濮岩寺次洪悔翁聯句予有苔色漾新晴羲馭光不烈語張西村易云卯色天初晴羲馭光不烈此用新色字面之法予從之古詩云一方明月可中亭東坡云明月聊隨屋角方一方字新又山曰萬笏地曰一弓簾波月波楚雨顛風夢雨懷風雨腳雲頭樵風牧笛漁弟樵兄諸如此類字面遇見卽收貯胸中以便臨時之用同上

詩貴形容詩貴不粘不脫詩貴辨識聲調白香山詩玉容寂寞淚闌干梨花一枝春帶雨詠淚也形容入妙有形容極高渾雄健者吳季子挂劍詩縱橫三尺影生死兩人心詠琴聲云流水千岩落松風萬壑并不著一毫跡象此形容之妙也詠苔云舊雨剛三月無人又一年詠落花云明年有約休辜我昨夜無風又怨誰詠蓑衣云煙波雙鬢老風雨一

身秋詠元宵云甘白俱能受升沈總不驚詠甘蔗丞相云是長樂馬焉
知苦非讀書人終帶酸此不粘不脫之妙也

同上○森楷案蜀人謂湯
圓曰元宵縣城人亦有言

識之者
于此

有俗字用在詩中極雅者如箇字這字驢字店字叫字罵字等皆俗字
也而入詩皆妙杜老詩兩箇黃鸝鳴翠柳這回休更怨楊妃平旦東風
策蹇驢雞聲茅店月迴首叫虞舜鴛鴦占水能欺客鸚鵡嫌籠解罵人
愈俗愈雅又有詩家一種門面字如底事遮莫任教竭來格是請君試
問爲愛雅愛無邊不盡幾回管取等腔調宜極力鋤去

同上

有改換一二字入妙者偶見今人說部一人以醫詩自負或投以春郊
詩好山看滿郭新漲喜平橋醫之曰病在腰虛宜投補劑改作好山青
滿郭新漲綠平橋有以新春詩云比鄰喧蠟鼓小市試春燈醫之曰病
在骨節脫聯當以節骨膏貼兩肩添二字云纔教比鄰喧蠟鼓又看小
市試春燈有投以春日詩云葉翻新柳綠枝染小桃紅醫之曰真氣下
陷宜升提之使陽上達改云綠歸新柳葉紅上小桃枝有投春日卽事
云檻前吹拂拂簾外潤絲絲曰此兩目失明改作檻前風拂拂簾外雨

合川縣志卷六十八

叢譚

三十四

絲絲有投以舟夜詩款乃棹聲發蒼茫月色明日病在陽明太陽宜分
劈理肌改人靜棹歌發夢迴沙月明舟中夜景宛然有輓臬台聯淒涼
剩有瀧崗表冷落長間列栢臺又有投句者云綠搖煙影風前柳紅洗
胭脂雨後花曰此十二郎軟腳病也改作風梳柳雨釀花又聯云欹枕
忽聞蕉葉雨捲簾時對藕花風醫之曰中氣不足改作欹枕夢喧蕉葉
雨捲簾香沁藕花風以春燈春勝鬥春風寒食花枝姪姪紅駁之曰春
燈春勝方是春首寒食則春暮矣病在鬥春風三字太滯易太匆匆三
字以通達之又有以四六詰者中聯云咎由自取夫復誰尤事本無因
將毋是夢曰此聯淺弱曰陰陽兩虧改云毀靈龜于櫝內夫復何尤尋
覆鹿于隍中將毋是夢此雖淺近初學宜從證入可以啟發靈心

同上

詩人要有胸襟昔人云乾坤有清氣散入詩人脾故李白詩剗卻君山
好平鋪湘水流工部詩斫卻月中桂清光應更多寇萊公登華山詩云
只有天在上更無山與齊楊椒山登泰山詩心欲小天下特來登泰山
回看絕頂處猶有片雲還此是何等襟抱又有詩云一回酒渴思吞海
幾度詩狂欲上天又云酒腸寬似海詩膽大如天又有詠鷹云雲中作

戰場韓彭鼓天外此等詩豪甚然亦不失之粗至若粗而近于俗者又要別去此種古之詩人與天爲徒造化在胸雖風雲月霧寫來無非靈氣往來有第一等胸襟有第一等詩文今則頭巾氣酒肉氣市儉氣終日營營無非問舍求田數黃論白胸有萬斛塵俗不可醫尙自詡爲詩人豈非做夢同上

詩要別裁僞體雖專家不免談何容易若初學當先掃俗體予九歲時在村塾中見有人盛稱解學士詩話者卽斥爲俗後見人寫詠雪詩云鐵佛寺作銀佛寺金沙洲改玉沙洲大笑之同輩多爲不服今則寢食多年稍親風雅讀鍾鏡陵明詩註評解大紳云此公詩多俗益信前言不謬矣而兢兢以力去俗體爲學者告夫俗之類不一有俗題俗事俗句俗格俗氣惟深入者能辨之而入門時卽宜講究否則終身無與斯道矣讀杜韓義山諸家詩頗能醫俗詩有著題句劉鶴坪蛙鼓云青草亂鳴三夏雨碧塘催曉六更天是也有空際一聯沈歸愚詠蛙云塘邊波拍岸煙外草平堤是也金文淳次御製落葉韻更與遠天添空闊也隨高鳥入虛無天空海闊襟抱都見同上

合川縣志卷六十八

叢譚

三十五

袁子才詩話謂詩家躡取替身字面此最下乘然在初學則不可不知如筆曰不律墨曰龍賓紙曰雲藍硯曰玉蟾蜍門叩曰了鳥鎖曰金屈戌又曰葳蕤杯曰金叵羅又曰玉東西門釘曰獸環竹曰青士又曰綠卿草鞋曰不借瓶曰軍持酒曰紅友曰黃封曰素郎曰白墮曰青州從事杖曰扶老簞曰桃笙鎗曰梨花曰綠沈馬鞭曰馬撾酒壺曰偏提杖曰榔櫪汲酒器曰滑稽門樞曰稊稜殿角曰觚稜天曰撐犁竹曰拂影紙曰麥光曰栗尾樑上小柱曰逋峭可對滑稽驢曰秃尾風曰孟婆寺曰蘭若僧曰開土水曰鴨綠蝴蝶曰鳳子蚊曰白鳥曰豹腳橋曰狎得行曰彳亍舟曰舢舨曰鴨頭曰輕舸酒曰蘭生曰麴生屋曰蝸廬酒杯曰三雅窗曰疎櫺曰南榮屏曰罌罌竹曰筭筵車曰薄笨田器曰礪碌車鈴曰鈴鐸風鈴曰簷馬又曰鐵馬野菜曰狗腳五加皮曰金鹽鳥曰明月蟲曰黃犬犬曰黃耳奴曰崑崙婢曰赤腳水手曰三老曰長年曰榜人篙曰舟師割稻器曰腰鎌打穀器曰枷板袈裟曰水田衣僧曰白足篲衣曰襪襖蟋蟀曰王孫鳥曰披頰曰喚起曰催歸蟲曰扣頭曰應聲曰寄居馬曰飛黃曰跑空曰騾褭劍曰秋水眼曰秋水肩曰玉樓劍曰芙

蓉筆曰六寸算曰六寸筆曰三寸曰青縷此碎錦也皆宜記

偶以魚虎命對學侶中有拈鴈臣二字者予曰此可與鳩婦對有拈茄牛二字者予曰此可與秧馬對然茄牛見梅村先生物幻詩題俗事戲筆不可爲典要也有拈蟬丸二字此可與蟻蛭對以丸字對不過虎字也有拈虬龍二字者予稱之然虬係龍之無角者猶是一類究不稱魚虎二字必求敵當如蝸牛艾人蟬猴人龍木賊雪獅瓦雞卉犬石麟蜂媒雞人閱升菴有酒龍再得鴻豹工甚猪龍字亦可見開元遺事同上

學詩者當先讀裴王小詩次讀王孟五律次讀工部五律七律唐賢則取沈選唐詩別裁擇其尤佳者次取工部七古讀之以接風雅正則然後博取秦漢以下近元明諸名大家而參觀之庶有以窮詩中境界

鍊字之法有鍊第二字爲詩眼者如氣蒸雲夢澤波撼岳陽城影高羣木外香滿一輪中是也有鍊第三字者如孤燈燃客夢寒杵搗鄉愁淺灘淘落月古樹納殘星是也有鍊第四字者如古砌碑橫草陰廊畫雜苔闌前花覆地竹外鳥窺人有鍊第五字者如吳楚東南坼乾坤日夜浮寒雪梅中盡春風柳上歸有鍊兩字者如綠垂風折筍紅綻雨肥梅

合川縣志卷六十八

叢譚

三十六

竹疎煙補密梅瘦雪添肥星垂平野闊月湧大江流草枯鴈眼疾雪盡馬蹄輕月落江湖白潮來天地青皆鍊字之佳者同上

瞿昆胡曰作詩不外情景二字情景兼到者爲上偏到者次之兼到如路從今夜白月是故鄉明是也情到如長疑卽見面翻致久無書是也景到如日華川上動風光草際浮是也景中寓情如流水心不競雲在意俱遲是也情中寓景如捲簾惟白水隱几亦青山是也情景相觸而不分者如感時花濺淚恨別鳥驚心一句情一句景如白首多年病秋天昨夜涼是也或一聯情或一聯景或四句皆情或六句皆景者故曰融情于景物之中托思于風雲之表同上

腰眼用實字方健如星河秋一雁砧杵夜千家古均碑橫草陰廊畫雜苔雲行星隱見浪疊月光芒實字用得健同上

眼用響字如白沙留月色綠竹助秋聲芹泥隨燕嘴花蕊上蜂鬚窗風枯硯水山雨慢琴聲楊柳疏煙碧茶蘼架雪香輕風拂楊柳淡月失梅花暖日薰楊柳濃陰醉海棠虛字用得響同上

詩有子母句更漏有無風順逆紙窗明暗月高低回風吹巷涼偏勁圓

月窺窗影欲方曉荷重映晚秋草碧于春是也詩有純用虛字如使乎
吾語汝白也近如何人事重意氣功名夫豈徒當代不飲酒虛名安在
哉詩有本句對法如今空無古迹宋復有唐文四年三月半新筍晚花
時江流天地外山色有無中詩有隔句對法如一百五日節吟花醉柳
春二十四橋夜吹簫玩月人同上

五言句或上二下三或下二上三或上四下一俱有自然之節同上

起句宜冠冕雄渾不作小家語大抵用排者多如大江流日夜客心悲
未央人謂工于發端唐人則地道巴陵北天山弱水東閭闔連雲起岩
廊拂露開老杜萬壑樹參天千山響杜鵑昔聞洞庭水今上岳陽樓王
維則風勁角弓鳴將軍獵渭城何等氣魄同上

唐人句法有新句小桃初謝後燕子恰來時微月初三夜新蟬第一聲
是也有高句無瑕高似玉至潔過于冰是也有經史句山如仁者壽風
似聖之清是也有自在句如共看今夜月獨作異鄉人是也有十字成
句如累將心上事相與夢中論是也有流水句法海內存知己天涯若
比鄰是也同上

合川縣志卷六十八叢譚

三十七

余常愛杜詩兩邊山水合終夜子規啼又明初人詩數家茅屋臨江水
一路松風响杜鵑蜀江風景宛然在目王漁洋句嘉陵驛路千餘里處
處春山叫畫眉予有句云萬樹蟬聲過遂甯皆眼前實境也同上

用事不可著跡只使影子有熟事隱用僻事顯用死事活用如九日龍
山落帽事工部化作兩句用羞將短髮還吹帽笑倩旁人爲正冠邱爲
送人下第歸省云休將和氏淚灑向老萊衣兩事用來天然若忘其爲
用事此唐人秘訣也後來東坡用事亦妙同上

壬戌禮闈報罷與江安楊工部少白同歸于邯鄲車中論詩少白言中
秋在魯給事蘭枝宅詠梨限雞字用孔融讓梨故事而以儒爲雞廉事
牽合之魯公稱其自然其詩不復記此亦用詩之法也又於襄樊舟中
偶論及音學予曰蜀人于屋無字讀成一音何也少白曰川東人聲較
輕清故入聲多讀作平川南人音重濁四聲較覺分明君試將無輕讀
屋重讀則兩音自不相混予考字書屋烏谷切音劇無微夫切音吾相
去甚遠轉音之變非本音混也趙秋谷謂鄉音殊費洵汰信哉同上

杜詩句法上一字下四字者行舟詩青惜峰巒過黃知橘柚來有上二

字下三字者晚涼看洗馬森木亂鳴蟬有上三字下二字者夜郎溪日暖白帝峽風寒有上四字下一字者風連西極動月過北庭寒有一句作三折看者塵中老盡力歲晚病傷心峽雲籠樹小湖日落船明有上一下六字者松浮欲盡不盡雲江動將崩未崩石有上二下五字者朝罷香煙攜滿袖詩成珠玉任揮毫有上三下四字者漁人網集寒潭下估客舟隨反照來有上四下三字者香飄合殿春風轉花覆千官淑景移有上五下二字者五更鼓角聲悲壯三峽星河影動搖有一句作三折者盤餐市遠無兼味樽酒家貧只舊醅含風翠壁孤雲細背日丹楓萬木稠同上

杜詩字法有用仍字者山雨尊仍在是重過何氏也秋月仍圓夜是十七夜月也蟻浮仍臘味是正月初三日也有用一字者乾坤一腐儒天地一沙鷗于天地乾坤之中下此一字寫其孤也寫其微茫也有用不肯字者江平不肯流若流而實不流者緩之至也秋天不肯明應明而故不明者望之至也有用受字者吹面受和風受之而喜也輕燕受風斜受之不能也修竹不受暑暑不能入也有用雙字者襯出上下字也

合川縣志卷六十八

叢譚

三十八

如野日荒荒白荒荒無色也正寫白江流泯泯清泯泯無聲也正寫其清有點一字而神理俱出者國破山河在在則興廢可悲城傾草木深深則蒼蔚滿目矣如碧委牆隅草委字不言雨而雨字見霜倒半池蓮倒字不言秋而秋深矣用一字切而物畢肖者如雨行秦樹直直字方是秦中之樹萬點蜀山尖尖字方是蜀中之山如細動迎風燕細字寫燕竝寫大江中之燕輕搖逐浪鷗搖字寫鷗竝寫急流中之鷗同上

丁治棠孝廉述其父雲邨先生勉門人勤學句云掃盡紅塵雲萬里探殘青簡月三更詠書室句云修竹翠浮堂上畫飛花紅點案頭書題聯云月亦愛文偏照字風何好學亂翻書題丙寅春聯云丙穴魚從春暖躍寅邱鶴向月明歸皆過庭時所見者仕隱齋涉筆

湘潭王壬秋師五經皆有箋注所著湘綺樓詩文集海內珍爲拱璧幼時吟句云西風吹吟魂墮爲江上葉名士鄧彌之莫友芝見其句遂與訂交來川主尊經書院集句題院聯云考四海而爲雋緯羣龍之所經尊德樂義見于世經天緯地謂之文題院額云洙泗岷峨戲拈二書名題書局聯云江漢炳靈集岷峨覽勝編亦入妙草堂三賢祠祀杜公陸

放翁黃山谷師題聯云自許詩成風兩驚將平生硬語愁吟開作宋賢
兩派莫言地僻經過少看此日寒泉配食遠同吳郡三高代提督莫組
紳題兩湖公所聯云少年裘馬錦江遊喜整頓重來秋稻屢豐兵氣靜
高會簪纓華屋敞願英賢繼起甘棠留蔭後人看同上

州孝廉張西村先生有句云半江春水綠于酒一片夕陽紅過山拔貢
彭金沙先生詠紅梅云留得精神歸雪屋想教生意在春山貢生禹澗
江紅梅句云流水不隨紅葉去空山曾伴赤松來廩生萬棗峰句云溪
聲暗惹雲歸寺竹影斜拖月上樓貢生陳遂菴送人從軍云百萬軍中
鞭著祖十三篇後法推孫又落第自嘲云空餘草稿三場在業已花銀
十兩開送友人遊泮第一聯云桂攀秋月大垂手芹采春風小狀頭貢
生蔡懷東夏月乘舟下渝七古起聯云盛夏乘風波浪陡一舟不動千
峰走雲煙過眼便成空數聯好詩猶在口張懸圃同年題瑞山洞云鎮
日清涼宜遣暑他年著述此藏書州城外純陽山有寺俯瞰三江朱虎
臣貢生題額云江天一覽門聯城郭鏡中三水繞樓臺天半一峰高酷
有此境同上

合川縣志卷六十八

叢譚

三十九

夏介臣登釣魚山句云遺垣廢堞英雄恨宿雨初晴松栢香皆吾州遺
句可收錦囊予游峩眉山至萬年寺碑刻律詩中聯云僧從流水聲中
出客自亂山缺處來上鑽天坡予得句云鑽天坡盡是青天峩山更出
青天外俯視塵海雲雷低仰觀鴻濛星月大友謂道得高山景象出來
巴縣孝廉張顯理工詠史詠武侯云勁敵何妨生仲達知心可惜死周
郎詠岳少保云詎有金牌出宰相恨無鐵器鑄書生尙論不落恆蹊幕
客王某詠戰場云寶刀渴飲骷髏血戰鬼驚聞鼓角聲少公子易某過
夔峽云風雲蛇鳥三分國星斗魚龍一寸天述懷云落拓史遷牛馬走
飄零杜甫鳳凰饑銅梁廩生白小裴句云全家轉徙搬薑鼠一第艱難
上竹魚又雨後郊行見女郎一路行踪有感題律句聯云知是回家是
各家樣痕端整不多差兩行瑣碎翔飛燕數點輕勻散落花壁山任生
樂三句云死愁姓字埋青塚生怕文章誤白頭有人哭友云鬼亦非才
君誤死天如悔禍爾重生孝廉易某從軍卽景云洞裡人家無白晝營
中天色近黃昏恰是亂離景象儀隴令伍公介康山行絕句云松枝作
架竹爲扉雞犬桑麻隱翠微山上夕陽山下路一肩紅葉女樵歸又萬

山重疊水參差一綫危橋亂石支林下野禽相剝啄見人飛上最高枝
女樵句可入川北山家圖畫儀隴令朱公佩韓留別律句云人嗤官舍
如僧靜我愧輿情頌佛慈又弱羽翩翩辭燕壘初心脈脈在山泉想見
廉明高尚襟懷儀隴典吏富建侯詩人也登金城山觀音閣句云出岫
孤飛雲一片振衣直上閣三層又萬里鄉心開夕照四山秋色擁晴霞
喜雨云天教一雨蘇枯槁開盡秋畦吉貝花儀隴刑幕朱詠梅詠洋煙
句云茶罷酒闌知己榻花晨月夕校書樓空際傳神的是吸煙眞境刑
幕梅兆書句云梅因索笑花開口竹爲留人葉打頭句甚尖新有友詠
蝶句云雙板拍開楊柳月一團穿破荔枝雲又面比何郎全傅粉心如
韓掾巧偷香又一律警句云世奉大名輕管樂天將殘局苦伊周譙生
竟畢三分業伯約空爲九伐謀山陰陸文杰題昭烈墓云天下無如西
蜀險古來惟有使君賢江曉帆探花弔龐士元墓云關前石磴樹萋迷
獨剔殘碑弔鳳兮早歲能邀司馬鑑大名惟與卧龍齊荒原落日招魂
去終古寒鴉向客啼一樣墓門芳草綠定軍山北惠陵西聽友誦數律
詩談鬼云幾箇文魔笑拍肩陰廊陡暗黑風旋世人半是無靈鬼陸地

誰爲有道仙毛髮任從冠裡豎骷髏都藉口頭傳自從坡老黃州後此
話寥寥七百年有隱士以八音嵌句首述懷云金紫何曾一挂懷石田
茅屋白天開絲竿釣月江頭立竹杖擔雲嶺上來匏實晚收栽藥圃土
花春長讀書臺革除一點浮名利木筆花前酒數杯漁翁詞云不慕功
名萬戶侯一絲牽動海天秋長竿子彎彎釣短短蓑衣小小舟搖動
兩三聲畫槳驚回四五箇沙鷗得魚沽酒江邊飲醉卧蘆花雪枕頭涂
某詠丐子云小橋流水帶斜曛凍雀饑烏處處聞竹杖拄殘千里月芒
鞋踏徧萬山雲空瓢長挂陶公宅冷酒頻澆漂母墳我亦揄揶遭鬼笑
昂藏磊落憶夫君某名士贈曾文正公一律云湘江宗伯歐陽子海內
龍門一代尊獨抱遺經事堯舜驕吟大句動乾坤岳池貢生陳鏡堂子
名錢齡父子名士刻有集集外有遺句鏡堂題合墓聯云白首同歸三
尺土青山猶是一家人錢齡贈劉益之云滿面痘瘢皆酒氣一生膽略
是詩心優人蕭長子工詩有句云月明燈影瘦人靜水聲粗鍊字頗精
在屏幅數絕句不知出何集題薛濤井云綠水潏洄古井香風流長憶
碧雞坊枇杷花謝吟魂渺空向高樓弔夕陽題望夫石云花愁月怨度

芳春的約歸來又未真收拾相思遙欲寄青峰江上斷行人舟行云小橋流水竹疏疏舟過時聞夜讀書姓字未知何必問料應不是俗人居渡江云紅樹離離映夕暉水天空闊雁高飛扁舟一葉輕如許載得幽人半醉歸夜景云橫笛何人夜倚樓小庭月色近中秋涼風吹倒梧桐影滿地碧雲如水流納涼云白蓮花放晚風疏淨掃竹牀卧讀書月上平塘香在水不知清夢化爲魚卽景云暖日烘開荳蔻苞檐塵飛動雀爭巢睡餘倦眼無安處閒送爐煙上竹梢詠早梅云青帝乘龍庾嶺來東風喝道怒如雷一拳擎住行春令放在百花頭上開遊仙詩云昨宵直上廣寒宮親見嫦娥控玉驄報道桂花三種色請君先折狀元紅友言同一讀書之句各有境界不同如草堂夜雨讀陰符何等沈雄梧桐陰雨讀離騷何等淒清江亭月白誦南華何等空明狼虎中間讀道經何等荒涼紅袖添香夜讀書何等綺麗絕好品評可采入詩話同上

能文之童應院試題出伯夷隘句童以天地立柱作兩大比文有警句云甲子以前有天甲子以後無天首陽之中有地首陽之外無地文成拍案叫絕誤翻墨汁將連號者文卷污壞稟學憲述拍案之由憲閱其文大獎曰此四句文爾一人入學尙有餘合污卷者入之可也一時傳爲佳話合州牧紀慎齋先生通易學州試題出易經日往則月來二句有李某文以日未往而月來月未往而日來翻騰二比先生歎爲通場所無陝中有老名宿流落入川遊一鄉塾見一童子作文爲孔子下題童作一破句云記聖人之下請陝客續下句頗難著筆客續以爲天下而下也使楚狂全章筋搖脈動非老手莫辦有童試院試題出伯達伯适句童仿詩經二句作破云伯兮伯兮邦之傑也成語天然學憲加坐圈入邑庠第一有作子產論云昔之爲政者以殺之者生之今之爲政者以生之者殺之有論君子小人云君子無才猶可爲君子小人無才斷不可爲小人又有精語云天與人相通人心卽是天命聖與王無二王道不外聖功此等語非具通博之識者不能道同上

石泉菴爲合州名剝副貢何建齋聯云頑石點頭禪門中原多妙諦清

泉洗耳塵世外亦有高人東里石佛寺議學旁有龍門洞李徽典聯云
龍門得路皆燒尾石佛聞經亦點頭何子貞學使遊峩眉山登絕頂題
聯云佛度眾生特教春夏時常雪我遊萬里才到西南第一峰學使所
書聯語句句入妙采數聯云絳樹寶多聚紫鹿丹砂泉淺種紅魚倚松
野叟閒于鶴偷果溪童捷似猿金海珠韜乘月讀肉芝牙茗撥雲收拙
于生事可無粥工乃窮人賴有詩詩詠清于新竹葉交情淡到古琴音
儀隴蔣靜軒進士春聯云處士梅香園林雪霽先生柳碧門巷春深閱
前輩所書聯語佳句甚多如三千餘年上下古八十一家文字奇李將
軍畫三神遠太史公文五岳奇太極一團天地種文章兩字性情花煙
雲是天地間一軸大畫日月爲乾坤內兩顆明珠願乘長風破萬里浪
下視齊州若九點煙斗酒縱橫廿一史瓣香供俸十三經種樹如培佳
子弟擁書權拜小諸侯雲氣升天成篆籀泉聲漱石作箏琶北海字得
嶧山碑意東坡文自華嚴經來有暇讀書非淺福無人知我卽頑仙才
子修成仙福易美人揮盡豔情難月榻留僧祈呪筍雪簑訪友爲醫詩
萬花開處松千尺羣鳥喧時鶴一聲古松奇似老名士初月媚于新嫁

娘手裁蕉葉題唐句口嚼梅花讀漢書呼龍耕煙種瑤草招鶴下雲眠
古松風聲入竹有情意月影畫松無墨痕不除階草留生意時養盆魚
活化機晚菘細切肥牛肚新筍初嘗嫩馬蹄新粟米炊魚子飯嫩冬瓜
煮鼈裙羹虎行雪地梅花五鶴立霜橋竹葉三思不來看花尋點生意
讀將倦聽鳥說些天機漱石枕流聽棋讀畫吞花卧酒握月擔風六言
如學問曾三顏四光陰禹寸陶分恭儉擗節退讓剛健篤實暉光于書
無所不讀凡物皆有可觀屈子無梅花句少陵欠海棠詩膽欲大心欲
細公生明廉生威長風破萬里浪初日照三神仙五言如放膽高銅柱
鞭心入芥舟鐵肩擔道義辣手著文章四言如心清水濁山矮人高喫
虧極妙脫俗最難岳少保廟聯云凜凜生氣悠悠蒼天丁卯歲春聯云
上丁入學小卯出耕皆名句也以外猶多佳聯題節孝坊聯云古井無
波心先身死南山有石名以節存又兒女挾英雄肝膽冰霜鍊鐵石心
腸又人間薄命聞風起天上覃恩指日來又大節在千秋以上小心撫
二代之孤相傳大節聯爲合州廩生但厚堂作華銀山僧益謙詩僧也
有集待梓岳池顧霽厓司馬贈聯云曩日傳箋曾博山林笑何時著屐

來評島佛詩岳池武靜山大令愛才如命值生辰有遠來寒士贈聯云
喜托龍門是文章知己高翔鷺序願福命如公武公厚贈之射洪太和
鎮廣寒書院山長夏某題聯云當太和翔洽之時春風滿座遊廣寒清
虛之府明月前身省城芙蓉書院聶銑敏學使題聯云芙蓉人鏡桃李
春官院中字庫聯云有價文章歸鍛鍊無痕筆墨化煙雲錦江書院聯
語皆佳揀二三聯云河嶽英靈鍾此輩國家元氣在斯文鵝湖鹿洞規
條密虎氣龍文學業新又植根抵于文林天府名材儲石室富波瀾于
學海源頭活水出岷江予主合州瑞山書院製有多聯錄數聯云本經
史爲文章能售世亦能壽世合智山成仁水是化工不是畫工又三水
當門想學海波瀾壯瀾雙榕繞屋見文林根柢盤深又平地樓臺開畫
本半天燈火落書聲又閉戶不知囂市近推窗始見讀書高又旁接濟
倉莫似曹交空食粟後連武庫當如孔子善行軍院地近武庫濟倉踞
最高處江水峽山城郭煙戶俱在望中此數聯爲州牧子雄沈公所許
可遂甯縣有佛巷巷有井爲唐時夏某盡節處井內常有霞光照耀廩
生郭某題聯云法雨擁晴霞義烈莊嚴同一相金容連玉骨神仙忠孝

不分家順慶隱仙洞有聯云僧鐘韻報寒山寺佛火光搖落月碑又一
寺聯云五光寶鏡佛雲曉百丈銅盤仙露秋二聯純以神運老鍊之極
集句有可人者如胸羅江山地可縮筆補造化天無工王壬秋自集已
句云曉風初日梳楊柳夜池清香墮芙蓉彭仲珊孝廉集句云漢口夕
陽斜度鳥梁園日暮亂飛鴉錦屏山有聯云窗中列遠岫天際識歸舟
寫景逼真予集句作喜聯云不慚弄玉騎丹鳳應逐文簫駕彩鸞粉牆
丹桂動光彩珊瑚碧樹交枝柯集門聯云鶯來占柳爲歌院燕蹴飛花
落舞筵旁人錯比楊雄宅過客難登謝眺樓鳳凰麒麟在郊藪芝蘭玉
樹生庭階數聯較穩詩聯近遊戲者亦可采賀新娘有痘癍者句云自
是君身有仙骨陽台今夜會麻姑賀買妾涉訟云聞道渡頭風浪惡桃
葉公然過江來合州有歌妓名玉鳳代友贈聯云玉指環籠新竹筍鳳
頭鞋裹牡丹芽有桂鳳者代友贈聯云桂府姮娥同搗藥鳳樓仙子共
吹簫有名玉琴者秋娘也張友集句嘲之云玉顏不及寒鴉色琴韻猶
餘老鳳聲巴縣妓名玉卿者張蟾樓贈聯云非玉似人人似玉惟卿憐
我我憐卿有旦名蓉仙者自詡潔清友贈聯云石曼卿爲芙蓉城主蘇

長公是神仙中人過譽不稱有贈蓉面何須加粉飾仙心原不染塵氛之句較貼切數聯皆從京華贈花君采珠聯語托來小對亦有佳者友出白帝城對青神縣佳矣予對朱仙鎮友更擊節偈賞落花生者絕對也合州徐紫垣先生對霉豆腐可謂絕處逢生有出花生花者郝采廷先生對柳連柳雖戲亦巧俗謂見財不得名看水鴨子又謂指東罵西名罵花雞公以此屬對工矣又謂暗地唆人名啄火雞公對此更工有魚名出水爛對草藥名見風消工矣又對隔山消亦藥名更工遺珠不勝收錄就心識者錄之同上

詩鐘者仿古擊鉢催詩之意焚香敲鐘界限起止又名詩綜綜者總也總散者使之聚易者使之同陳者使之新如集腋成裘織絲成錦兼綜而條貫之詩綜所由名也文人聚首無所事事限吟一詩則嫌過苦徒托空談又嫌不韻惟此例簡而不勞雅而多風嘗肉一臠已知鼎味凡天姿之巧拙功力之淺深思路之急徐皆于數語見之海內士大夫多喜爲此而零星碎錦無人收拾如時鳥候蟲自鳴自己雖有佳句亦旋得旋忘矣仲珊彭君蜀中名孝廉也幕遊楚北與李篁仙觀察丁榮甫

合川縣志卷六十八

叢譚

四十四

太守周子謙大令暨諸名流結鶴樓吟社仿詩鐘體制有多條皆花團錦簇玉琢金雕無慚作者而仲珊屢主盟社所製尤多披覽一周頗有可採揀選列之間參他作末埒已著亦拾遺訂墜意也體例以七字爲主如律詩二句配對成聯有分詠碎聯限字雙鉤魁斗蟬聯押尾諸格分詠則舉一人一物一鉅一細一醜一妍極不倫類之題配合成句如五雀六燕銖兩悉稱總以貼切點雅爲工碎聯則舉成語四字兩平兩仄者參差嵌二句中裁對精工減盡針綫之迹合成無縫天衣限字則各拈平仄二字虛實不等庸奇不一對嵌七字中次第各有名目首鳳頂二燕領三鳶肩四蜂腰五鶴膝六鳧脰七雁足作法要虛實交孚庸奇平等如釘陷孔如豆合黃運化無痕方偈妙手雙鉤則隨拈四字兩平兩仄者嵌各句首尾有葉皆雙無花不兩此例甚難能因難見巧更見才力魁斗則以所限字一戴句首一綴句尾如北斗之有魁杓也蟬聯則以所限字一綴上句尾一戴下句首合成律句取聯絡不斷之義二格不甚緊飭從事者少備體而已押尾則以成語三字平聲落腳者拖作尾聲如詩之送題散行不對須恰合分際餘韻悠然諸體外又有

將就錯一格引唐宋詩故錯一字復引一句救之亦有別致初結此社約五人十人不等吟成則藏名書聯送名公評甲乙列第一者豔其名曰狀元二榜眼三探花或劇金作獎或賭酒設筵二次入社卽以狀元作主考品第高下三次又以二次狀元主之屢次如式雖文人餘事亦騷壇雅事也一分詠類拈芋畫二物詠撥火煨分唐宰相凌煙活寫漢將軍拈杜鵑駙馬詠靈傳望帝歸魂後官拜王姬下嫁時拈漢高祖崔鶯鶯詠百戰縱橫歸赤帝一生行檢誤紅娘拈同官夜雨詠聯成宦迹惟今日滴盡鄉心是此聲拈戲台紫微詠開場冠冕唐天下署號風流杜牧之拈碑司馬相如詠長使黔黎來墮淚忍教紅粉去當鑪拈楊柳淮陰侯詠金城忽灑桓溫涕鐘室方思蒯徹言拈眉燕詠黛痕曉入珊瑚鏡香夢春酣玳瑁梁又翠黛分明張敞筆紅襟寂寞建封樓拈福鷹詠與慧同修當禮佛聞呼不下肯依人拈韞塵詠夜立玉階涼欲浸香篩金谷步無聲拈燈蘭詠回憶兒時猶此味不逢王者爲誰香拈羊曲詠殘照一鞭驅白石奔流千里下黃河又南朝樂府三千首北海孤臣十九年又黃河滾滾九千里白石磷磷三百羣拈鞭待詠石驅東海梁成日門倚西廂月上時拈翠投詠袖薄天寒人倚竹巢空日暮鳥歸林拈紅牆詠薜荔晚風勻蠟粉海棠春雨濕燕支拈汗青詠功成絕塞將軍馬氣望函關老子牛拈馬融老嫗詠曾作忠經偏附賊解談春夢已成婆拈蠶李太白詠筆花飛入才人夢葦箔牽成怨女絲拈李將軍鸚鵡詠英雄惜不逢高祖安否猶知問上皇拈檐馬詠秋風苜蓿來千里明月梅花索幾巡拈蕭鳩詠龍書獻瑞開三體鳳紀分司重五官拈梨屐詠遊山幾兩阮遙集啼雨一枝楊太眞拈竈曉詠晨飛鳥鵲雙星別夜祀黃羊一歲除拈花子櫻桃詠恩承中使盤傾處睡起人家飯熟時又度曲分明樊素口吹簫嗚咽伍員心拈蛙針詠穿來願乞天孫巧問去深憐帝子癡拈漢高祖梧桐詠疎雨滴殘琴韻歇大風歌罷筑聲哀拈越王勾踐信詠江上書來鴻雁落宮中人去鷓鴣啼拈燭犬詠華炬樓臺春燕客柴門風雪夜歸人拈哥舒翰鶯詠公子好音三月暮將軍威令七星高拈酸虿犬詠花裡吠聲行客至菜根滋味秀才知拈東坡棗詠臣子無忘赤心報仙翁正擁紫髯來拈杏花貓詠午晴花下狸奴睡春雨江南燕子飛拈隋煬帝驢詠楊柳春煙汴隄曲梅花風雪灞橋

詩拈草血詠美人門罷裙猶綠俠客歸來劍有斑又灑地猶餘一腔熱
報春無限寸心長拈楊妃雞詠喚開百二關城鎖壓倒三千粉黛圍拈
露枕詠桐陰滿地月華濕花雨一牀春夢香拈李羊詠井上咽餘齊處
士海濱留牧漢孤臣拈袴鼠詠藏彼孤兒存趙國化爲天子送隋家拈
梅花牛詠風雪一天餘鶴守河山千古等蝸爭又探來鄧尉香成海破
得燕軍火燭天又不辭雪地尋春去曾到天河飲水來拈肉燈詠樂聲
到此忘三月書味從君話十年拈桂花駱駝詠每看著地飛金粟願借
還鄉送木蘭拈魚吝詠陳涉有書欺戍卒項王無印賜功臣拈寶繒詠
和戎帝早偕金賜避難人同不徑行拈丹肩詠遊仙笑向洪崖拍秘訣
奇傳抱撲燒又仙人煉就開金鼎吟客詩成聳玉樓拈荆飽詠貧女釵
橫雙鬢短侏儒粟飫一囊多又長饑朔被侏儒笑一死軻成刺客名拈
骨籬詠報主未能骸敢乞寄人不屑首難低拈主囊詠千古雄才括宇
宙一生清福管湖山拈漁葉詠遠浦迷離聽晚唱空山零落看秋飛又
孤舟唱晚來彭蠡萬木驚秋下洞庭拈楚盆詠玉女洗頭朝對鏡項王
揮淚夜聞歌又零落才人弔沅芷荒唐鬼趣賽盂蘭拈砧笑詠雙杵秋

聲催木葉一枝春信索梅花又秋到蘭閨還擣素春生菱鏡不啼紅拈
衫走詠楊柳章台人試馬蘆花湓浦客沾衣拈舞封詠壯懷夜半聞雞
起慈訓天涯寄鮓還又樂府新成七德曲雄關拚擲一丸泥拈香吏詠
返魂自古無消息斷獄由來屬老成又已落風塵難免俗尙留煙篆未
成灰拈豆瘦詠幾樹梅魂撐病鶴一棚花影鬧秋蟲拈杜甫琴詠嚴挺
之兒敢觸怒蔡中郎女亦知音拈帳蟬詠芙蓉夜靜懸秋月楊柳陰疏
咽晚風又一紙梅花清夢穩半庭槐樹晚吟涼拈杯堆詠酒中清影團
鬮月畫裡離愁重疊山拈迷窗詠一樓已定亡隋案七寶曾誇選堦場
拈旅罄詠萬物誰知身是寄千家祇恐室如懸拈麥籌詠五夜唱量檀
道濟一舟投贈范純仁拈敲帶詠砧聲清夜鳴雙杵關勢黃河東一條
拈珠禪詠名將歸裝疑薏苡美人夙慧悟蓮華拈削茅詠太華峰危撐
峭壁少陵屋破捲秋風拈望猿詠北平射虎將軍臂西蜀啼鵲帝子魂
又蒼茫極目一千里變化通靈五百年又月下圓逢三五夜雲間啼送
萬重山拈持甕詠竹葉牀頭千日酒菊花手裡一枝秋拈贅釵詠駢拇
生爲無用物同心贈與有情人拈倉憇詠爲憐瘦馬緣途息誰念哀鴻

破例開拈簪響詠竹拋涼露珠千點花簇香雲玉一枝拈蕭榜詠登科
軾轍同千古禪代齊梁本一家拈巢舅詠雕梁日暖春棲燕烏柏風涼
晚噪鴉拈碧烘詠唐花不借東風力春草能消南浦魂拈王母靈芝詠
春暮落花縈翠蓋天空飛鳥下雲旗拈槐火詠春深夾道碧千樹秋老
獵場紅一山拈芍葯京報詠休被荆公譏斷爛合教花相管繁華一碎
聯類出朝飛暮捲詠蓬首飛雲朝睡足蕉心捲雨暮愁生出五月江深
詠五夜月明鄉夢遠一江風緊客愁深出久不聞香詠聞道蘭香曾下
嫁不堪杜老久無家出是真丈夫詠萬丈有裘真我願一夫失所是吾
憂出寸心千古詠心如寸草懷慈母淚灑千秋弔古人出文章道藝詠
藝林縱有能文響章句俱非見道言出坐中佳士詠客逢佳節頻中酒
士有閒情且坐花出生公說法詠我法空空無可說公才落落不虛生
出醉翁亭記詠醉披于寶搜神記閒步坡翁喜雨亭出韓陵片石詠絹
片飄零韓幹馬石苔斑駁李陵碑出玉杯繁露詠一杯涼露金莖曉兩
鬢繁霜玉鏡秋出雪花如掌詠如水年華頭上雪判花心事掌中杯出
歲寒三友詠一寒如此歲云暮三徑依然友不來出數點梅花詠暮雨

明皇出王官谷口詠函谷地收秦戶口蕭王人拜漢官儀出南八男子
詠童男五百南踰嶺子弟八千西渡關出五陵衣馬詠斜月五更陵樹
暗秋風匹馬客衣單又五代衣冠人落落二陵風雨馬蕭蕭又五侯門
第衣冠舊六代園陵車馬稀出天寶遺事詠遺老江頭談往事寶書天
上憶前遊又遺珠可記生平事寶鏡高懸不夜天出門前五柳詠詞學
專門居柳上詩成五字跨王前又金閨門外五人墓宣武坊前萬柳堂
出江城畫角詠畫意微茫半江暝角聲淒咽滿城秋出栢梁臺體詠當
代楷模臺閣體空山松栢棟梁材出馬卿風格詠銅柱英風銘馬援藥
囊急智格荆卿又爲掃風塵事戎馬不循資格到公卿出馬上相逢詠
良馬須逢孫伯樂上卿應慕藺相如出終南捷徑詠記得南宮新報捷
終當北闕徑承恩出二分春色詠分明月色三千界淡蕩春光十二樓
出石泉槐火詠古槐落日泉鳩里野火秋風石虎營又六街燈火通槐
市百道泉聲下石門又漁火一星浮采石宮槐千樹擁甘泉出過了清
明詠舉世聰明都誤了此生清靜總閒過一限字類鳳頂例嵌第一字
拈薦觀詠薦土香焚三徑月觀星人坐一天霜拈針斗詠針樓窈窕秋

期近斗柄縱橫夜漏深燕頷例嵌第二字拈鳳星詠德星夜聚無凡士
威鳳晨鳴有諫官拈荆米詠羨米芾書題北海歎荆公法誤蒼生拈開
會詠別開生面能千古高會羣仙又一年拈盤發詠曲盤松似通靈畫
怒發花如得意文鴛肩例嵌第三字拈消款詠借來消夏柳千樹留得
款冬花一枝拈冒栽詠下土冒爲天上月倚雲栽是日邊花拈索停詠
聞郭索聲初上蟹得居停主豈無魚拈端午詠竹院午眠涼到枕蕉窗
端坐綠生衣蜂腰例嵌第四字拈羊髮詠落日牛羊關塞外凌煙毛髮
畫圖中又兩字吉羊摹漢篆數莖華髮點吳霜又愁添白髮三千丈劫
換紅羊五百年拈分燭詠春到二分江草綠夜燒雙燭海棠紅拈素恩
詠自知儒素無多業不負君恩是此心鶴膝例嵌第五字拈雕薄詠昨
夜風聲雕玉佩暮春天氣薄羅裳拈格星詠雄心漸退星星髮辨口應
無格格言又水程怕說星沙險天象愁看格澤明拈難路詠花萼好偕
難弟詠萍踪休作路人看拈招締詠遊人野渡招漁艇處土空山締鶴
盟拈之過詠王氏五郎之泣秀蘇家三子過尤賢覓脛例嵌第六字拈
曲梁詠賣茶客向浮梁去載酒人爲杜曲遊拈送安詠蘆月空江愁送

客茶煙小院學安禪雁足例嵌第七字拈管根詠滿地落紅都不管一池新綠本無根又文章幾代風騷管太極一團天地根一雙鉤類出支分派別四字對嵌二句首尾詠支水各歸江九派別情無奈月三分出白雲深處詠白嶽黃山行處處雲窗霧閣影深深出去來無定詠定遠將軍馳馬去無愁天子鬥雞來又無雷界自三邊定去病身經百戰來出海內知交詠知己諫書陳北海內庭珍品貢南交出大好官聲詠官道柳新春自好大江風靜浪無聲一魁斗類拈刑弦二字嵌二句首尾詠刑牲塞上秋傳檄射虎山中夜控弦一蟬聯類拈種舞二字嵌上句尾下句首詠瘦到綠楊猶善舞種來紅豆總相思一押尾類出不知愁三字嵌在句末詠參透維摩無上法不生歡喜不知愁出與人看詠南陌踏青鞋印淺誤留香迹與人看又徑把郢支頭斬卻藁銜懸出與人看出是當年詠回首六朝金粉地青山不改是當年又一別故人經十稔夢中顏色是當年出未歸時詠聞道故園花事好慰情先在未歸時出第幾回詠停杯試問前身月我到人間第幾回蜀人彭仲珊孝廉在鶴樓吟社題句甚夥別爲錄之分詠類拈錢交詠射潮塘倚藩王姓食

合川縣志卷六十八

叢譚

四十九

粟碑刊介弟名

河南曹州碑刊曹交食粟處一笑

拈息夫人鍾葵詠冠劍終南唐帝夢

佩環席上蔡侯繩拈徐孺子萍詠故人一束生芻重流水三生弱絮輕拈囊主詠新盟敵血推牛耳大俠函頭裹豹皮拈駙馬子規詠館甥已換虞賓號望帝難歸蜀道魂拈公主囊詠翠華已幸平陽第青鳥空繙郭璞經拈藥商詠南國采攜吳太伯西河名動魏文侯拈漁葉詠秋風乾處聞行鹿夕照明時看打魚拈倉憇詠乃積人家秋穫滿乍留村店午陰涼拈才棧詠江聲海氣雄潘陸山斷雲連界蜀秦拈贅釵詠垂瘠勢去憐共主留股情深訂上皇拈蜀拳詠魂銷杜宇思鄉候血迸睢陽透爪時拈泥骨詠雨後烏呼春滑滑燈前人立玉珊珊又落花微雨三春路衰草平沙百戰墳又無定河邊春入夢太眞墳上土猶香拈圍棋項羽詠三百餘子界黑白七十二戰空蒼黃拈書野詠案頭人對三千卷天上星分十二州拈瓢諾詠曾以千金誇季布不堪一水飲顏回拈宰墩詠一堆黃土存烽堠百里清名奉縣官拈巢舅詠居人構木棲洪水太子分車贈渭陽拈燭犬詠文章棘院三條燄風雪柴門一夜聲拈借銅詠井中物已歸龐儉河內人猶乞寇恂拈杜甫琴詠萬里清秋嚴

武幕一湖空水伯牙臺拈珮背詠彼留之子空遺玖誰適爲容願樹萱
拈簾築詠一鉤疎影三湘竹萬里邊牆二世城拈洞簫詠其中能否藏
雞犬此曲曾聞引鳳凰拈草血詠極天沙漠三秋白捲地弓刀百戰紅
又銷魂帝子啼鵲舌歸路王孫惜馬蹏拈漢螢詠三澁滄浪歸楚澤半
隄星火照雷塘又一代建元歸赤帝九秋飛影度巫山拈磬旅詠萬里
羈愁生夜月一聲留響定空山拈王母靈芝詠瑤池人滿三千歲瑞草
天生十二莖拈烏在詠寒到上林猶借樹清如泉水未離山又遠遊無
奈思親切將止聊爲數子飛拈響簪詠鴻音飛去聽猶遠鶴髮梳來短
不勝拈會館插秧詠一綫金針刺春水萬間綺席聚同鄉拈新聞紙黃
州詠又報玉京傳信雁休將赤壁誤嘉魚拈芍藥京報詠一院繁華焚
尾盡九天消息繫心多拈薛靈芸朝珠詠八百珊瑚明御座三千粉黛
妒針神又壺中點點留香唾頷下垂垂煥袞衣拈水雷花露詠濕透香
鬚冷蜂蝶震開波面走魚龍拈班姬素詠奉帚願隨阿母老織機猶想
故人工拈李廣青詠雁門妃子空留塚猿臂將軍老不俟拈昭君箸詠
英雄失手聞雷日天子銷魂下殿時碎聯類出人淡如菊詠淡去世情

惟愛菊瘦來人面尙如花出應物平心詠客心冷峭平山月風物蕭疎
寶應城出諸葛武侯詠諸夏無君繻葛戰應侯入相武安傾出風片雨
絲詠一片林花初著雨萬絲煙柳不禁風又片帆天際秋風惡一縷情
絲夜雨深出意關飛動詠筆花生動靈飛帖秋意蕭條大散關出小謝
新詩詠弔古新題蘇小墓尋詩曾訪謝公墩又謝眺句開新樂府曹唐
詩闌小遊仙出高處一蟬詠殘蟬幾處暮天碧孤雁一聲秋月高出待
漏朝天詠滴盡漏聲猶待月放開朝事且談天出玉壺買春詠壺公一
粒回春易玉女千金買笑難出親勞玉趾詠錦匣親封交趾桂玉箋勞
畫竝頭蓮出馬上相逢詠前朝名論逢班馬上界相思隔女牛出太原
公子詠邴原不就公孫瓚太白能知郭子儀出遠人無目詠天目山寒
有遠色湖心亭冷無遊人出清白子孫詠一庭白雨敲松子八月清秋
長稻孫出春酒介眉詠半簾春雨修眉史一介飛書檄酒兵出君平賣
卜詠賣餘寶劍知平賊卜徧金錢不見君出羅漢作東詠江漢化行歸
作育東南才美入搜羅出過了清明詠得過且過俗緣了將明未明天
氣清出韓陵片石詠諸陵猶峙漢唐石片土不存韓魏家出錦城絲管

詠雨絲風片城邊路象管鸞聲錦上花出定執破危詠臨危能守破山
戒執法還同定國心限字類一鳳頂拈曲端詠曲水觴流三月暮端溪
硯定十年磨拈秋暝詠秋心半寄梧桐雨暝色平分橘柚煙又秋雁遠
隨流水盡暝鴉寒帶夕陽飛拈龍虎詠龍賓十二朝傳檄虎旅三千夜
斫營二燕頤拈龍虎詠老龍頭北暮雲紫殺虎口西秋日黃拈曲端詠
一曲未終雙淚落百端交集滿城秋拈顛拂詠白顛喜見秦襄馬紅拂
甘爲李靖妻拈東聽詠陳東空有匡時策李聽終爲愛國臣三鳶肩拈
消款詠往事消沈從此結寸心款曲對誰明四蜂腰拈信都詠美人魚
信浮沈水方士鴻都縹緲仙拈堂女詠從此廟堂添故事看人兒女拜
新年五鶴膝拈紅玉詠紫陌春驕紅叱撥翠樓人倚玉參差六鳧脛拈
燈竹詠秋風白下無燈市明月黃州有竹樓拈家面詠斯人頗憶東家
某此樂不殊南面王拈就婚詠十年人老新婚別萬里書飛急就章拈
雨黃詠樹古不知新雨露山深微似古黃農拈梁曲詠大權縱使歸梁
冀邊將何因損曲端七雁足拈天女詠棲烏夜織秦川女斷雁塞衝楚
澤天拈唱茶詠聽碧玉彈粉兒唱煮千日酒六安茶魁斗類拈銅書詠

銅柱功名三尺劒玉關消息數行書蟬聯類拈劒醉詠恨來欲請上方
劒醉後聊爲長史書諸聯皆鮮新典麗可爲式程予有詩鐘句多忘卻
祇記限字類聯雁足例拈出頭詠雪夜爭飛花六出雲林新種橘千頭
又杜集塞分前後出陸家屋住東西頭拈舉人詠襴生薦表修文舉呂
氏居奇貨異人拈賦宜詠財如禹貢輸田賦地法周官辨土宜拈牧初
詠軒席陣圖排力牧漢家小說本虞初拈未溫詠漏報銅壺過午未飲
傾玉盞話寒溫拈以能詠福如周雅歌三以才仿漢朝選八能鳧脛例
拈午科詠山中已斷催科吏門外不來題午人鳶肩例拈何必詠皋夔
何書之可讀禮樂必世而後興又此子必能至公輔諸君何以答昇平
小子燦蟾仿分詠例拈墨漢武帝詠才子文資松使者英雄氣短李夫
三子燦緯仿限字例拈尊匣詠酒蟻千尊浮竹葉鏡鸞一匣啟菱花采
續貂尾又將錯就錯格引唐宋詩隨改隨救詩鐘之餘也引少小離家
老二回錯大字救曰老大嫁作商人婦引勸君更進一杯茶錯酒字救
曰寒夜客來茶當酒予仿例擬類則引菜花依舊笑春風錯桃字救曰
桃花淨盡菜花開引夜盡鐘聲到客船錯半字救曰有約不來過夜半

引牧童連指杏花村錯遙字救曰柳暗花明又一村引北斗橫天夜未
闌錯欲字救曰長夜漫漫何時旦準此類推不一而足各體在詩詞外
別開境界八叉可以成韻參觀可以見才作吟壇也可作觴政也可筆
墨一道可謂盡態極妍矣同上

燈謎源于古之隱語昔齊威王喜隱語淳于髡以三軍大鳥諫之爲謎
之濫觴嗣後方朔射覆孟德讀碑皆其遺軌其他謠詞樂府如千里草
巴馬子大刀頭銜石闕之類亦謎所散見至明始有春燈謎之目由是
抽妍騁秘愈出愈奇美善畢臻體裁各異有會意者有別解者有折字
者有算法者有并字變音諧聲象形者有傳神象外者有脫化一二層
者參差變化不可方物惟出之者巧故猜之者妙彼此動合自然方稱
佳製值萬壽元宵佳節騷人韵士藉以供歡場雅趣事雖游戲其鬥角
鉤心探奇抉隱足徵文人慧業勝魚龍百戲多矣就聞見臚之綴以鄙
意凡字謎物謎有新雅者亦采附之至粉底粉面捲簾諸格與意不安
詳詞不雅馴者概屏弗錄會意類出清和節解四書伯夷柳下惠是也
出伯牙解四書爵一齒一出天衣無縫解四書不知所以裁之出席地

談天解四書位卑而言高出三朝堂下洗孫兒解四書子濯孺子出年
年空自乞天孫解四書不能使人巧出道許行之言解四書陳代曰出
香積厨邊長老居解四書食前方丈出錦瑟無端五十弦一弦一柱思
華年解四書自怨自艾出兩箇男的兩箇女的兩箇死的兩箇活的兩
箇有名的兩箇無名的解四書華周杞梁之妻出兩雙手兩雙角六隻
眼睛十二隻腳解四書牛羊父母竝瞽瞍義亦見出人生不相見動如
參與商解四書孟施舍似曾子北宮黝似子夏出當是時也齊有孟嘗
趙有平原解朱注蓋周末文勝出一雙紅繡鳳頭鞋解詩經赤舄几几
出逸詩解詩經不屬于毛出拜懇解詩經萬福來求出二八月解詩經
載離寒暑出精衛銜石解詩經秉心塞淵出小紅低唱解詩經不大聲
以色出丞相祠堂解詩經祀事孔明出我是吏部天官姪少爺解詩經
家伯冢宰出趙顏以酒脯獻南北斗解詩經神嗜飲食使君壽攷出
妓女看春宮解詩經我客戾止亦有斯容出小友解書經孺子其朋出
永樂大典解書經明王立政出這一本依司馬子長所奏解書經從爾
遷出初淅瀝以瀟灑忽奔騰而澎湃解書經樹之風聲出狐子犯從亡

禦敵歐陽子方夜讀書解書經乃偃武修文出阮籍猖狂其故何也解
易經爲多白眼出誥命碑解易經不封不樹出先生不知何許人也解
禮記師與有無名乎出長庚星入懷解禮記是爲白也母出弔者大悅
解禮記樂與哀半出袈裟解左傳衣身之偏出下堂而傷其足解左傳
階之爲禍出諸峯羅列盡兒孫解左傳太岳之亂也出小旦解三字經
一句詩經一句爾男子顛倒衣裳又雞司晨東方未明出如日月之代
明解山海經出入有光出步斗踏罡解韓文舉足爲法出斜日照長城
解古文萬里朱殷出挑燈閒看牡丹亭解古文光照臨川之筆出然後
樂正雅頌各得其所解古文則氣之長短與聲之高下皆宜出春遊芳
草地夏賞綠荷池秋飲黃花酒冬吟白雪詩解古文四時之景不同而
其樂亦無窮也出齊人有一妻解西廂如何妾脫空出花面解西廂春
光在眼前出告太王王季文王解西廂說哥哥病久出太史公身受宮
刑解琵琶記畢竟是文章誤我我誤妻房出失物不知何處去求簽問卜
總無靈解西廂只少箇圓光出鴉煙膏子解西廂也還有些土氣息泥
滋味出文王既歿解人名武丁出准備文書報上司解人名申詳出潮

陽嶺外寄書來解人名韓信出大挑一等解三國二人名文醜顏良出
漢家子弟隸梨園解人名劉伶出孟子見梁惠王解人名魏徵出清風
明月不用一錢買解人名白樂天出李青蓮夜宴桃李園彝倫攸敘解
人名白樂天出除卻韓柳歐蘇文當時豈無大家解人名王曾出咸陽
道上閒馳逐正是機雲入洛年解人名秦少游出殷二百周三百解人
名員半千出娥皇女英解一曲牌名虞美人出七月七日長生殿夜半
無人私語時解官名玉環同知出文王發政施仁解縣名昌化出東山
高卧解時憲書安牀出掩耳盜鈴解藥名防己出草色遙看近卻無解
藥名空青出孟子浩然有歸志解藥名王不留行出事父母幾諫解烏
名子規出予早知有今日矣解獸名果然出柳絮飛時花滿城解俗語
多謝出如囊螢如映雪解俗語借光出三歲孩兒離家鄉解俗語小便
遠行會意有并字者出胭脂解四書如用之并女口爲一字也出八千
子弟盡穿裘解左傳翠被并羽卒衣皮爲二字也會意有諧聲者前面
吹喇叭後面打破鑼解詩經魚麗于罍鱣鮓出見龍在田寓光緒御諱解四
書此非吾君也何其聲之似我君也會意有傳神象外者出天靈靈地

靈靈太上老君急急如律令解四書法語之言出國士無雙解四書何謂信出將字解四書上士一位中士一位下士一位出王安國解詩經帝作邦作對在義理外落想神妙之極別解類出核字解四書果在外仁在其中矣出致信同胞解四書啟予足啟予手出岳武穆心思解四書去其金出冷宮妃子害相思解四書不幸而有疾出笙歌夜半是誰家解四書樂正子何人也出晉人錮欒氏解四書則必取盈焉出兒隨娘下堂解四書是二天子矣出如何覆到水晶椀解四書使子路反見之出始皇焚書解四書古之人皆然出人比黃花瘦解四書鞠躬如也如不勝出不學歐蘇曾王亦不學柳子厚解四書然則師愈與出問晉有清談之禍唐有女主之變明有流寇之擾具在史書能一一言其人否解四書何晏也則天也自成也出元夜奪崑崙解詩經以望復關出當是時也商君佐之解詩經或王事鞅掌出賊營文書解詩經匪報也出強盜搭賊船解詩經匪載匪來出分明是摩詰印章何顛倒殘缺若此解詩經維王之印出失信于子解宋詩有約不來過夜半出温嶠照鏡解唐詩中有一人字太真出養在深閨人未識解古文楊氏潛其名

出圈到底點到底解物名盤香別解有變音讀者出今日俸錢過十萬解夫微之顯出孟德曜高風王氏婦奸謀管仲姬書法師承何自解四書夫有所受之也出憑君傳語報平安解四書吾斯之未能信子說出棋盤街解四書行之而不著焉出以告者過也解書名左傳折字出凡字解四書鳳凰不至出凡字解四書既不能令又不受命又解有臧倉者沮君君是以不果來也出門字解四書不敢請耳惟恐有聞出佯字解四書何可廢也以羊易之出口字解四書是誠何心哉出鴉字解四書爵一齒一出談字解四書有爲神農之言者出道字缺首字一直解四書不直則道不見我且直之出硃寫詞字解四書未同而言觀其色赧赧然出取字解史記最下出且字解易經宜下出腥字解易經日月相推而明生焉出肅字解詩經秉心塞淵出乂字解易經因而重之爻在其中矣出兄字解易經兌上缺出知字解左傳其左善射其右有辭出姓也似名名也似姓但有旁人看之則是姓無旁人看之則是名解人名伊尹出八駿齊驅六駿先散一駿在旁觀者不見解人名馮驩出八字解二人名白起黃歇出巾字解物名雨衣出回字解物名高底出

人字解西廂一曲名琴心出人字解二物名得解者給金頂一座火腿一隻二物卽金頂火腿也出上不在上下不在下不可在上且宜在下一字破卽一字也出一心呪筍莫成竹解恂字出落花人獨立微雨燕雙飛解倆字兼象燕形也出慈禧太后聖誕解朝字太后生十月十日也出一箇大一箇小一箇跳一箇跑一箇食人一箇食草解騷字出上而言之尊也下而言之親也合而言之害也解毒字出有友五人焉或爲大人或爲小人舜有臣五人予有亂臣十人解傘字出賦得偃武修文得閒字解敗字出兩點一直一直兩點解慎字折字有化去一層者出及字解四書無人乎子思之側出几字解禮記共食不飽出射字解詩品落花無言出聿字解詩品其曰可讀出廂字解西廂眼看著衾兒枕兒謂化衾枕爲牀也折字有化去二層者出僧尼托鉢何處去解層字謂僧尼二字各減半去化字也出春雨纏綿妻獨居一字破謂春字無日無夫也卽一字也算法類出逢十進一逢八進一十逢九進一逢十進一逢十進一解四書執圭出二九非一十八三八非二十四四七非二十八五六非三十解四書其實皆什一也出左算一十八右算一

十八統算六八四十八解校字出上頭是馬子下面是箇字下面是馬子上頭是箇字兩頭是馬子中間是箇字解交字出左算三十一右算一十三不是三百二十三便是三千一百一十三解非字出兩口子攆拳一箇喊八一箇喊五解語字予仿諸體擬有數條會意類出鐵核桃解四書果哉末之難矣出東宮自表出身解四書曰吾君之子也出竹林拈筆共題詩解四書作者七人矣出問陳橋兵變人心何如解四書當在宋也出討獐土地檄文解左傳使民知神姦會意有并字者出夏禹尙黑不知啟能如是否解四書君子亦黨乎并尙黑二字也會意有象外傳神者出錫帝訓演箕子疇解詩經對揚王休作召公考別解類出敬辭君王寵錫恩解四書賜不受命出唐虞傳賢解四書君子不重出劉禪本是英雄種解藥名使君子折字類出人有同心解合字出一心翻轉古人解舍字出一字解書經慎終于始黏帖樂樓上仿戲文出凡作過腳者要生腳丑腳旦腳一直到底排得勻稱又要頭上抹粉耳解皇字出土字解四書至足矣出木字解四書此之謂失其本心折字兼象形者出水字解詩經小心翼翼謂旁畫象兩翼也折字化去一層

者出火字解書經秋大熟未穫謂秋無禾也出泉流洗墨池解水字謂泉不白也出哀哉不能言解裁字謂哀哉二字無口也算法類出上算八兩下算十六兩合算二十四兩分算不成一兩解爾字出八口占一邊量來一尺一寸寬解詩字外字謎物謎有可采者如一字不通風十字在當中若著田字猜不是真秀才解亞字謂白十字也出一月復一月兩月共半邊上有可畊之田下有長流之川六口共一室兩口不團圓解用字出越老越好越嫩越好越有越好越無越好解酒色財氣四字出眼看有節手摩無節兩頭冰冷中間火熱解春帖子出一句詩經四字同音解矜矜兢兢出每四口添二筆一字起四字畢添成跏嘔晷圖四字也皆靈妙可喜文人心思如水銀潑地無孔不入文人吐囁如時花怒發日新又新所錄已成陳迹俟有新奇者再爲續之以上談詩附燈謎

楹聯之作最爲不古然亦詞章之一甚未可草率從事也清梁章鉅作楹聯叢話說其中得失綦備而人往往忽之近來新體文行此道尤棄如糞土然不可不識也吾合順康以來未有楹聯作者舊志載州牧常學易題明倫堂聯云云宋錦題張文貞公詞聯云云濂溪祠聯云云蓋

合川縣志卷六十八

叢譚

五十六

盛推之乾嘉之際以時文體行於楹聯見存各祠廟者每無足觀惟馮遠村先生鎮巒紅椒山房筆記載有數聯頗爲一時佼佼其題清溪郭

外茶亭云一髮中原喜風清瀚海雪耀冰天縱橫幾萬里車輦馬駢若士若官若工若賈忙碌碌何時得閒且共擔夫小坐半壁絕塞考北來名臣南征健將上下數千年文經武緯曰漢曰唐曰宋曰明去悠悠轉瞬卽過好聽山鳥長評又題兩小對云郭外蒼茫通野寺雲中縹緲見山城偶來道院尋仙跡獨立斜陽數過人又題富庄橋云平分野色場新舊淡鎖溪流路短長又題崆山書院對聯云道德衍虞夏商周問誰爲先生弟子文章傳漢魏唐宋待汝作理學名臣可與共學可與適道譬如平地譬如爲山萬里鵬雲天浩蕩八窗燈火月玲瓏問字客來紅雨外讀書人在綠雲中教亦多術矣不憤不啟不悱不發學而時習之如切如磋如琢如磨碧梧翠竹新詩句紅樹青山舊酒人森楷記

咸同之間吾邑顏某薄有才名其作楹聯好以市井俳諧語行之如財旺生官鬼多刻子之類俗人大爲傳誦予初讀書尊經時亦嘗語及之亡友丁治棠廣文云楹聯以意爲上辭次之如曾文正挽胡文忠聯云

逋寇在吳中是先帝與老臣臨終恨事薦賢滿天下願後來補我公未盡功名左文襄挽曾文正聯云謀國之忠知人之明白媿不如元輔劘善若規斷金若礪相期無負平生二聯羌無故實亦不著一字而三公之心事身分一一如見此最上乘其次則須有詞有華有典有色澤有對仗有關合方爲出色當行如君所偁以供談噓可耳若以此爲佳則入惡魔道矣予爲竦然後偶提筆爲此卽思治棠之言不爲油腔滑調自卑品格今治棠往矣其遺集末卷附有楹聯今擇其尤者錄之賀舒永圖价入泮代潘瑩臺作云坎珂厯童子軍中齒逾卅載青眼始遇宗工似我情洽友朋愛如子弟誼比師生眞寒士不厭淡泊交平日文章曾共論培植由尊翁筆下其父業爲刀筆有隱德膝繞八株白眉獨推阿季期君心存道德志勵功名品超凡俗好秀才須識廉恥字浮雲富貴且徐圖題紅燈煙館云等仙家燒丹爐火相親誰復知世上逐鹿看虛室生白煙雲欲吐自謂是人中卧龍爲張姓甥壽舅母曹氏七十聯云文采仰清門憶荻畫柑分七十年鳩杖親扶板輿何羨安仁母吉徵占大宅看蘭香芹秀新時表弟入泮九萬里鵬程遠到遺胄空慚壯武孫壽某女壽六十

合川縣志卷六十八

叢譚

五十七

聯云三千年開花子結同期桃苑春長金母笑九五福曰壽甲周共慶護堂秋永璧娥歡又壽左瓊軒五十云我與當世論交通緩急有無屈指惟二三友君是幾生修到享尊榮安富齊眉更五十年壽吳李孺人六秩云伐桂伴仙郎月裡姮娥同不老獻桃開壽域宮中花草盡長春周德安五十雙壽生期七月初六聯云先七夕以偁觴喜眉齊鴻案蔗境回甘烏革翬飛開第宅合百齡而製錦羨膝繞龍文蘭陔戲綵螽斯麟趾起簪纓時方起新宅故云輓羅升階孝廉之母由殯而葬聯云鳩心比令儀得七子承歡魂魄應能瞑目馬鬣鍾靈氣由五父啟殯泉臺從此安身其掌瑞山書院時題門聯云平地樓臺開畫本半天燈火落書聲題凌霄閣云閉戶不知臨市近推窗始覺讀書高題楹聯云三水當門想學海波瀾壯闊雙榕繞屋見文林根抵盤深沈子雄芝英知州見而偁賞之又集句作喜聯云不慚弄玉集丹鳳應逐文簫駕綵鸞粉牆丹桂動光采珊瑚碧樹交枝柯集門聯云鶯來占柳爲歌院燕蹴飛花落舞筵旁人錯比楊雄宅過客難登謝眺樓鳳凰麒麟在郊椒芝蘭玉樹生庭階代友贈妓玉鳳云玉指環籠新竹筍鳳頭鞦褭裹牡丹芽桂鳳云桂

府姮娥同搗藥鳳樓仙子共吹簫皆穩而佳其典麗喬皇者如慈禧太后六旬萬壽聯云瑤池桃獻三千果玉井蓮開十丈花現蓮花丈六身渡寶筏引金繩繼南海觀音證成佛果高椿樹八千壽飲瓊漿酌玉液偕西池王母醉剖仙桃深宮有聖人極旰食宵衣用嘉惠惠庶民真教春臺鳴豫夏甸占豐胥蒙元后生生德介福受王母更推恩錫類以美利利天下坐看玉弩銷鋒金戈弭釁永奠熙朝丕基九天瑞日麗龍屏當其負宸臨軒能塵銷玉宇兵洗銀河四海調大有年豈僅煒管長昭賢聲追漢朝馬鄧五色喬雲輝雉扇從此徹簾還政正晝永璇宮春回瓊島六旬開無量壽不徒瑤瑟獨鼓勁節媿湘水英皇作眾母之大母如堯母如文母母道克全無慚母儀天下之母先羣生而誕生曰資生曰廣生生機不已實爲生成庶物而生集詩經云四方無拂實維豐年俾熾而昌亦右文母十月之交以介眉壽式歌且舞思媚周姜集古句云以天下養其親統自西自東自南自北同我太平此謂大孝于庶民斂厥福能無反無側無黨無偏錫汝保極乃可長生其精工典雅者如題儀隴學署聯云儀秦學術雜縱橫爲聖賢所不道隴蜀文風比鄒

魯得教化而後興象儀不必畏威能蹈矩循規何事重勞夏楚得隴無妨望蜀僅采芹食餼還多未了功名分來儀禮三千請多士向禮門出入踏徧隴雲幾疊願諸君從雲路飛騰是官如儀封人得瞻聖範每夜聽隴頭水輒動鄉心如鳳采來儀弟子俱堪造就待鶴書赴隴先生或可推升考古昔以爲儀型書披雪案升膠庠而離隴畝軻發雲程遞嵌儀隴二字頗具匠心然不失之纖巧是爲大方家數又題便座聯云簾靜蜘蛛挂當戶官閒蚊蜺飛上階豔鋪花片成茵坐清掬月光當酒吞不除階草留春色多種芭蕉待雨聲檐風穿帶翻書葉瓶水融冰養筆花落繡滿齋倉頡篆蟲聲四壁伏羲琴風掣綠蕉搖大扇雲團黃柳罨輕絲閒官催債成忙事老境讀書補少年化雨潤沾槐市樹春風和放杏壇花教孝教忠修道之謂教官常官法定論然後官見所見聞所聞當前卽是爲無爲事無事隨遇而安代把總李榮山擬三月自壽聯云星朗長庚看駒光將盈半百節過上巳藉燕飲更作重三又云傍營細柳初飛絮上苑仙桃正發花其貳尹司徒琢之四十生日賀以聯云溯玉牒分枝家聲曾亞六官職來金城坐治年譜剛繙五律詩其太孺人

錢氏少隨父任儀隴至是琢之迎養來縣適旌表節孝命下遂作生日聯云萍蓬隨意寄遊踪昔依繡閣今處華堂與花縣結緣鴻泥疊向金城印松柏有心標勁節少作貞媛老爲壽母得芝封錫祜鸞誥新從玉陛來俄琢之卒于任輓以聯云眼中人倏爾云亡想頻年行則把袂坐必聯牀舉公義私情相訂相商眞于異地得良友身後事如何能了痛此際妻已離家妾方在殯兼長男少女未婚未嫁況又高堂有老親又代醫士王德孚輓云一家在宦海棲身撫長男育少女上奉六旬慈親乃口角微嫌竟驚心花落嘗嘆謂曰我輩運遭磨蝎將有性命之憂其信然與誰知烏死鳴哀前是戲言今成讖語十載向儀山托足解秋審辦冬防代理數月公牘因軀體不適遂滿肘楊生曾警告云此番恙抱河魚非僅皮膚之病不可忽也詎料駒光過隙昨猶把袂今遂分襟二聯純用白描不著一字而情眞語摯如見其人在治棠諸聯中別是一格治棠元配陳淑貞孺人于治棠選任儀隴之年買田雲門鎮將啟行矣忽患痰厥數刻而歿治棠極哀悼之爲小傳哀誄誌銘之屬甚多已分別采入本傳及文在而輓聯尤哀豔今錄其三云得祿未同榮我太傷心獨棲冷署人千里買山欲偕隱卿眞命薄惟占荒坵土一坏馬后含飴願竟虛憐繞鄰雙孫尙爲黃口鴻妻舉按情如昨痛齊眉半世未到白頭我真負性太癡旣傷死別又憶生離腸似轉車輪每逢花放水流都成憾境卿豈游魂爲變方去心中旋來夢裏神如依戶牖一任天荒地老難斷情根則又情文兼至與潘安仁孫子荆同擅勝場不徒以詞采見異者矣

陳宣三明經

雲達

詩禮世家風規整肅羣從昆季皆彬彬儒雅質有其

文然多以帖括擅場惟宣三能詩古文辭予旣甄錄入文在矣有傳其兼工楹聯者凡十數聯今擇尤錄之題黃公祠云遲一日節鉞不來天意亦難憐赤子歆兩縣馨香之祀公心亦自戀蒼生題樂樓云風塵內不少知音莫祇將渝舞巴詞紛然入奏天地間無非是戲必祿得忠臣孝子方許登臺挽周西園廣文云教術亦良多哉十數年文武膠庠仰若泰山爪跡寄渝州我曾近趙衰冬日

周爲合州學而宣三學籍定遠非直轄故云

先生從

此休矣五百里文字因緣付諸流水口碑傳石照誰能忘茂叔春風著語無多而聲情如見亦白描高手也

前清慈禧皇太后手翦內凶躬鋤外難兩朝聽政七秩騰歡誠甚盛事其祝嘏之聯前推治棠後則潤生予均不在州城不與焉今錄潤生聯云英娥燕樂九重宮福量恆沙恩波瀛海巍乎民無能名焉祇好筦闕璇昊蠡測晶溟賡幾句康衢謌效幾聲華封祝大家稽首拜手對闕屏營上壽嗣徽音印見西池降王母皇帝龍飛三十載八紘翼化九葉揚芬大哉堯之爲君也更知德紹姚媯歡承倭妣聽一章霓裳曲披一幅王會圖教我循流溯源中宵頌禱尊親爲至孝每依北斗望京華又云聞嵩山呼萬歲者三福古來稀德古來稀合紫芝朱草盡數輸將佛誕讌金仙豈但誇玉帛萬方從心所欲拓國土占五洲第一東至于海西至于海更北朔南荒同歸覆幬雲霄明寶月好快把霓裳三疊鼓腹而謌又云躬負宸以匡時七十年宵旰經營博也厚也高也明也悠也久也儘丹書寶牒道不盡蕙問蘭儀更香象瑤蚪喜不勝衢歌巷舞三朝襄廟算最好是東平倭島南怙越裳北戢法夷西安捐毒轟轟烈烈想見英風蕩曉禕翟揚休豈徒誇髮捻妖氛次第削平補天小試媯皇手身臨軒而聽政億萬姓併幪覆幬勞之來之匡之直之輔之翼之任蠕

動虺生都共戴光天化日極繩行沙度亦同霑甘雨和風復旦景卿雲不第如慶都孕堯姜嫄肇棄有莘毓夏簡狄生商濟濟綿綿具瞻瑞靄彌霄和神降宙卽坐看子孫厚澤因仍衍進累葉宣昭聖母心其壽潘楊孺人六十聯云壽觴舉慈顏和一幅閒居賦如是如是席長筵列孫子六秩太夫人仙乎仙乎挽外祖刁象埜聯云朗懷若月從善若流和氣若陽春曰知曰勇曰仁如公有幾手書在庭口碑在道心香在族鄙立功立言立德不朽者三題定遠黎氏青雲屢云論功名消得幾多才祇熟精八股文章五言試帖以博取人閒富貴抑又何難然試問漢祖唐宗竟是那朝皇帝願子弟勉爲有用學須知道一時名士千古英雄也不過日用倫常求其無憾遂足與周公孔子同爲上等人材自題敦本祠堂聯云弓冶振家聲憶昔斬棘披荆受盡艱辛那堪此莫莫朝朝夫夫婦婦簪纓昌世胄迄今陔衍椒蕃難忘孝享惟憑茲年年歲歲子子孫孫代李朝瓊壽苟曉堂六十兼爲其子授室聯云君適當周甲年華聽一曲雲璈有畫眉人舞鳳謌鸞而拜我敢說長庚世胄問百篇斗酒與盾鼻土磨墨草檄何如賀王顯名續絃杜氏聯云王子晉一著輪

君又作神仙壻快到天台問灼灼天桃清福何如豔福好杜蘭香再生
降世願爲姊妹花續員春夢喚卿卿良夜新人還勝故人無賀劉某重
九三度續絃聯云太華記今日勝游詩豪酒豪風雨別開新氣象天台
有君家故事再至三至神仙無此好因緣胡夢周六月十二完婚聯云
元女太姬配胡公數萸莢歷年三千鴛枕夢回春思悄才子佳人成眷
屬先荷花生日十二鸞臺妝靚晚香清賀蠶桑學生龐文卿歸娶聯云
冰絲雪繭豔同功更歆德公文郎配孔明小姊乍歸從蠶市清班彈向
鸞吟雙拍舞玉沼銀蓮香竝蒂好踏瓊妃畫舫泛紅友金尊借禱取巫
山涼雨助成鴛夢十分員賀周和卿新婚段氏聯云交公瑾如飲醅醪
況逢作壻安香分到神仙玉露得阿嬌當貯金屋還願侍兒絳樹歌來
樊衛鍼言壽岳池周母十二月二十八七十七生日因孫十月受室迨前
祝嘏聯云領桐孫拜竹祖重闡添箇比肩人來助綵衣舞祝稀齡逼除
夕二日迨將介眉酒同醉小陽春代王顯名賀任篤欽四十竝其子新
婚聯云久不報少卿書舊雨重逢問年已及強而仕新得見彥昇子元
霜初擣授室居然冠者風代同學遙賀劉業新婚羅氏聯云人都道羅

敷嫁時對菊圃羣花何幸豔逢秋九月我卻憶劉郎去候隔蓬山咫尺
無緣醉話酒雙杯壽蔣金聲六十聯云從茲爲六十一上人憶舊雨羊
求朱書早拓辛家印相約在重九五日後看寥天鴻雁絳算同追亥子
仙賀彭某九月新婚聯云聞先人曾娶四十餘妻願後來八百年偕老
算此日已過重九半月請諸公一再醉何如又壽彭老五月六十聯云
尙平當建武末婚嫁都畢放浪名山家事勿相關趁好借重五葛醪閒
消永晝陸賈居好時間歌舞從遊往來諸子人生貴行樂況豔誇八百
萸莢遠紹宗風代羅篆香必傳題習藝所云萬善莫如勤望出頭還當
留意作工果幾輩堅忍相持你看此間樂否百般都是藝學到手那有
閒心爲惡便一生穿著不盡吾望汝曹勉旃壽羅姓八月下旬五十竝
其子娶米女聯云艾鬢颭秋風聽一曲霓裳上界銀橋仙子杖柳眉樵
曉月看聯車雲錦南宮寶墨女兒箱賀蠶桑學生查如蘭成都歸娶聯
云桑樹故園思趁春藹濃陰蠶學好將框種布蓮花君子愛願秋員香
夢雞鳴早喚釣徒醒挽姻家黎伏暘聯云幾間營別墅擬辦就百萬錢
程功指日那識海龕早待便儘他榴雲深處半壁偏安作室期肯堂願

將來補續新宮了結生前辛苦志六秩在明年望不到重五節驀地升
天回憶山館清談曾約我蒲酒香時一觴戲劇盛情猶在眼迄于今都
成虛語定知歿後未甘心賀易理燮九月爲子完婚聯云玉芝十八圖
頌寫新詩游宦歸來三徑暖黃花重九節香留泣蒂和風吹作一家春
題民國國防局聯云何時天下太平儘鷓蚌紛爭仗幾輩旗鼓登場鐵
馬金戈思將帥此日中原無主誰繭絲保障願大家風雲作氣槍林彈
雨造英雄代某壽其岳丈吳姓冬月五十雙壽聯云乃翁當謝傳中年
晉秋千十曲按部徵歌更逢新婦磯頭青女飛霜萬樹梅花宜小飲阿
子媿彩鸞夫婿先臘八一句聯班祝嘏好趁丈人峰頂麻姑進酒百年
風月與平分代陳甸芳壽其舅劉星垣茂才六十壽云卯金刀是四千
年望族得公後荷花三日嶽降嵩生便舊第重輝願靈光巋然長存幸
依圭室近申伯辛稼軒爲六十一上人爾日對禾黍連雲鸞歌鳳舞已
大家同慶愧康公我之自出未有瓊瑰詠晉侯贈李姓九月五十雙壽
并子完婚聯云此公其猶龍乎看蟻汛黃花剛同天上麻姑百歲平分
秋一半有子新詞燕爾聽鶯吟絳樹好共房中蘭季雙聲譜出月初三

合川縣志卷六十八

叢譚

六十二

挽世姻丁伯桂茂才

燦蟾

聯云去故園不卅里遙乃弟未決訣妻未和

丸子未屬續突噴灑滿腔熱血遽爾孤踪溘逝望斷周親祇教旅櫬歸
魂黃土埋餘遺憾在與良士結三生契憶劇館一招選場一晤書社一
談才經過半月光陰顧予同病獨存徒失良友此後釀金會飲綠尊少
箇故人來代黎申唐四十自壽并爲子完婚聯云海天金鼓震祇博得
青衿一領無補時艱撫髀感英雄憾遲我十年卿相梓舍鳳鸞棲豈冀
如絳樹雙聲員成春夢癡心殷禱祝願爾曹百歲夫妻題余洪興花店
內院聯云猛思量四諫風聲願後代兒孫重整頓曲江門第長見慣一
簾雪影有孤寒士女應留尋暖谷陽春題中門云把酒弄琴絃祇應流
水高山勾留客醉主人善當關嚴筦鑼莫遣楊花柳絮亂入簾來題大
門云賈服隨市井兒願衣被斯人當年早讀陶朱傳布衣識天下士有
風雪過我到此應憐范叔寒題客廳云敢云廣厦千萬間祇願如冰谷
回春到此地都無寒士閒憑佳客兩三輩留與彈霜天破曉問來人幾
箇知音

姻家陳潤生

澤民

茂才績學能文神寒骨重已采其典冊高文于鄉賢

本傳及文在而楹聯亦所擅場今擇錄其尤壽媿夫黎申唐五十竝得封典聯云皇恩隆四品封羨雲天雛鳳粹羽飛騰適逢艾紀雙添看謝氏階前玉樹凌風崇誥命兄事整十年長媿湖海元龍青衫潦倒只落萍踪暫寄向習家池裡扁舟載酒樂追陪又代申唐自題楹聯云一封書北闕飛來年方服政命爲大夫載酒試留題恰好頭銜光染翰五千里東倭游學子寄當歸父酬遠志致函殷望眼且教祝嘏免趨庭賀楊履貞茂才新婚聯云先太尉清白傳家豔籬角黃花好賞到重陽節過小郎君媽紅染句料畫眉綵筆曾經帶泮水香來輓中學堂學生王成章聯云人到百年終是盡劇憐筍輿載病奔歸百里家園訣別黯魂銷慘對雙親惟霑淚君今一死又何悲所惜藥石無靈惹噴滿腔熱血後來援口實恐教志士欲灰心又云淚灑灑望斷長江憶講舍風清橐筆裏書猶在眼血淋淋歸從何處悵英才永逝蘭摧玉折不勝情壽潘姓五十聯云春首月初三就侍座稱觥文章海內慚阿士期頤年甫半願閒居作賦雲水鄉中樂散仙壽王敬亭必成孝廉云笑問客從何來補蘭亭讌披鞦川圖乍雨乍晴好伴麥邱談往事不知老之將至爲名孝

合川縣志卷六十八

叢譚

六十三

廉登大壽考一觴一詠每逢詩酒作生涯壽苟文孺人七十聯云壽母古來有賢母古來稀問畫荻護堂幾輩干城誇將種季方難爲兄元方難爲弟看環榴花閣兩行玉樹舞薰風壽秦楹軒四十聯云重五作佳節在前一日懸弧後一日稱觴大家不醉無歸期共賞榴花菖葉萬石紹宗風已往十年爲壯將來十年曰艾此際及時行樂長相從佩玉渥丹輓黎資生學友云一家門戶望撐持若憶半年作室尙待補苴僅付託孤雛四面雲山誰作主七載丹鉛驚幻夢劇憐話雨聯尊便成永訣距別離兩日滿天風月念斯人賀但肇海建其父母忠節祠落成并爲其子完婚聯云溯漢都護報國捐軀經二千載流芳未沫秀挺出忠臣節婦璧合珠連縱殺賊撫孤備嘗艱苦到頭來鸞綸獎許與賢良名宦竝薦馨香其神有靈其人不死聽懸岩響水古樹號風猶想像擁戈登陴畫荻當閨炯炯精誠通上界笑卓王孫殉財溺志拚百萬錢廣廈頻開巧安排舞榭歌臺竹苞松茂願貞魂毅魄永奠幽棲屈指算鳩杖逍遙距左宅右瑩相鄰咫尺在邇不泄在遠無忘看燕賀雕梁翬飛綺棟更欣逢廟見菜笄門迎錦輻綿綿似續邕明裡輓其師張書田之父

煥然聯云同端午後七日生祇遲來卅載猶幸沐膝前化雨飲水知源
華祝擬賡歌方羨文孫有孫五代一堂稱壽考踰耄齡又三月整正算
到九秋條鬱結眼底愁雲泣蛩弔雁莪詩拚罷誦那堪小子亦子重泉
異地哭天親賀南充林惠門廣文六子新婚聯云梅鶴舊家聲一鐸歸
來猶處士鴛鴦新眷屬六郎珍重惜餘春輓張季澄之父聯云數春光
恰九旬周顧花鳥淒然弔客魂銷三弄笛與文郎才兩日別忙蠶桑未
了思親腸斷四愁詩題川主廟聯云此間潏錦水西來看桑麻滿野花
柳成蹊百萬戶快樂邨居遺愛難忘白綬蒼牛談往事有客唱大江東
去幸灌口風清郫筒酒美三千年循良郡守大名無恙河渠溝洫表殊
勳代唐逢源輓曾雨三聯云雲誼重車登記手翰交通劉公一紙君無
媿風流賸巾扇聽口碑傳誦葛相千秋我不如代友祝州官楊某母壽
云壺範佐清白風便傳經畫荻蔗境回甘慈芑蔭已期年剛思柬寄阿
環璇室迎瞻眾母母官箴聞蒼赤頌又飲水知源讓堂上壽趁春來剛
十日好共桃陳曼倩興歌唱徧大家家代牧畜廠股友輓符佐清云許
多事業待商量記娓娓清談當前氣象萬千瞥成新鬼如此人才先死

合川縣志卷六十八

叢譚

六十四

去問茫茫天道此後羣羊三百付與誰人代陳其漢送姊丈李成之三
十適學醫卒業聯云十五好劍術三十成文章當年倚馬千言斗酒風
流羨名士訪醫高參政得脈郝氏老此日傳薪一貫藥籠香滿賀衙推
賀龐爐峰續絃聯云君但見新人笑邪念歡承背樹慈蔭掌珠任教襄
水鳳雛驥足千秋徑覓得侯封定遠爐峰以定遠勸學暫權知事云合幾多妻道母道
婦道儘今宵談心繡幙數盡雞籌種種深情知未已我就與德公談耳
幸離鸞有鸞斷竹續竹恰好天邊蟾侶蛾眉一曲與共對仙馭臨空約
不定花時月時酒時願此後銀缸伴讀警欹鴛枕卿卿良夜問何其賀
何伯成績娶小姨蒙氏云笑阿蒙非復當年正喜上眉梢依樣重描螺
子黛與小喬又爲夫壻聽曲成尾段搔痕還染狀元紅題胡繼芳新婚
號匾聯云繼晷蘭膏鴛夢警芳春柳黛鳳聲和羅崇道云崇賢香夢多
情甚道韞清談領解無輓蠶桑學生劉業依云沔彼流水逝者如斯渺
不見伊人慘教雙淚垂珠合別恨離情都付與大江東去子有衣裳宛
其死矣愴相逢故僕爲檢半肩行李拭汗濡血漬空盼到斜日西歸藻
采繽紛風華掩映皆楹聯之佳者餘尙多不具錄

楊華珊孝廉乘春英歲敏才光緒丙子與予同遊趙芝生先生之門旋

同受知于南皮張文襄公予年將十八華珊未十七也時華珊兄駿聲明

經乘鈞亦同學而尙未遊鬢才思不減乃弟一時有大翰林小翰林之

目予亦蚤有神童之譽先生因泣偁之爲一門三俊嗣後渝省之試輒結隊行華珊領己卯鄉薦時寓予錦江齋中修正文字摒擋事務一皆以予任之蓋華珊固兄事予予弟畜之不啻胞也及華珊北上至忠州破舟僅得不死會試薦而不售益鬱鬱歸遂病不起次春森楷聞之往弔挽以聯云英才應運而生本期經濟文章百世與君同不朽名士爲天所忌可惜河山今古一朝舍我竟何之雖非極意之作而詞真語摯固非如塗塗坳者比也華珊無子有傳在鄉賢三

庚辰以後予讀書文翁石室多有求輓壽聯者夥不勝書今就所記憶者錄之爲書院生徒公輓鹽道崧蕃之夫人瓜爾佳氏聯云寶婺九霄

沈望縹緲瑤京花黯碧雲春欲老月時初三瑤雲全蜀庇聽詞吟石室粟分

紅板澤猶新鹽道職筭書院款項崧特代光輝廷旭孝廉輓其胞叔某

副都統云忌公者何人乎骨鯁誤頭銜太息功名空竹帛時爲將軍恆

合川縣志卷六十八叢譚

六十五

病以死視予其猶子也心傷攜手別空餘風雨哭花朝壽楊母潘宜人云

賦射雉之篇獻銜鱸之頌繙丸熊坐鹿之文身獨嗣林下風徽計六十年于此炊青精之飯蒸丹棗之饒泛黃菊紅萸之酒口徧食人間煙火願八千歲猶然節孝李林孺人五秩暨令次婦貞女林氏立嗣竝季郎加冠志慶聯云兩世凜冰霜母節行堅女貞花好坤維詎數數見與林下有高風允堪綽楔旌門管彤輝映三千古重陽過風雨明懸孤月圓到雙星家人蓋雍雍如也李中餘永日更看弄孫抱子布素安居五十年壽吉翁八十有一生期二月聯云家乘湖南燕記馮翊分支晉昌著節更千七百年枝葉滋繁有出塵人爲住世人當廣夏尊開恰好畫圖繙九九歲華屬東帝看緗桃吐葉豔杏敷英又八十一瓣梅花數遍藉婪尾酒作介眉酒願長春頌獻仍將福履祝重重代某賀其親家次男完婚并其婿弱冠之慶聯云臘酒正開尊喜跨鳳仙人笑詠催妝來梓舍春華須努力願乘龍佳客勉將射策逐蘭成代某同學公祝其友母壽五十九月生日聯云與梓舍訂蘭交憶拜母登堂護馨早被二三子值艾齡開桃讌願飛仙住世菊壽還看五十年爲蔣姓送其岳丈六十雙

壽云舊系溯西京憶杖國初榮祜篤齊眉懽梓舍華筵闔北海看櫻觴
疊晉蔭叨坦腹伴萊衣輓米肇典祖母八十有九聯云蓮心苦盡蔗尾
甘來算百歲光陰猶歉十年回味美梓樹材翹孫枝穎擢願九京庇蔭
只遲三載遠程騫時肇典新遊鬢又賀肇典續娶李氏聯云梅嶺獨探

遠承重故云

春想文卷初投定知才重盧生已將狀頭邀李女桃源重打槳看畫書

滿載人識船爲米氏爭將洞口指漁郎爲李姓兄祝其弟五十雙壽云
柱史紹薪傳正逢北海春濃鵠原聚首詞棠棣梁妻齊艾紀更喜東籬
秋滿鴻案同心賞菊花祝李華孺人六十生期二月十二聯云與百花
同日而生試證蘭因蟠桃實熟三千歲看萬葉凌雲以起更延松壽仙
李根蟠六十年爲壻祝岳李某五十雙壽生期冬月聯云仙李露華滋
喜席設肆筵恰好艾年能服政官梅霜葉染看觴偈貳室剛逢葭管動飛
灰祝賈包孺人七月六十并其子完婚聯云訓垂論語策佐治安母道
夙堪欽六十年華添鶴算巧渡雙星明懸孤月慈衷今載懌九重仙子
配半郎代李秉剛壽陳閔孺人八十云回苦作甘有旨哉更繞邨曾玄
壽寓敞華筵是兼備九五福相夫教子成家矣猶終身布素義門瞻懿

合川縣志卷六十八

叢譚

六十六

範還相期二十年公輓宣慰使黃金鰲之母陳太夫人聯云來須窺牖
去不牽裾仰賢母風規要使雄兒成遠志生已展眉逝應暝目望上仙
雲影倘教富媪列清班輓節孝伍胡安人聯云節義豈求名觀療夫割
股五十年始露示癍花可知鳳詔褒嘉自風化所關斯人無與算籌亦
餘事聞教子勞心六七種竝日常演草忽報鸞驂遠引徒雲天在望阿
母安歸挽楊滄伯太翁徽之老伯云是嘗以畫干諸侯憶曾行歷艱難
寫愁不盡山千疊幸得使君還本郡惜未坐看政治壓重空餘土一坏
徽翁善畫以滄伯二次革命軍起寓居海上以終故云又代周介夫寄挽云有客傳畫圖海上滿
紙愁雲方期淨埽歸途日夕見新豐雞犬何時灑幕府山頭盈旗深雪
祇好遙空祭酒英靈鑒故里鵝羊賀縣幕蔣錫九茂才文郎續絃新婦
周姓其父與錫九父子同充永川縣校教員婚期三月二十八日聯云
徽音嗣太妣之遺想乃翁與喬梓同堂教授早結下文字因緣今鳳譜
重修定知之子歸來柳絮高吟新句好佳境去天臺不遠想賢郎自家
山前路追尋仍成了神仙眷屬遂鸞膠永續長保渠儂厮守桃花豔福
晚春多戊午秋予年六十其三月爲舊姻李緒三五雙壽聯云君五

十春我六十秋相望在一年中偏輸他偕老雙星看富貴花開剛逢吉
戊遑爭大戊小戊新百萬宅時遷居蓮花老屋新葺飾之 舊千萬壽最好是三月內

都來此喜樂永日同慶長庚何問先庚後庚六十自壽聯云辛苦源遭
逢孺而孤幼而學中而實業晚而倦遊來日大難敢信有六十載社會
閱歷壬林聞頌禱菊半放月半圓生期在九月八日故云 事半功書半箸錄好

風相續還須得五百年名世挺生時娶第三子婦家茂森兄祝賀一聯
云眼底眾雛成豆觴羣晉耆英會邴前三婦豔菊酒雙斟福壽杯身分
語氣尙自合拍餘多不錄

夔府鄧雲笠徽績 茂才余老友也遊夔後數試不售乃改業商初販石

印書獲利聞洋火柴利不貲至重慶集股立廠已出貨矣而藥劑未十
分適宜因有然者有不然者遍求改良術無效乃托調查名自赴日本
訪之仍不可得卽折節與火柴工某論交酒食徵逐致相樂也既與稔
則稍稍叩其術數月盡得之始歸而試作之有驗然前貨猶山積值可
數千金雲笠議盡拉雜摧燒之俾清夙穢某股友持不可則分而爲二
所謂森昌正也雲笠獨貿森昌泰記燒積貨無餘新貨遂大暢行森昌

合川縣志卷六十八叢譚

六十七

正至竟不如始悔不從其策已無及矣森昌泰營業既佳不五年贏饒
十餘萬雲笠謂可少閒遂理舊學琴書自娛祇和藥劑躬爲之餘悉
以付主者前後可十年虧累至巨萬以上雲笠始覺亟思補救倉卒不
如志然聞予蠶社須款猶慨然出四百金相假蓋好義其天性矣宣統
元年以廠事來成都寓北打金街予時膺省中校教職過從甚密年餘
歸去余錢之江廈健康無恙也未幾訃來則雲笠逝矣予追念夙昔悲
從中來爲聯輓之云西南風氣是誰開數實業界英雄歷史君然犀照
我起蠶眠俱歷盡瀛海驚濤餘茲悲憤予長蠶社時亦往日本調查故及 每深燈對語
老淚縱橫惺惺惜惺惺不禁拊膺三太息東下江流催客去憶臨別時
朋友贈言公子燕歸詩人鶯在好趁茲桑榆晚景樂此逍遙忽遠道飛
函悽音愴惻唧唧復唧唧那堪回首重思量作成乞諮議局議長廣安
蒲伯英殿俊 主事書之適有要公未暇轉問能書友人數輩多外出涪
州蕭秋澍湘 主事聞之問聯文長短如何予爲誦之秋澍欣然曰是聯
大佳予書不辭矣予曰然則聯苟不佳將終無人書邪相與一笑
春聯取干支爲之非大家數然偶弄狡獪亦自不妨要在典麗無俗韻

耳憶予前掌振東鄉校時頗復爲此門人郭雨蒼生霖嘗最錄之今据所記者如丁亥聯云丁鴻品重無雙席亥豕書明第五車丁沾曉漲過新雨亥陞春深湧惠風丁零玉佩春如海亥旣珠懸夜有光戊子聯云戊社春融雙燕靜子園風細一鶯酣又云戊鼎奇文爭古色子山小賦作春聲己丑聯云己公詩派能醫俗丑父聲情欲教忠又云己心夜靜常思過丑地春深已送寒庚寅聯云庚橫應叶天王兆寅直從修弟子儀又云經籍道尊合向下風拜庚子春陽瑞藹端逢出口話寅賓辛卯聯云辛伯未應誇義俠卯君願與議文章又云艱辛求學金無價剛卯逢春玉有光壬辰聯云壬林詩詠宜多福辰極星回又早春壬人遠去朝無倖位辰星安居家有賜書癸巳聯云癸觚陳列古香滿室巳日被除春氣溢閭又云吉癸盥存比干字上巳詩得羲之書甲午聯云甲第花明春晝永午莊草輒晚晴多甲帳兵間看試馬午門天遠想鳴鸞乙未聯云乙科策應金門詔未雨花圍玉檻開乙夜待磨修桂斧未春先辦買花錢丙申聯云丙穴魚遊知水暖申江燕語覺春深丙吉行春牛喘息申胥祀夏虎賁聞嗣後東西奔馳止不復作間有所作如庚子辛

合川縣志卷六十八

叢譚

六十八

丑掌教鄰水玉屏精舍癸丑辟地江北嘗撰述干支長聯脫稿以後隨手散失不復記之惟丁巳冬由省回州視學塾江黃葆初鴻烈請作門聯予書十四字付之云戊夜雞鳴猶雨晦午朝蠡鬧正雷轟時南北戰爭方起吾州又有周督軍兵變之禍紛紛擾擾幾無甯晷蓋感慨者深矣

予終鮮兄弟而得朋友之力爲多故于朋友一倫極重然如遂甯張梓

屏遂良

甘化南棠

射洪劉文卿

光謨

安岳張麗青

■皆聞喪較晚不

及弔奠未有所作今錄輓宗人張芝字正常州同聯云公果營菟裘老

邪如聞賢勞厭苦作計抽身辭世剛才傳一語天何奪右侯速也奈當

權利競爭臨軍失帥憑棺那不哭同聲輓曾雨珊

紀鍾

司馬聯云愛我

若弟誨我若師此誼本無多那忍撫屍成一慟生誰爲來死誰爲去時

子蠶社與絲廠有轆轤由州官請託和解而來道卒于渭沱場

斯人如可再猶將把臂與重論代錢店

夥輓聯云君眞國士無雙算背水功成旗鼓曾叨同大將誰是軍諮第

二對心香瓣炷扇巾猶欲起先生代易香墀輓聯云人推祭酒荀卿曾

將誼關紳學諸事完成猶抱熱心支大局我亦中年謝傅那堪服徧期

功餘哀未已更揮老淚哭先生代局士姻家秦吉軒輓聯云憶公局事務從容之暇剪燭談心承知清白相傳女蘿竟許孫枝附當權利思想發達之時臨岩撒手頓覺蒼黃無主友竹同深子夜悲森楷自記予讀古詩文集每喜集其句爲聯語隨手餽釘未有稿本往往散失不可復得今將見存者錄出如下

集陶淵明詩聯語

朝霞開宿霧

觴絃肆朝日

談諧無俗調

天高風景澈

微雨洗高林
平疇交遠風

瑾瑜發奇光

林岑聳逸峰

山氣日夕佳

清氣澄餘滓

揮杯勸孤影

鳥噪歡新節

戶庭無塵襍

春風扇微和

高嘯還舊居

露凝無游氛

園蔬有餘滋

望雲慙高鳥

奇文共欣賞

得歡當作樂

量力守故轍

懸岩戀餘暉

春風無息時

立善常所歆

虛室有餘閒

精衛含微石

眾鳥欣有托

厭聞世上語

猛志逸四海

羈鳥戀舊林

孤雲獨無依
游雲倏無依

饑食首陽薇

和澤周三春

沈陰擬薰麝

年饑感人事

詩書敦夙好

春秋多佳日

合川縣志卷六十八

叢譚

六十九

臨水愧游魚

時還讀我書

園林獨餘情

園林無俗情

白雲依山欣然良對

朗率多通聞善則樂

妙德高偉清英超世

青松夾路旁若無人

清亮絕俗非法不言

體性忠直聰識知幾

清高雅達名棲四海

巢由抗行夷皓峻節

卉木繁榮和風清穆

孝友貞固學冠羣儒

璿玉致美桂椒信芳

芳華鮮美落英繽紛

天氣澄和風物閑美

不累于俗不飾于物

靜月澄高溫風始逝

花葯分列林竹翳如

相將以道相開以言

清琴橫牀濁酒半壺

滄勝如歸聆善若始

貞風凌俗道不偶物

隱身修學動必以禮

入鳥不駭雜獸斯羣

清言究微學非僞師

挫廉逃名悠然其懷

稟履元知立性純固

父老堯禹錙銖周漢

名播四海清英超世

抗名山棲養志浩然

退隱山谷敦樂詩書

學綜六藝窮通究微

獨正者危至方則礙

閑靜少言聆善若始

簡弄煩促就成省曠

惟和而峻雖博不繁

奇絕異語棲托仍高

偶愛閒靜不慕時倫

樂勝朋高好是文藝

少學琴書不慕榮利

宇曖微霄山滌餘靄

挫廉逃名不慕時倫

退隱山谷漸近自然

樽有新醪園列初榮

解體世紛結志區外 畏榮好古薄身厚志 器量宏深究極篇籍
晨采上藥夕閑素琴 汲流舊嘯葺宇家林 風致孤邁蹈厲涪源

雜言聯語

心好異書開卷有得便欣然忘食
性樂酒德顧景酣宴或造夕乃歸

集柳文惠集聯語

高步謝塵埃 栖息期鸞鷲 披霄抉漢出泱泱 捕龍蛇搏虎豹
古道繞蒺藜 候吏逐麋麋 星流霞破相參差 斬梟驚連熊螭
怒鷲麕抗喬岳 煥浮雲噉朝日 摩九霄撫四海 勉萌芽傲霜雹
奮鱗翼乘風波 逐奔星先飄風 頓地紘提天琛 薄蓬萊羞崑崙
涉蓬瀛登崑閩 欽聖靈仰光曙 脫鱗介生羽翮
超鴻濛混希夷 抱元淳稟粹和 扼龍吭拔鯨鬣
清秀瑩澈鏘鳴金石 不戚于兒不悻于口 以稼則碩以植則茂
汗漫輝煌呼噏陰陽 相晞以生相持以成 與古同極與道同波
遇節必立應機能斷 疾風驅濤擊山盪壑 侔高狀明包含海岳

合川縣志卷六十八 叢譚

七十

強以有禮幹而甚文 比詞聯韻舒翹揚英 抉異探怪疏離空虛
海霞島霧厚自潤澤 瞻仰德宇高逾嵩岱 煅煉剪裁脫去穢累
儒言經旨夙有聞知 聽聞善言樂甚鼓鐘 濬滌盪沃蒸爲清氛
焜耀昌時振興後學 炳耀文采周流學植 推義赴仁韜忠褒信
稟承粹和篤守天經 讚詠道真濬發清源 緘鉗塞默蓄靈擁休
剖微窮深擔重揭貴 陶煦淳懿載其愉樂 輕出財力如索水火
抉異探怪披華發輝 啟闢險阨夷爲大塗 敦尚儒學載申舞歌
省方宣教化制殊類 離疏空虛乾坤之量 智勇承基忠貞繼佩
冠仁服義讚詠道真 跨騰商周堯舜是師 沖漠保神優柔隸儒
正聲迭奏雅引更和 爭裂綺繡互攀日月 笑詠唐虞薰襲里閭
垂露在手清風入懷 轆轤璇璣經緯星辰 振發枯槁決疏潢污
貌不矜功情不伐喜 挺身立氣無改其節 制立謨訓歸之帝力
積爲義府溢爲高文 比詞聯韻相晞以生 振拔英氣邁于常流
高節外峻純誠內植 列坐爭英羣談角智 紛綸華燿繼武而起
清標霜潔馨德蘭薰 舒萃軼眾吐綸冠時 炳蔚文采希聖爲徒

貞心勁質用固其本 近仁復禮物議歸厚 藻鏡洞開秋毫在照
淒神寒骨自適所宜 匿德藏光退居保和 珠玉將至寒谷生輝
單庸撇苜果于直道 貞和端懿雅不羈俗 振宣幽光激厲頽俗
鏗錡炳耀得毋脩容 清瑩秀澈淡爲安流 陶煦淳懿濬發清源
周流辯論有疑必果 搜擇融液與道大適 出處同道發在簡素
盛德餘慶宜福其豐 瞻望清風植志不回 進退兩尊榮于策書
衝濤旋浪退貯溪谷 華燭飛觴廣筵命樂 高山在前流水在下
海霞島霧下上星辰 握蘭起草剖竹頒條 清風自生翠煙自留
以暇以息如在林壑 溫風不爍清氣自至 邇延野綠遠混天碧
既會既遠淡爲安流 列星下布眾山回環 手揮絲桐目送遠雲
回環日星臨瞰風雨 頡頏今古優游德藝 披草而坐傾壺而醉
陶鎔帝皇跨騰商周 藻飾文字洗滌精神 思疏若暱惕爾若遐
穹若洞谷翁若林麓 屏以密竹聯以曲梁

集李滄溟詩語爲聯

合川縣志卷六十八 叢譚

七十一

先民有遺則 白日坐失色 清風響高陌 流森激長夜
爲樂及盛年 黃鵠難爲羣 明月促曙光 煖火辟列星
洪波盪大壑 悲風墮白日 至和液甘露 清流濯織錦
明月出高天 新月拳素光 長調激清風 奮響發浮雲
雲霞絢河漢 沅澧飛素液 鳴鏑吐清光 蒹葭淡餘映
日月發光華 河漢懸清光 鳴鏑控流森 河漢懸清光
金簡歆浮景 離朱不逆景 雲霞耀朱闕 硯石猶堪礫
襟佩搖華星 素暉蕩清流 子推獨嗜乾 鴻鵠摩蒼天 文章未盡才
白髮終憐我 落日堪相憶 綵花可憐色 擁褐江湖色
青山好屬誰 流雲忽自歸 平潭淡不流 抗迹唐虞廷
言尋韋杜曲 驅馳如昨日 浮沈托大道 風塵餘鬢髮
俯瞰江漢流 艱虞失眾人 恢臺戒隆曦 蕭條自世情 滄海傍詩名
藝苑策高足 邊郡多豪俠 雨氣蕩暄濁 黃花媚秋媪
華髮繫微名 文章凌先秦 功名老漢臣 秋意颯江湖 白羽蕩春風
黃塵昏落日 白日移高枕 紅顏辭上國 青陽高積晦

青山苔放
白眼入中原

青雲合後時

白日澹幽州

白雲淡蕭晨

池亭入幽豁

石色含霜活

千金抵白髮

天晴雁影淡

風塵動渺茫
茅茨足酣眠

溪光逼酒清

列嶂黨青天
萬壑步清霜

春盡雨花明

新世發神秀
回岩抱幽獨

世情搖白首

秋花雨還瘦

返照生殘雨

孤磬散清涼

鞍馬照紅顏

清霜角自哀

浮雲矯上春

絲蘿謝依托

仙吏時投青玉案

客來白髮誰相憶

風塵足壯遊

才子新傳白雪篇

亂後高名眾始知

吹律春風回黍谷

江南薊北俱搖落

上書北闕煙雲壯

還車秋色照鐘山

霜毛短鬢共蕭疏

拂衣中原風雨來

君但論詩吾且睡

落日孤城風雨合

雨雪蓬嵩共三徑

我今何言公亦休

濁酒新詩日月閒

風俗春秋自一時

綵筆憑陵朱絲濕

下界蒼茫元氣合

染翰白雲天月出

高雪遙臨白馬寒

故山高卧白雲多

倚檻青山席上來

山中鴻雁三秋色

千門過雁來秋色

萬里浮雲連渤海

杖底風煙萬壑鐘

萬里登車覽大荒
十載浮雲傍逐臣

九峰寒雨壯秋陰

合川縣志卷六十八 叢譚

七十二

笛裡春愁燕塞滿

檐帷大漠風塵黑

落日中原看倚劍

山西風雨錦溪寒

鴻雁高飛木葉丹
玉壺春酒石榴紅

故人風雨一登樓

二水寒光搖落照

百粵大雲搖海色

萬里浮雲連渤海

五雲佳氣接蓬萊

千山朔氣壓漁陽

千山朔氣壓漁陽

岩壑盡含滄海氣

白眼自宜置秋壑

久客高吟生白髮

陽春先動楚宮篇

黃金無處買春風

孤臣容易老紅顏

集李空同詩聯語

鸞鳳眇焉托

蝙蝠時自廢

堅冰滿川澤

青雲貴自立

鸞鳥不可爲

鳥雀各有安

盛陽麗樓臺

白髮忽見嬰

玄雲驅難泊

雪風起玄朔

雪風起玄朔

霜隼厲秋翻

白日忽已冥

冠蓋耀春雲

光耀在青雲
上下始紫虛

燭龍躍天門

春風兩蛺蝶

靈根豈叢蒨

寒潦泛中軌

潛虬厭污踐

湖海一浮萍

弱木無高枝

迅風邀高雲

逸禽恥淹栖

高鳥厭塵集

翔鶴在天路

城波靜綺席

朱鷺激潛調

逸禽恥淹栖
逝鵠無卑居

鳴鶴矯豐田

塔蘿裊清尊

黃鶴舞高岑

落星動海日 綠水含瑤采 白鵠舉雲漢 蘭蕙被幽谷

飛沙吹笙簧 白日激古湍 玄鴻漸河干 菰蒲裊寒陰

和風卷凍霧 積雨豁新霽 繡石盡成蘚 玄蟬共西夕

隱霰舞鳴湍 懸岩激鳴湍 山雨獨響松 鯢魚獨北溟

深心託玄素 農經發玄旨 芳甸恣幽騁 清風激頑懦

佳期渺滄洲 珍叢媚朱交 清雲曳徘徊 織羅振芬芳

倦鳥厲歸翮 商氣斂芳潤 融景遞澄秀 逸雲散歸雨

志士懷剛腸 日華耀清漣 孤華媚幽陰 驚風蕩回川

飛泉灑丹巘 時平智士拙 月落歸何處 英論薄煙漢

溢霖驚洪濤 歲乖君子平 竹涼時自來 靈籟度笙竽

寒江戀夕霽 大江積風雨 絮雲吐岑岫 若華耀四海

野飈激靈襟 古編光日星 風林奏笙簧 神龍處九州

沈吟惱蟋蟀 古色積煙黛 游絲冒白日 移山媚戶牖

瑣言訾螟蛉 華春敷明陽 對酒歌綠漪 倚杖看風雲

噴薄倚日月 月上雲霞散 野色吹寒意 窗燈留夕照

合川縣志卷六十八 叢譚

行藏老蕨薇 日黃風雨來 家山傍海歸 江海蓄春聲

葉明深坐鳥 日落林光淡 黃鳥晴吟竹 古今如逆旅

花疏轉喚鶯 晴空鳥路長 丹花淺映渠 天地本虛舟

日分天欲斷 水花邀去節 萬里危樓夜 雨留杯酒暫

沙寒鴻自饑 山鳥勸離觥 孤槐清月中 堂開積水圓

隔雲清磬濕 日暮遠峰出 黃熊赤羆力相食

落日亂峰陰 天秋過雁知 錦瑟翠蛾心莫疑

龍姿鳳苞生不易 蒼松翠栢世希有 珠花繡草枉自豔

明珠美璧世無雙 燈繁月明夜何長 鳳儔鶴匹渠豈同

虎嘯猿啼且不懼 刺船擊鼓會親戚 圍爐煨芋啖濁酒

雞肥酒熟時相呼 桂宮蘭室栖王孫 漱芳茹膏滄玉漿

荒煙白草古城沒 平津結兄蓋侯弟 龍鼉徙穴蛟龍逐

羶帷錦幄冬夜長 萬金顰帶白玉鉤 青鳥為伴文鳳俱

鷓鴣雙飛鴻雁宿 龍鱗犀甲倏參錯 天球銀甕世希絕

青鳥為伴文鳳俱 飛鼈擊鯨翻難具陳 雕欄玉檻圍周遭

白璧青蠅從點缺

黃山紫陽日寂寞

黃山紫陽日寂寞

憂金敲玉何繽紛

金枝瑤草真有無

金燈翠旗光有無
雪晴雲氣相鮮新

釣魚獵兔亦得飽

嬌鶯乳燕黯不語

蜨煖蜂暄從自得

石泉白雲誰復爭
白鵬黑猿相兼啼

嫩葉柔條空自稀

鳥黃沙白為誰飛

桂岩紫芝春盡發

放兔飛鷹無不可

江寒雨急莽無路

金燈翠旗日來御
玉明琪伴時相追

鼇掣鯨翻難具陳

鼇掣鯨翻難具陳

陰霾蔽日岩洞黑

四顧乾坤莽明滅

彩虹倒挂青天霽

朔雲吹沙秋草黃

兩間霜鬢且從容

蛟蜃下徙龜鼉沈

空山野陰雷雨黑

綠蘿無煙山雲暝

龍盤鳳曲留雲氣

虎啼猿嘯蘿燈紅

白日不動青天高

鼉喧龍門真愁心

休令黼黻厭岑寂

獨樹開花特造次

鳳凰不識梧桐樹

聊與煙霞作主人
要與琬琰增璘珣

遊魚吹絮敢橫行

蛟龍終收雲雨功
鳥雀應疑簫笛吟

天寒日暮行空澤

白馬青袍動江色

驚雷不下蛟龍鬥

反衡閉門讀古書

芳草月明聞櫂聲

甯海無波鸞鳳來

青天落日下帆影

青天寶塔還今古

合川縣志卷六十八

叢譚

七十四

紅衣白馬如神人

赤日珠光乍有無

集弇州詩聯語

密雨戰炎歊

隱林遁餘雪

低春出遠色

醍醐釀甘露

涼思躡嘉蔭
東峽饒奇聲

新月宵疏篁

高掌媚太陽

桃李媚春陽

凜陽依芳樾

秋鳶搏羊角

呼觴陶嘉月

煙澄淮楚出

澄露滴華桐

穹廬出蛾眉

唾玉落滄波

林盡華崧移

白眼冷相睨

青燈耿相待

青天渺無跡

蓬心逝安適

青衫彫自憐

綠醕驕欲鳴

白雲時與閒

蒿日中竟乖

乾坤迫遲暮
風雷走晴晝

雷霆橫白日

中流蕩日月

星河莽相屬

雲霞分故山

霜卉動青陽

攀天動星辰

峽雲寒自明
天地遂不貧

玄颺逕幽篠

如剪湖水綠

玉盞澄天酒

東輪背西鞅

朱華照素漪

坐見青天危

金掌出層霄

陽蕙動陰條

納雲穿奇構

高霞冠璇表

交游盡緋紫

眼底互青白

畫石聚清漪
落英文素漪

流颺蕩銀鋪

山岳起蒼黃

舌在各雌黃

道書久不讀

青崖覆蘿髮

大笑秋雲白

裁霞竦飛構

蘭芬時一來

紺水澄明曠

能如晚照紅
何限春山青

緒函就歸颺

殘編送餘日

窗延縱橫碧

芳波初成綠

宮商偶叶合

演辯駐迴風

階藉葳蕤紅

斷壁空吐青

梧竹表餘棲

人事有代謝

乾坤吾輩在

醉扶天地語

時禽驕孤邁

吾道甘陸沈

天地一身明
戈甲此身難

時來花草香

高閣延遠清

芳草妬人跡

新茶收月供

停雲冒成絮

開尊從父老

空林恣鳥啼

海日割夜生

東風謚為狂

歸計入耕蠶

江湖滿天地

山靜泉聲遠

晉楚齊秦匹

風雲各是非
往來成古今

天空夕照遲

東西南北人

尺書盡護諸校尉

疏簾小簟情何限

越南燕北人何限

一葦坐埽千餘皇

長鋏短調秋轉孤

炎風大雪天無功

星斗垂天各南北

霞使雲君偶跋扈

便為晚景老邱壑

石室流泉無古今

帷天燭星無恆居

安得明鏡長少年

容有燕雀知鴻鵠

鷓鴣卑栖鴻鵠笑

鵠雛頗遭老鷓嚇

銷冶干將成鉛刀
時見磔鷓仍鸞蚪

赤覲駁牢黃金摧
靡與為友龍蛇俱

枳棘誰為鳳凰棲

合川縣志卷六十八 叢譚

七十五

迫脇江山傲千古

偶然欬歎忤風伯

欲詣扶桑數紅日

卧看日月浮雙漚

未容魑魅快時人

坐看西崦生白雲

回首中原暮山紫

四海未妨吾輩在

六尺居然鼃黽伍

笑指高堂千嶂青

七尺不受朱門權

孤亭僅與世人違

醉後看人成偃蹇

孤蓬倚樹鳥驚宿

折腰自偁牛馬走

歸時促騎故徘徊

白露濕衣人在空

觀海故發龍蛇顛

亦知元凱多卿裔

一枕時橫白雲裡

扁舟一葉天上下

欲與何戡唱渭城

雙鸞埽盡黃金堆

茅屋數間水西東

空庭種樹成書帶

浮世流言窮自定

畫裡江山難著腳

小閣看山似畫圖

餘生天意欲何為

天涯書素好論心

昨夜月明今夕雨

酒病畏深詩畏淺

老夫獨坐且青眼

前軍鏡吹後宮愁

棉花盈牘米盈困

何物窮途能白頭

海內聲名雙睥睨

海內幾人新白髮

水鏡幾曾當白日

賦成湖海一綈袍

生涯雙屐滿青山

冰壺原自寫青天

崢嶸未病驚人筆

風外游絲塵外事

忘機頓覺天地闊

黯淡長浮避客杯 今夜思家昨夜歸 餘生不傍古今愁
休論白眼狂時事 烏頭催風白頭雨 自緣衣食猶關世
只合青山學老農 醒時呼酒醉時眠 誰從天地更論才
未成綵筆看玄草 莫向山城輕白日
總向青山領白雲 還將詩句乞青山

集信陽詩聯語

東風吹綠草 鳴泉瀉丹壑 絕巘夕光白 代越各有性
澄波生碧落 荒途橫白雲 出日市煙黃 桃李終無言
潛鱗慕江海 迅飈激櫺牖 日映丹霞爛 流波委頽魄
赤驥鳴煙霄 澄空斂霜煙 花夢碧崖紆 碧風會浮雲
百年幾員缺 瑞日轉華觀 暝色起孤岳 遠渚接餘景
萬里各風塵 宜雪被高吟 秋陰結靈霏 輕噉散華池
瑞日轉華觀 新陽獻青歲 碧沙沾細雨 丹岩含宿雨
祥煙拂瑤壇 膏火含珠光 白日抱殘虹 白日映輕雷
蒼林橫落日 青山過片雨 平疇藹風日 煙蘿裊青壁

合川縣志卷六十八 叢譚

七十六

青嶂拂歸雲 碧澗下殘虹 入谿下煙荒 芳蘭冒紫葳
古城積陰雪 聞雞起中夜 落花寒食雨 游絲冒白日
芳詩灑清風 游魚安深淵 遊子故鄉心 靈葩耀朱蕤
流焱安芳草 青壁結煙靄 白沙互迴渚 飛鳥戢羽翼
高藻厲孤桐
行詞響空榛 白雲蔭崇阿 青雲翳晨光 轉蓬戀本根

攀林摘崇穎 開軒望明月 世事相倚伏 日月雙龍劍
拳拳振微風 結藻揚華風 吾志卑公侯 乾坤一酒杯
野闊窮秋出 夕陽生斷墅 孤松秀雲壑 野霧沈寒日
歲晚大江深 細雨戀重裊 遠水抱寒空 雲岩落暗泉
平沙足晚雲 樹陰深坐客
積雨稀來客 浮雲滿天地 碧潭寒吐月
野水入荒城 潮影動樓臺 古樹密屯雲
青嶂拂歸雲 江雨暮生寒
亂山浮落日 斷雨藏深浦 人家亂水外
高樹足殘霞 晚日媚殘花 馬跡萬山中

黑髮紅顏未曾改 芳筵白日苦太短 金袍銀帶不復視
明珠白璧豈足多 紅顏青鬢安能常 龍顏鶴姿豈易馴

鯨吞鼉駭那可測

遺簪墮珥不知數

海思江情浩無極

龍盤虎拏終有神
龍顏鶴姿豈易馴

傾湖倒海安可量

河轉參橫歡莫歸

白蒿黃雪不知暮

干戈萬馬俱辟易

鳳凰不栖鷓鴣怨

青狸蒼兕相對啼

十靈百怪相護呵

虎豹為衛蛟龍宮

青春已破白日暗

峻坂懸空容一馬

只有牛馬無豺虎

黃河欲渡濁浪深

驚壑赴濤動萬牛

每投桃李報瓊瑤

手翳鳳凰跨騏驎

寶釵玉珥黃金錯

鼉極虹梁開恍惚

言從滄海尋丹邱

花顏雲髮青錦袍
蘭煙蕙火薰香牀

卧龍儀鳳樂棲遲

赤霄青雲暮延佇

朝排閭闔暮湖水

已恨緇塵侵素服

霜魂月魄獨娉婷

東至滄澥西黃河

不教青鏡老紅顏
別起雲霓接霞臺

玉骨冰肌自枯槁

江吞海吐互窈窕

清淮大河見顏色

鯨翻鼉擲爭嶙峋

痛飲狂歌如隱淪

瑤宮玉殿開雲煙
白露青霜共暮寒

清淮大河見顏色

清淮大河見顏色

氣象久瞻陳伯子

玉階碧草搖金鋪
江月湖煙縮別愁

紫蘿白穀垂香風
蘭煙蕙火薰香牀

風雨嘗懷老鄭虔

半空樓閣星河動

詞章亦帶煙霞色

黃金白壁俱閑事

合川縣志卷六十八

叢譚

七十七

斜日村原秋水多

野岸空懸舟楫心

地北天南一寄聲

雪霜向暮天邊盡

黃金丹砂開瓊玖

煙鬢霧鬢流雲霰

樓觀當空倒影來

明堂大厦要棟梁

深黃穠紫襍煙羣

五城十樓春窈窕

落梅折柳怨清夜

鴛鴦卻苦驂騑拙

榆黃沙白路透迤

紫蘿白穀垂香風
朱檠絳蟒豔紅葉

落日難同逝水還

萬里江湖雙涕淚

萬古光陰雙過客

清江樓閣中流見

五年山海一歸人

百年父子幾通家

暮天鴻雁幾時來

民國九年三月晦予為知事陳世虞無故逮獄十日而出在獄無俚從

唐樹德方正借得王漁洋菁華錄讀之因集句為聯語

青山環縣郭

花氣增明媚

泉壑窮窈窕

雲林交罨畫

涼月滿江樓

雪色滿清虛

水石餘清妍

煙火共邨墟

山路霽春雨

落霞明極浦

瑤象飾香縠

雲林交罨畫

水草入涼秋

夕霏收殘陽

風帆競孤鴛

池荷暗聞香

深林雞犬靜

野水鳧鷗遠

寒潮秋望遠

月暗津鼓急

大澤鷓鴣遊

深雪狐兔驚

落日山氣涼

暝坐歸鳥稀

雲日媚煙樹

螢火出深碧

褰衣入空翠

遙天壓煙水

春浪護魚龍

天水倒空青

茂林含夕清

涼雨灑林園

斜風偃雕鶚

雪晴煙樹小

風微竹煙淡

雅調出金石

貝闕敞魚龍
遠寺傳鍾魚

日夕竹園深

峽束波濤奔

意氣薄雲天

貂裘行采藥

泉聲微雨裡

澗流殘雪積

寒燈耿虛壁

漁榜沿回溪

春氣遠江陰

日夕亂煙霏

遠江明落霞

煙水懷前侶

孤館歇清漏

鳥下日將夕

人語煙初濕

溪山早著書

空山生暮寒

雞鳴雪漸深

雲歸山半陰

島屋閒垂釣

風峭遲開閣

青山滿高閣

雲開見江樹

溪流枕飛梁

潮落緩聞鐘

綠萼破春煙
流水落春陰

煙深聞夜漁

蕭條散蘆荻

五湖正秋色

峰勢亂蒼翠

秋月數上笛

合沓連江湖

千山滿夕陽

日光散青紅

寒江初落潮

斜日樹交蔭

雁聲初墮地

水園三千里

波濤三千里

浮雲天一涯

夕陽空亂山

冰絃一再行

才名二十年

雲樹孤城外

野戍青山遠

江城微雨過

合川縣志卷六十八叢譚

七十八

澤國春雨餘

開門黃葉深

山氣夕陽佳

雪岡漁市盡高妙

雪岡漁市盡高妙

明鏡朱顏豈長好

湖光雲霧相摩吞
笛聲雁影共迷離

湖光山色相周遭

龍驚鸞婉相迴翔

日夕含香玉皇觀

靈風斜日畫旗捲

兒童習見鵝鴨熟

花時細雨廣陵城
細馬吟春皂莢橋

落花游絲春晝閒

春陰偃蹇魚龍高

鳴鳩乳燕初睡起

無復秋蘭被長阪

安得滄波如匹練

金鋪鴛鴦早黃昏
玉柱銀房相向明

要將金屑譜霓裳
誰知暝色赴春愁

定有雲霞生墨池
不知煙寺遠聞鐘

雄談岸幘波濤起

玉河波射珊瑚赤

滄波混茫接元氣

紺宇凌霞道路長

甘蕉花入上林紅
地爐火熱獸炭紅

江山半遠入新秋

十日雨絲風片裡

長江巨石想飛動

徐庾文章建安作
故交零落遺民老

四山寒葉亂流中

銀濤雪浪急潺湲

博士風流幼婦詞

夢裡思君見顏色

七字愛吟楊處士

高天雕鶚盤空響

由來名士半樵漁

前身憶是陶通明

遲日雲霞拂海生

東風作意吹楊柳

好是日斜風定後

苦向畫圖耽寂寞

北窗高卧枕黃羲

已過橙黃橘綠時

頗能飲酒讀離騷

已有脂香化靈珀

曾窮梁益掠吳楚

怪石槎枒樹蕭瑟

永絕狐鼠芟荆榛

大開張掖連燉煌

寒禽將子水縱橫

鶯花海中九年住

中冠離支三百顆

黃川碧海須與事
秦川渭水望不到

鷓鴣煙際一隻飛

歸釣吳淞四十鱸
原廟衣冠二十春

帽影鞭絲何處歸

飛鳥流雲去寥廓

范緩倪迂大張拓

六詔祇今無斥堠

青鱸紫鰕正時新

江梅岸柳俱空濛

五湖歸去伴漁竿

白波青嶂非人境

風鬟霧鬢憶彷彿

風鬟霧鬢憶髣髴

粥鼓鐘魚不世情

神風靈雨紛飄搖
明珠翠羽共徘徊

碧波白馬爭清妍

杏花春水團宮纈

碧水青山自無恙
霧閣雲窗不留客

碧水青山自無恙

玉釵金縷散春燕

魏闕江湖共此心

疏枝冷蕊門橫斜
翠羽明璫尚儼然

玉蛾金璽飄零盡

金蠶玉魚誰料理

青松短壑妙結構

赤甲白鹽相向生
蓼岸漁灣遠近圍

雨態雲姿定有無
碧海青天路渺茫

黃泥曲岸相夤緣

灘聲半夜頭堪白

應有恩波下黃鵠

更添練鵲和蟬蜩

洞口無人蘚自青

坐看曾孫生白髭
欲買青山種木奴

莫將黃鵠怨烏孫
恥以松柏隨蓬科

空山落日鳴鷓鴣

嵩雲落日遙相憶

紫泉石髓倘留得

合川縣志卷六十八 叢譚

七十九

驛路松風響杜鵑
風亭月觀吟梅花

碧海青天怨有餘

翠羽明璫尚儼然

丹荔黃蕉炎海路

青笠紅衫風雪裡

孤琴隻鶴還留得
茶日筆牀相對好

碧花紅穗草堂秋

茂林修竹鏡湖濱

雨條風絮奈君何

桐陰滿地蒼苔滑

滿院松風數聲鶴

翠藤紅樹亂煙雨

叢菊初花秋氣涼

一卷陰符兩石弓

風亭月觀吟梅花

清流白石閱今古

清簟疏簾過暮雨

蒲澗紅泉應不改

海雨江風生齒牙

冰綃雲縠快迴波

棧雲隴樹苦相思

暖翠晴嵐看不盡

甲帳珠簾盡黃土

錦袍烏帽太瀟灑

寒竹碧梧時有聲

玉釵金縷散青燕

明珠翠羽共徘徊

斜日竹梧新霽後

龍行虎步非凡理

鳴鳩乳燕春欲晚

短衣匹馬空山中

粥鼓鐘魚不世情

簫鼓樓船事已非

鬢絲禪榻心情改

雲霄侍從幾人在

飛鳥流雲去寥廓

蓼岸漁灣遠近圍

簞錦鸞綾萬卷殊

碧海青天路渺茫
露葉煙條拂狹斜

花底自成金葉格

長橋極浦晚潮落

偶坐濠梁忘日暮

柴門盡掩菰蒲叢

苦竹黃楓清猿啼

如懸大篋鏗華鐘

驂鸞騎鶴三山上	行盡青溪三百曲	坐愛琉璃一千頃
流雲紫閣數峰西	坐閱春光九十年	歸釣吳淞四十鱸
北豸南鱸誰辨得	憶汝酣詞拓金戟	高齋茗飲坐清晝
青鮒紫鰈正時新	嗟予袴褶騎黃驄	危亭孤棧簇煙邨
青天無數雲濤捲		
黃昏微雨畫簾垂		